

A Wakak na Wasiso un o Iesu Karisito o Luk i tumusi

A wasiso talapor mugu

O Luk i tumus a buk ri. Awu sur i ara tagun a noino ma aru nat na ususer anun o Iesu. Ma awu sur i a te Juda, i a te Grik. A ramano kum tene mananos tagun a Buk Tabu, det nuki lena, anun a tamon o Antiok una papor Siria. O Luk ke tama tar a kum utna ra o Iesu i pami. Ikut i los a mananos tandet ra det wasiso un o Iesu. Una ramano kum inawan anun o Pol, o Luk i wan tomo nami. (Ap 16:10-17; 20:5-21; 27:1-28:16).

Numugu anun a pinapam a dokta, ma i tasman wakak a wasiso Grik.

A buk ri a mugano buk ra o Luk i tumusi, ma i tumusi kai a buk Aposel. I tumus a buk ri sur a taro Grik det in tasman wakak a wasiso un o Iesu ma det in nurnur uni. Det in tasmani lena o Iesu i wan pirso urin sur in ulaun a taro rop. O Luk i tumtumus kai un o Iesu lena, i wanpat a musano mulus, ma i wasiso una nun a marmaris torom a sibo na taro, ma torom dat rop taktakai.

I tumusi kai a kum utna ri: A watung ulabo torom o God, a dekdekin a Tokodos na Nion, a niaring, ma a nilaun anun a kum sibo na taro ma a kum tene gongon.

A inawan ina buk Luk:

A turturkibin ina buk ri (1:1-4)

A usus anun o Iesu ma o Jon a Tene Baptaiso (1:5-2:52)
 A pinapam anun o Jon a Tene Baptaiso (3:1-20)
 Di baptaiso o Iesu ra numur o Satan i lari (3:21-4:13)
 O Iesu i papam tong o Galili (4:14-9:50)
 O Iesu i wan usapat o Jerusalem (9:51-19:27)
 A ururop na wik ma a minatin o Iesu (19:28-23:56)
 A katkatutur melet anun o Iesu gusun a minat (24:1-49)
 A inawan toto anun o Iesu (24:50-53)

O Luk i tumus a buk ri torom o Tiopilus

¹ Torom o Tiopilus,

A susut det lari ra det sa pam sot pas a tumtumus una kum utna ra i wanpat epotor tamet. ² A taro ra det sa tama tar a kum utna ri numugu, ma det ser ususer a taro una Wakak na Wasiso, det ut det inanos met una kum utna ri. ³ I mo ra iau kai, a sa tikin pas a kum utna ri tagun a turturkibino, ra a nuki lena, i wakak ra an tumus tari torom ui, o Tiopilus a labino. Ra a tumus a kum utna ri, a tumus murmuri ut a inawan pat indet, ⁴ sur un tasmani lena, a kum utna ra di sa ususer tar ui nami, i lingmulus ut.

A wasiso talapor mugu ra din usus o Jon a Tene Baptaiso

⁵ Una kilalo ra o Erod i king una papor Judia, ara tene etabor torom o God a risano o Sekaraia. I ara tagun a kabotaro anun o Abia, ra det rop a kum tene etabor. O Sekaraia, anun a ino a risano

o Elisabet, der rop tagun a kabotaro anun o Aron. ⁶ Der aru tene tokodos umatan o God, der mur wakak a kum Warkurai rop anun a Labino. ⁷ Ikut katu nutunder, uni o Elisabet ke ser usus, ma der sa takano laulau kai.

⁸ Ara bung una kum bung na etabor anun a kabotaro anun o Sekaraia, o Sekaraia ut i pam a pinapam na etabor umatan o God. ⁹ A kum tene etabor torom o God det pilok pas o Sekaraia sur i ut in ruk una rumu na etabor anun a Labino, ma in tun a paura ra a misino i sangnain wakak ra di watungi nama insens. Anundet a pipilok ra, i elar nama ngasino ra det ser muri*. ¹⁰ Una du bung ra i tun a insens, a taro na lotu rop ra det tur tomo nago upiso det wararing.

¹¹ A ensel anun a Labino i wanpat torom o Sekaraia, ra i tur taru una papor sot na kabulu na tuntun etabor, ra di ser tun a utna ra i sangsangnain wakak uni. ¹² Ra o Sekaraia i tama pasi, a pinino i surin, ma i ngara doko uni. ¹³ Ikut a ensel i watungi tano lena, “Sekaraia, gong u ngara, o God i sa longoro anum a niaring, ma anum a ino o Elisabet in usus pas tu nutumlik a musano, ra un pasor a risano nam o Jon. ¹⁴ Un gas doko nami, ma a susut kai det in gas una nun a usus, ¹⁵ uni in labo umatan a Labino. Ken inum a wain, o a dekdek na ininum. Ra ka din ususi utmakai i sa bukus nama Tokodos na Nion. ¹⁶ Ma in ben pukus tar a susut na taro Israel torom a

1:9: Kis 30:7 * **1:9:** Det pam ara pinapam sur in ese det lena, osi ra in pam a pinapam na etabor. Ara taro det nuki lena, i elar nami ra di tumus a risan a taro taktakai una kum watat, ra osi ra a risano i wanpat in los a pinapam ra. **1:15:** Nam 6:3

Labino anundet a God. ¹⁷ In dekdek elar nama poropet Elaija ma a magirano kai in elar ut nami. In mugu tan a Labino, sur in ben tomo melet a kum tamtaman a kum nat torom a kum nutnutun det sur det in emarom melet, ma in ben pas a taro na pitarngat melet sur a wakak na ninunuk anun a kum tokodos na taro, sur in waninar a taro anun a Labino sur anun a inawan pat.”

¹⁸ O Sekaraia i ting a ensel lena, “An tasman petlani lena a utna ri in nanpat? Uni mir, mir sa takano rop.” ¹⁹ Ra a ensel i balu i lena, “Iau o Gebriel, a ser tur umatan o God. I ut i tulu ru iau sur an inanos ui, ma an los a wakak na wasiso ri torom ui. ²⁰ Tama i! Ko nurnur una nung a wasiso. In nanpat mulus ut una kalangino. Tama i, turpasi uniri kon wasiso, uni ko nurnur. Un ngat tuk una du bung ra a utna ri in nanpat uni.”

²¹ Una du bung ra a taro det kis langlang sur o Sekaraia, det nuknuk doko, uni i sa suano i tiro una rumu na etabor. ²² Ra i wan pirso, ke wasiso lar pas mo torom det. Det tasmani lena o Sekaraia i sa tama tar tu tamtama tiro una rumu na etabor, uni i tustusu mukut torom det nama ru lamano.

²³ Ra i sa rop anun a du bung na pinapam, i milet melet sur anun a tamon. ²⁴ Ma numur, o Elisabet anun a ino i tianan, ma a limo na kalang ke wan gisen pas gusun a rumu. ²⁵ Ra i watungi lena, “A Labino i sa warut tar iau, ma uniri maragom i los ru asau ra a maimai nami umatan a taro.”

Di inanos o Maria lena in usus o Iesu

²⁶ Ra i sa wonomnin kalang anun o Elisabet, o God i tulu ru a ensel Gebriel utong o Galili un ara tamon a risano o Nasaret. ²⁷ I wan torom ara toraro ra ke inep tomo nam tu musano. A risano o Maria, ra di sa ubek bat tari sur anun o Josep, i tagun a kabotaro anun o Dewid. ²⁸ A ensel i ruk torom o Maria ma i watungi tano lena, “Un gas, u dan doko! A Labino i kis tomo nam ui.” ²⁹ A nuknukin o Maria i purpuruon ma i nuknuk doko una wasiso ri lena asau a kukuraino. ³⁰ Ikut a ensel i watungi tano lena, “Maria, gong u ngara, uni o God i gas doko nam ui. ³¹ Tama i! Un tianan, un usus pas a nat musano, ra un pasor tar a risano nam o Iesu. ³² Ma a risano in rereng, ma din watungi a Nutun o God a Labino Sakit. Ma a Labino o God, in ukis tari una kiskis na king anun o tubunu o Dewid, ³³ ma in warkurai tukum sur a kabotaro anun o Jekop, ma anun a matanitu ken rop.” ³⁴ O Maria i ting a ensel lena, “In pepetlai ri? Uni ka nolin utmakai nam tu musano.” ³⁵ A ensel i balu i lena, “A Tokodos na Nion in kis un ui, ma a dekdekin o God a Labino Sakit in pulus bat ui. Ra a Tasur na Musano ra un usus pasi, din watungi a Nutun o God. ³⁶ Tama i, a kukum o Elisabet i sa takano laulau, ra di watungi lena ken usus mo, ikut uniri i sa tianan, ma i sa wonomnin kalang anunu. ³⁷ Uni katu utna i ngangitin torom o God.” ³⁸ Ra o Maria i watungi lena, “Tau a tultul anun a Labino. I wakak ut sur din pami un iau elar ut nama num a wasiso.” Ra a ensel i wan gusuni.

O Maria i wan torom o Elisabet

1:27: Mt 1:16, 18
7:12, 13, 16; Ais 9:7

1:31: Ais 7:14; Mt 1:21-23
1:37: Stat 18:14

1:32: 2 Sml

³⁹ Numur o Maria i waninar pas, ra i wan lakit usapat una kum tangai sur ara tamon ra i kis una papor Judia. ⁴⁰ I ruk una rumu anun o Sekaraia, ra i kabo na gasgas pas o Elisabet. ⁴¹ Ra o Elisabet i longoro pas a kakabo na gasgas anun o Maria toromi, a nat i milu unin balano, ma o Elisabet i bukus nama Tokodos na Nion. ⁴² Ra i watungi namin labino walngano lena, “Ui u dan tan a kum wardain rop, ma a nat kai ra un ususi i dan. ⁴³ Iau osi na ngas na ino ri, ra a nan anung a Labino i wan torom iau? ⁴⁴ Ra a longoro anum a kakabo na gasgas torom iau, a nat i gas, ma i milu unin balang. ⁴⁵ U dan, uni u nurnur lena, a wasiso anun a Labino torom ui in nanpat mulus.”

O Maria i watung ulabo pas o God

⁴⁶ O Maria i watungi lena,
 “A niong i watung ulabo pas a Labino,
⁴⁷ ma in balang i gas un o God, anung a Tene Ulaun,
⁴⁸ uni i maris iau anun a tultul na ino, a ino oros kut iau.
 Turpasi uniri a kum taun taro rop det in watungi un iau lena a dan,
⁴⁹ uni i ra i Dekdek, i sa pam tar a kum labino utna un iau,
 a risano i tasur.
⁵⁰ Anun a marmaris i kis torom det ra det ngara suri,
 a kum taun taro rop.
⁵¹ I pam a kum dekdek na pinapam nama lamano,

- i lu susuaro ru det ra det uman labino una nuknukin det.
- ⁵² I woro pirso ru a kum king gusun anundet a kum kiskis na labino, ma i ulabo pas det ra det unatino pas det.
- ⁵³ I tabor masur a taro ra det murak nama kum wakak na utna, ikut i tulu ru a kum tene gongon nama gowono lamandet.
- ⁵⁴ I warut anun a kum tultul, a taro Israel, ra i nuk pas anun a marmaris
- ⁵⁵ torom o Abaram ma anun a kabotaro tukum, elar nami ra i sa watung tari torom anundat a kabotaro tagun numugu.”
- ⁵⁶ Ra o Maria i kis nisan o Elisabet elar nama tulin kalang, ra numur i millet melet sur anun a tamon.

O Elisabet i usus o Jon a Tene Baptaiso

- ⁵⁷ Ra a bung anun o Elisabet i sot sur in usus uni, i usus pas a nat musano. ⁵⁸ A kum paspasano ma a kum kukunu det longoro i lena a Labino i maris doko o Elisabet, ma det gas tomo nami.
- ⁵⁹ Ra i sa tiwal na bung anun a nat, det waninar sur din tok talilis a pinino, ma det nemi sur det in pasor tar a risan o tamano o Sekaraia uni.
- ⁶⁰ Ikut o nano i watungi lena, “Gong! Din pasori ut nam o Jon.” ⁶¹ Det watungi tano lena, “Katu kukum i los a rising ra.” ⁶² Numur det pam a kum ukinalong nama lamandet torom o tamano, ra det tingi lena, “Osi na rising u nemi sur din pasor

1:52: Jop 12:19; 5:11; Sng 147:6 **1:53:** Sng 34:10 **1:54:** Sng 98:3 **1:55:** Mai 7:20; Stat 17:7 **1:59:** Stat 17:12; Wkp 12:3; Lk 2:21

a nat ri nami?” ⁶³ Ra i ukinalong nama lamano sur tu utna ra in tumtumus uni, ma i tumusi lena, “A risano o Jon.” Det rop det kisin. ⁶⁴ Uniutra a wan o Sekaraia i papos, ma in karmene i milu, ra i wasiso mut, i watung ulabo pas o God. ⁶⁵ Ma a kum paspasan der rop, det ngara. A wasiso una utna ri, i wan sarara una kum tamon sapat una kum tangai una papor Judia. ⁶⁶ Det rop ra det longoro i, det nuknuk doko uni, ma det watungi lena, “A nat ri in nanpat asi na ngas na musano?” Uni det tama i lena a dekdekin a Labino i kis uni.

O Sekaraia i wasiso na poropet

⁶⁷ O Sekaraia o taman o Jon, i bukus nama Tokodos na Nion, ma i wasiso na poropet lenri,
⁶⁸ “Dat in watung ulabo pas a Labino, a God anun a taro Israel,
 uni i sa wanpat taru torom anun a taro,
 ma i sa ulangolango tar det.
⁶⁹ I sa pitar tar a dekdek na Tene Ulaun torom dat,
 tagun a kabotaro anun o Dewid, a tultul anun a Labino,
⁷⁰ elar nami ra i sa watung tari numugu utmakai
 una wan anun a kum tasur na poropet.
⁷¹ I sa pitar tari sur in ulaun pas dat gusun
 anundat a kum ebar,
 ma gusun a lamandet rop ra det nget dat,
⁷² ma sur in maris anundat a kabotaro tagun
 numugu
 ma in pam sot pas anun a tokodos na
 kunubus.

- 73 I liliman taru torom a tubundat o Abaram
lena,
- 74 in ulaun pas dat gusun a laman anundat a kum
ebar,
sur dat in papam toromi ma ka dat in ngara.
- 75 Dat in papam toromi nama petutna ra i
talapor ma i tokodos umatano,
una nundat a kum bung na nilaun rop.
- 76 Ma ui, nutunglik, din watung ui, a poropet
anun o God a Labino Sakit,
uni un mugu nanan tan a Labino,
sur un pam saro mugu anun a kisapi,
- 77 sur din utalapor anun a taro lena o God in
ulaun pas det,
una nun a pinapam ra in unus ru anundet a
kum sakino petutna,
- 78 kibino una labino marmaris anun anundat a
God.
Ma una nun a marmaris, a talapor tagisapat
netes in sisio pat torom dat.
- 79 In sisio un det ra det kis una dumirum,
ma una dumirum na minat,
sur in mugu dat una kisapi na malmal.”
- 80 Ra a nat i labo pat nanan ma o God i udekdek
a niono. Ma i kis una nubual kalako taro uni tuk
ra i tur pat torom a taro Israel.

2

O Maria i usus o Iesu (Mt 1:18-25)

1:73: Stat 22:16-17 **1:75:** Tai 2:12-14 **1:76:** Ais 40:3
1:77: Jer 31:34 **1:78:** Ais 60:1-2

¹ Una kilalo ra, o Sisa Augustus, a mugumugu tagun a gapman Rom, i ubek a warkurai sur din tumus a risan a taro rop una kum tamon ra o Rom i warkurai sur det. ² Iri a mugano dino ra di tumus a risandi una kum kilalo ra o Kwirinius i mugumugu tong o Siria. ³ Ma a taro rop det wan sur anundet a kum tamon mulus sur din tumus a risandet.

⁴ O Josep kai i wan tagitiro una tamon Nasaret una papor Galili utong o Betliem una papor Judia. O Betliem, a tamon ra di usus o Dewid iai, ma o Josep i wan utong, uni i tagun a kabotaro anun o Dewid. ⁵ I wan sur din tumus a risano, tomo nama risan o Maria ra di sa ubek bat tari sur anunu. Ra der wan o Maria i sa tianan. ⁶ Ra der kis tong o Betliem, i sa sot a du bung sur o Maria in usus uni, ⁷ ra i usus pas a mugano nutunu, a nat musano. Ma i pulusi* nama kum malu anun a nat, ma i inep tari una boks na inangon ana kum wewegua, uni a rumu na usiro i sa bukus pas gusun detul.

A ensel i pitar a wasiso torom a kum tene tamtamabat anun a kum sipsip

⁸ A ramano kum tene tamtamabat anun a kum sipsip det tamtamabat anundet a kum sipsip una mirum sa ubual milau una tamon ra. ⁹ Ma a ensel anun a Labino i wanpat torom det, ma a minamar anun a Labino i sisio talilis det, ra det ngara doko. ¹⁰ Ikut a ensel i watungi tandet lena, “Gong mot ngara. Mot tama i, a wanpat torom mot nama

* **2:7:** A magiran a taro Juda det rau a nat miso nama kum du malu. Det rau i sur a ru lamano ma a ru kikino in tokodos ma gong a pinino i kotokoto.

wakak na wasiso ra in ugargas a taro rop. ¹¹ Uniri, una tamon anun o Dewid, di sa usus pas anumot a Tene Ulaun, i a Karisito, a Labino. ¹² Ma mot in tama a ukinalong lenri: A nat di pulus tari nama kum malu na nat, ma di inep tari una boks na inangon ana kum wewegua.”

¹³ Uniutra a labino kunur na ensel tagisapat una langit det wanpat torom a ensel ra, ma det watung ulabo pas o God lena,

¹⁴ “Dat in watung ulabo pas o God sapat netes sakit,

ma a malmal una rakrakon bual rop torom det ra o God i gas sur det.”

¹⁵ Ra a kum ensel det sa wan gusun det usapat netes una langit, a kum tene tamtamabat anun a kum sipsip det watungi lena, “Uniutri dat in nan utong o Betliem, dat in tama a utna ri i sa wanpat, ra a Labino i sa inanos tar dat nami.”

¹⁶ Ra det wan lakit, ra det sio pas o Maria ma o Josep ma a nat miso ra di inep tari una boks na inangon ana kum wewegua. ¹⁷ Ra det sa tama tar a nat, det watung puaso a wasiso ra a ensel i sa inanos tar det nami una nat ra. ¹⁸ Det rop ra det longoro a wasiso anun a kum tene tamtamabat anun a kum sipsip, det kisin doko uni. ¹⁹ Ra o Maria i longoro a kum wasiso ri, i pam ukai i unin balano ma i nuknuk doko uni. ²⁰ A kum tene tamtamabat anun a kum sipsip det milet melet, det ulabo pas o God ma det rakon lekeleke pasi una kum utna det longoro i ma det sa tama tari, elar ut nama wasiso anun a ensel.

Di pasor a risan o Iesu

²¹ Ra i tiwal na bung anun a nat, ma i sa sot sur din tok talilis a pinino, di pasor tar a risano nam o Iesu, elar nama wasiso ra a ensel i sa watung tari ra o Maria ke tianan utmakai.

Di pitar tar o Iesu torom a Labino

²²⁻²⁴ Numur tan a bung ra o Maria i usus o Iesu, o Maria ma o Josep der kis ru a kum bung na utalapor sur o Maria in talapor melet umatan o God†. Ra a kum bung ra, i sa rop, der wan usapat o Jerusalem, sur der in pitar a etabor, elar nama Warkurai anun o Moses. Der in etabor nama “arin natabun o arin barman na balus,” *Wkp 12:8*

elar nama Warkurai anun a Labino. Der los o Iesu utkai usapat o Jerusalem, sur der in pitar tari torom a Labino, elar nami ra di sa tumus tari una Warkurai anun a Labino lena, “A kum mugano nat musano rop ma a kum mugano loko na wewegua, din pitar tar det torom a Labino.” *Kis 13:2, 12*

²⁵ Ara musano i kis sapat o Jerusalem a risano o Simion, a tene tokodos ma a tene urur kai torom o God. I ser kis langlang sur o God in ulaun a taro Israel, ma a Tokodos na Nion i kis uni. ²⁶ A Tokodos na Nion i sa upuaso tari toromi lena ken mat lakit, tuk ut ra in tama tar a Karisito anun a Labino. ²⁷ A Tokodos na Nion i mugu i sur in ruk unin noworo na rumu na etabor. Ra i tama pas

2:21: Lk 1:31 **2:22-24:** Wkp 12:1-8 † **2:22-24:** Una Warkurai anun o Moses, a ino ra i usus in pam sot pas a ru pinapam sur in talapor melet umatan o God. A mugano, in kis ru a wat na noino bung, ma a manru nami, in pitar a etabor torom o God.

der suano der wanpat nama nat, o Iesu, sur der in pitar tari torom a Labino, elar nami ra di sa tumus tari una Warkurai. ²⁸ O Simion i los pas o Iesu nama ru lamano, ra i watung wakak torom o God lenri,

²⁹ “Labino, uniri un ulangolango ru iau, anum a tultul, sur an nan nama malmal, elar ut nama num a liliman torom iau.

³⁰ A sa tama tar a Tene Ulaun namin matang, a Tene Ulaun ra u tulu ru i.

³¹ U sa waninar tari umatan a kum kabotaro rop.

³² I a talapor sur in utalapor anum a kisapi torom det ra awu sur a taro Israel,

ma sur a minamar torom anum a taro Israel.”

³³ O tamano ma o nano der kisin doko una kum wasiso ra o Simion i watungi un o Iesu. ³⁴ O Simion i watung udan detul, ra i watungi tan o Maria, o nan o Iesu, lena, “Tama i, a nat ri, o God i pilok pasi sur a susut na te Israel det in iru uni, ma a susut kai det in laun uni, ma sur a ukinalong ra a susut na taro det in rosumur gusuni. ³⁵ Ra det in rosumur gusuni, in upuaso a kum nuknuk tagun a balandet. Ma ui, a tupunuk ra un taramo i in elar namin totok na inaim ra in so anum a nilaun.”

³⁶⁻³⁷ Ara ino bulung, a poropet, a risano o Ana, a nutun o Paniel, tagun a kabotaro Aser. I sa takano laulau, i sa tiwal na noino ma wat na kilalo anunu ma i ula mukut. Der nolin pas kut a wonom mawit na kilalo, ra numur anun a musano i mat. A ino ri ke wan taru gusun a rumu

2:30: Ais 52:10; Lk 3:6; Tai 2:11

2:32: Ais 42:6; 49:6; 52:10

2:34: Ais 8:14; Mt 21:42; 1 Pit 2:8

na etabor, i ser lotu una kum mirum ma a waspi, i ser wewel ma i ser wararing. ³⁸ Una du bung utra, i wanpat torom detul, i watung wakak pas torom o God, ra i wasiso puaso una nat torom det rop ra det ser kis langlang sur o God in ulangolango pas a taro Jerusalem.

Detul milet melet utong o Nasaret

³⁹ O Josep ma o Maria der sa pam sot pas a kum utna rop elar nama Warkurai anun a Labino, ra numur detul milet melet utong o Galili, sur anundetul a tamon, o Nasaret. ⁴⁰ Ra a nat i labo pat nanan, ma i dekdek nanan, ma i bukus nama mananos, ma a marmaris anun o God i kis uni.

O Iesu i kis sikot una rumu na etabor

⁴¹ Una kum kilalo rop o taman o Iesu ma o nano der ser wan usapat o Jerusalem una labino bung na lotu na Wanlakai. ⁴² Ra i sa noino ma aru kilalo anun o Iesu, detul wan usapat o Jerusalem sur a labino bung na lotu na Wanlakai, elar ut nami ra det ser pami. ⁴³ Ra a labino bung na lotu na Wanlakai i sa rop, det turpas a inawan sur det in milet melet, ma o Iesu i kis sikot kut sapat o Jerusalem, ikut o tamano ma o nano ka der tasmani. ⁴⁴ Der nuki lena, det wan tomo nama taro. Ra det sa wan ara bung una nundet a milmilet, der turpasi sur der in sisio sur o Iesu nisan a kum kukundetul, ma a kum paspasan detul.

⁴⁵ Ra der lagano sisio taru suri, der milet melet usapat o Jerusalem, ra der sisio mo suri sapat.

⁴⁶ Ra der sa sisio pas a tulu bung, der tama torom

pasi ubalan in noworo ina rumu na etabor. I kis tomo nama kum tene ususer tagun a Warkurai, i longoro det, ma i ting det. ⁴⁷ Det rop ra det longoro i, det kisin una nun a mananos, ma anun a kum minabalu torom det. ⁴⁸ Ra der tama pasi, der kisin, ma o nano i watungi tano lena, “Nutunglik, ilai ra u pami lenri un mir? Mir nam o tamam mir sa sisio doko pas sur ui, ma mir ngara doko sur ui.” ⁴⁹ Ra i watungi tander lena, “Asau ra mur sisio sur iau suri? Ka mur tasmani lena i tokodos sur an kis una rumu anun o Tita?” ⁵⁰ Ikut ka der talapor una nun a wasiso.

⁵¹ Numur detul milet melet utong o Nasaret, ra i ser mur a wasiso anunder, ma o nano i nuk ukai a kum utna rop ri. ⁵² O Iesu i labo pat nanan una pinino ma una nun a mananos, ma o God ma a taro kai det gas doko nami.

3

O Jon a Tene Baptaiso i warawai (Mt 3:1-12; Mk 1:1-8; Jn 1:19-28)

¹ Ra i sa noino ma limo na kilalo una warkurai anun o Sisa Taiberius, o Pontias Pailat a labino mugumugu i warkurai sur a papor Judia, ma o Erod i mugumugu una papor Galili, ma a tisino o Pilip i mugumugu una aru papor Ituria ma o Trakonitis, ma o Lisantias i mugumugu una papor Abilene ² ma o Anas ma o Kaiapas der los a pinapam na mugumugu na tene etabor torom o God. Una kilalo ra, a wasiso anun o God i wanpat torom o Jon, a nutun o Sekaraia ra i kis una nubual kalako taro uni. ³ Ma i wan una kum

nubual rop milau a danim Jodan, i ser warawai lena, a taro det in nukpukus ma din baptaiso det, sur o God in unus ru anundet a kum sakino petutna. ⁴ Elar nami ra di sa tumus tari una buk anun a poropet Aisaia lena,

“Una nubual kalako taro uni, in nalngan ara i kakabo lena,

‘Mot in waninar a kisapi anun a Labino,
mot in pam kodos anun a kum kisapi.

⁵ A kum lala rop din por det
ma a kum du tultul rop ma a kum tangai din
kil elaro det.

A kum kisapi ra i kiloklok din ukodos det,
ma a kum nubual i tungtung, din por kodos
det.

⁶ Ra a taro rop det in tama i ra o God in ulaun a taro.’” *Ais 40:3-5*

⁷ A kunur na taro det wanpat torom o Jon sur in baptaiso det, ra i watungi tandet lena, “Ai, mot a kum nutnutun a kum sui! Osi ra i inanos mot sur mot in kalabor eno gusun a warkurai na minabalu anun o God, ra in nanpat? Iau awu.

⁸ Mot in pam a kum utna ra in upuaso i lena mot sa nukpukus. Ma gong mot nuki lena, o God ken warkurai mot uni mot a kabotaro anun o Abaram. A inanos mot lena, o God in pet lari sur in pam pat pas a kabotaro anun o Abaram tagun a kum watat ri. ⁹ Di sa ubek tar a nawu nisan a kum kibino duwai, ma a kum duwai rop ra ka det wu lako wakak na windet, din tau ru det, ma din woro tar det una sungun.”

¹⁰ A kunur na taro det tingi lena, “Asau ra met in pami?” ¹¹ I balu det lena, “Osi ra anunu lako rin namalu na kelkeles, in pitar tar tino tan taio ra ka tin namalu na ememar anunu, lenkutkan ra una utna na inangon.” ¹² Ma a ramano kum tene los takis det wanpat sur in baptaiso det. Ma det tingi lena, “Tene Ususer, asau ra met in pami?” ¹³ Ra i balu det lena, “Gong mot los a takis i labo tauni ra di sa kubus tari.” ¹⁴ Ma a ramano kum tene inaim det tingi lena, “Ma met, asau ra met in pami?” Ra i balu det lena, “Gong mot los na kankan oros pasi kut a mani gusun a taro, ma gong mot etakun torotoro, mot in gas kut sur a ikul ra din pitari tamot.”

¹⁵ A taro det kiskis langlang sur a Karisito in nanpat. Ra det longoro o Jon, det nuki lena kutiro a Karisito mo. ¹⁶ Ra o Jon i watungi tandet rop lena, “Iau, a baptaiso mot nama danim. Ikut o naro ra a dekdekino i labo taun a dekdeking in nanpat. Ka elar sur an palos aru su gusun aru kikiño, uni a natino doko tano. In baptaiso mot nama Tokodos na Nion ma a sungun. ¹⁷ I pam pas anun a pok nam aru lamano sur in lakro susuaro a pino wit gusun a wino wit*. Numur in ubek tomo anun a wino wit una nun a rumu na wit, ikut in tun ru a kum pinino una sungun ra ke ser mat.” ¹⁸ Ra o Jon i warawai torom det nama Wakak na Wasiso i udekdek det nama susut na wasiso sur det in pukus anundet a nilaun.

3:12: Lk 7:29 **3:16:** Ap 13:25 * **3:17:** A ngasino ra di ser lakro ru a pinino wit gusun a wino i lenri: Di woro toto a wit ra a wuwu i wup ru a pinino ra a wino i puku pirso.

19 Ma o Jon i wasiso dekdek torom o Erod a mugumugu, uni i nolin melet nam o Erodias, a ino anun o tisino. Ma i wasiso dekdek una kum sakino utna rop kai ra o Erod i sa pam tari. 20 Ma o Erod i wot melet ara sakino petutna ra i uruk tar o Jon una karabus.

*O Jon i baptaiso o Iesu
(Mt 3:13-17; Mk 1:9-11)*

21 Ra o Jon i baptaiso a taro rop, i baptaiso i kai o Iesu. Ma una du bung ra i wararing, a langit i papos, 22 ma a Tokodos na Nion i wan pirso, i ubek pas a pinino lar in natahun ma i kis taru netes un o Iesu. Ma in nalngan ara tagisapat una langit i watungi lena, “Ui a Nutunglik, a nat na wakak, a gas doko nam ui.”

*A utatos ina kabotaro anun o Iesu
(Mt 1:1-17)*

23 O Iesu i turpas anun a pinapam ra kutiro i tulu noino kilalo anunu. I a nutun o Josep, a nuknukin a taro kut lenra.

O Josep a nutun o Eli,

24 o Eli a nutun o Matat,
o Matat a nutun o Liwai,
o Liwai a nutun o Melki,
o Melki a nutun o Janai,
o Janai a nutun o Josep,

25 o Josep a nutun o Matatias,
o Matatias a nutun o Amos,
o Amos a nutun o Naum,
o Naum a nutun o Esli,
o Esli a nutun o Nagai,

²⁶ o Nagai a nutun o Mat,
o Mat a nutun o Matatias,
o Matatias a nutun o Semein,
o Semein a nutun o Josek,
o Josek a nutun o Joda,
²⁷ o Joda a nutun o Joanan,
o Joanan a nutun o Resa,
o Resa a nutun o Serubabel,
o Serubabel a nutun o Salatiel,
o Salatiel a nutun o Neri,
²⁸ o Neri a nutun o Melki,
o Melki a nutun o Adi,
o Adi a nutun o Kosam,
o Kosam a nutun o Elmadam,
o Elmadam a nutun o Er,
²⁹ o Er a nutun o Josua,
o Josua a nutun o Eliaser,
o Eliaser a nutun o Jorim,
o Jorim a nutun o Matat,
o Matat a nutun o Liwai,
³⁰ o Liwai a nutun o Simion,
o Simion a nutun o Juda,
o Juda a nutun o Josep,
o Josep a nutun o Jonam,
o Jonam a nutun o Eliakim,
³¹ o Eliakim a nutun o Melea,
o Melea a nutun o Mena,
o Mena a nutun o Matata,
o Matata a nutun o Natan,
o Natan a nutun o Dewid,
³² o Dewid a nutun o Jesi,
o Jesi a nutun o Obed,
o Obed a nutun o Boas,

o Boas a nutun o Salmon,
o Salmon a nutun o Nason,
³³ o Nason a nutun o Aminadap,
o Aminadap a nutun o Atmin,
o Atmin a nutun o Arni,
o Arni a nutun o Esrom,
o Esrom a nutun o Peres,
o Peres a nutun o Juda,
³⁴ o Juda a nutun o Jekop,
o Jekop a nutun o Aisak,
o Aisak a nutun o Abaram,
o Abaram a nutun o Tera,
o Tera a nutun o Naor,
³⁵ o Naor a nutun o Seruk,
o Seruk a nutun o Reu,
o Reu a nutun o Pelek,
o Pelek a nutun o Eber,
o Eber a nutun o Sela,
³⁶ o Sela a nutun o Kainan,
o Kainan a nutun o Arpaksat,
o Arpaksat a nutun o Sem,
o Sem a nutun o Noa,
o Noa a nutun o Lamek,
³⁷ o Lamek a nutun o Metusela,
o Metusela a nutun o Enok,
o Enok a nutun o Jaret,
o Jaret a nutun o Malelel,
o Malelel a nutun o Kenan,
³⁸ o Kenan a nutun o Enos,
o Enos a nutun o Set,
o Set a nutun o Adam,
o Adam a nutun o God.

4

O Satan i lar o Iesu
(Mt 4:1-11; Mk 1:12-13)

¹ O Iesu i bukus nama Tokodos na Nion. Ra i wan tagitong una danim Jodan, a Tokodos na Nion i mugu i utiro una nubual kalako taro uni.

² I kis tiro iai a wat na noino bung ra o Satan i lari. Ke wan tu utna ubalan a kum bung ra. Numur i murak. ³ Ra o Satan i watungi tano lena, “Ra ui a Nutun o God, un inanos a wat ri sur in nanpat a beret.” ⁴ O Iesu i balu i lena, “Di sa tumus tari una Buk Tabu lena, ‘A taro ka det ser laun nama utna na inangon kut.’ ” *Lo 8:3*

⁵ O Satan i ben pasi sur ara nubual sapat netes, ra i ese tar a kum tamon rop una rakrakon bual tano una nat na du bunglik kut. ⁶ Ra i watungi tano lena, “An tabor ui nama dekdekin det rop ma a kum minamarin det rop, uni di sa pitar tari tang, ma an pitari torom taio ra a nemi. ⁷ Ra un lotu torom iau, a kum utna ri, anum rop kut.” ⁸ O Iesu i balu i lena, “Di sa tumus tari una Buk Tabu lena, ‘Un lotu torom a Labino anum a God, ma un papam kut toromi.’ ” *Lo 6:13*

⁹ Numur o Satan i ben pasi usapat o Jerusalem, ma i utur tari sapat netes sakit una rumu na etabor. Ma i watungi tano lena, “Ra ui a Nutun o God, un sirok pirso taginin, ¹⁰ uni di sa tumus tari una Buk Tabu lena,

‘In inanos anun a kum ensel
 sur det in tamtamabat wakak ui.’

¹¹ Ma, ‘Det in pam pas ui nama kum lamandet,

sur gong u tuka a kikum un tu wat.’ ” *Sng*
91:11-12

¹² O Iesu i balu i lena, “Di sa watung tari una Buk Tabu lena, ‘Gong u lar a Labino anum a God.’ ” *Lo*
6:16

¹³ Ra o Satan i sa lar tari nama kum ululam rop ri, i wan munung gusuni.

O Iesu i turpas anun a pinapam tong o Galili
(Mt 4:12-17; Mk 1:14-15)

¹⁴ O Iesu i millet melet utong una papor Galili nama dekdekin a Tokodos na Nion, ma a wasiso uni, i wan sarara una papor rop ra. ¹⁵ O Iesu i ususer a taro una nundet a kum rumu na lotu, ma det rop det watung ulabo pasi.

Di lu ru o Iesu tagitong o Nasaret
(Mt 13:53-58; Mk 6:1-6)

¹⁶ O Iesu i wanpat tiro o Nasaret, a tamon ra i labo pat iai, ma i ruk una rumu na lotu una Bung na Sabat, elar nama nun a petutna ut, ma i tur sur in luluk. ¹⁷ Ra di pitar tar a buk anun a poropet Aisaia toromi. I palos pas a buk ra di sa pul tari, ma i tama a dino ra di sa tumus tari lenri,

¹⁸ “A Nion a Labino i kis un iau,
 uni i sa pilok pas iau sur an warawai nama wakak na wasiso torom a kum sibo na taro. I tulu ru iau sur an warawai lenri, din palos ru det ra di sa ker ukai tar det,
 din utamtama melet a kum pulu,
 din ulangolango ru det ra det taramo a mamaut ra di sa pam tari un det,

¹⁹ ma an wasiso puaso una kilalo na marmaris anun a Labino, ra uniri i sa wanpat.” *Ais 61:1-2*

²⁰ I pul melet tar a buk ra, i pitar tari torom a tene pinapam tagun a rumu na lotu, ma i kis melet. A taro rop una rumu na lotu det tama dekdeki, ²¹ ma i watungi tandet lena, “A wasiso ri mot longoro i, uniri a sa pam sot pasi.”

²² Det rop det watung ulabo pasi, ma det kisin una nun a wakak na wasiso. Ra det iting lena, “A musano ri, a nutun o Josep, niko?” ²³ Ra i watungi tandet lena, “Kutiro mot in watung a wasiso elelar ri un iau: ‘Dokta, un ulangolango pas ui ut! A kum utna rop ra met longoro i lena u sa pam tari tiro o Kapernaum, i wakak ra un pami utkai nin una num a tamon.’” ²⁴ Ra o Iesu i watungi kai tandet lena, “A inanos mot nama lingmulus, katu poropet di ser gas pasi una nun a tamon ut. ²⁵ A lingmulus ut ra a susut na ula det kis tiro o Israel una kilalo ra o Elaija i kis tong, ra a tulu kilalo ma wonom na kalang ke bato, ma a labino munurak i monong a kum tamon rop. ²⁶ Ikut o God ke tulu o Elaija torom tu ino Israel, torom ara ula kut tagun a tamon Sarepat una papor Saidon. ²⁷ A susut na lepra det kis tong o Israel una kilalo anun a poropet Elisa, ikut o God ke ulangolango taio tagun det, o Neman kut a te Siria.”

²⁸ Ra det longoro a kum wasiso ri, a taro rop ra det kis una rumu na lotu, det kankan doko. ²⁹ Det katatur, ra det lu ru o Iesu tagun anundet a

tamon. Det dat pasi usapat una tangai ra di pam tar anundet a tamon uni, sur det in woro pirso i una papor wat. ³⁰ Ikut i wan kut epotor tan a kunur na taro, ra i wan mut gusun det.

O Iesu i lakro ru a laulau na nion gusun ara musano

(Mk 1:21-28)

³¹ Numur o Iesu i wan utong o Kapernaum, una papor Galili, ma una Bung na Sabat, i ususer a taro. ³² Ra det kisin una nun a kum etowo, uni i ususer det elar nam ara, ra a warkurai kura ut tano. ³³ Una rumu na lotu ara musano, a laulau na nion kura uni, i kakabo dekdek lena, ³⁴ “Ai! Iesu, a te Nasaret, u ling na pam asau un met? U wanpat sur un ban laulau met? A tasman ui, ui a Tasur na Musano anun o God.” ³⁵ O Iesu i sakbati lena, “Gong u wasiso! Pirso gusun a musano ra!” Ma a laulau na nion i woro pirso tari epotor tandet rop, i pirso gusuni, ma katu du pinino i laulau.

³⁶ A taro rop det kisin doko, ra det ting etetalai det lena, “A ngas na wasiso sau ri? A warkurai ma a dekdek kura ut tano, ra i ser wasiso tan a kum laulau na nion, ra det ser pirso mut.”

³⁷ Ra a wasiso un o Iesu i wan sarara utiro una kum tamon rop una papor ra.

O Iesu i ulangolango pas a susut na misait

(Mt 8:14-17; Mk 1:29-39)

³⁸ O Iesu i pirso gusun a rumu na lotu, ra i wan sur a rumu anun o Saimon. Ara ino a inumun o Saimon kura urumu, a pinino i mararong doko, ra det saring o Iesu sur in waruti. ³⁹ Ra o Iesu i tur

taru nisan a bano, ma i wasiso torom a misait, ra a mararong i rop gusuni. Ra i tur mut, ra i tabor det mo nama utna na inangon.

⁴⁰ Ra in matanas i ling na sup, a taro det ben pat det rop ra det misait nama kum wur ngas na misait torom o Iesu. Ma i ubek aru lamano netes un det taktakai, ra i ulangolango det rop. ⁴¹ Ma a kum laulau na nion kai det pirso gusun a susut, ra det kakabo lena, “Ui a Nutun o God.” Ra o Iesu i turbat det, sur gong det wasiso, uni det tasmani ut lena i a Karisito.

⁴² Ra i sa waspi, o Iesu i wan gusun a tamon ra, sur a nubual kalako taro uni. A kunur na taro det sisio suri. Ra det sa sio pasi, det ling na turbati sur gong mo i wan gusun det. ⁴³ Ikut i balu det lena, “An warawai nama Wakak na Wasiso una matanitu anun o God una ramano kum tamon gisen kai. Uni i a kibino ra di tulu ru iau urin.”

⁴⁴ Ra i warawai nanan una kum rumu na lotu una papor Judia.

5

A kum mugano nat na ususer anun o Iesu

(Mt 4:18-22; Mk 1:16-20)

¹ Ara bung o Iesu i tur nago na usalin una du tasi Genesaret, a taro det tur talilis bat pasi, sur det in longoro a wasiso anun o God. ² Ra i tama pas aru pot tiro iai una usalin, ra a kum tene woro uben det sa wan pas gusun der, kura det gos anundet a kum uben. ³ I kas taru un ara tagun der, a pot anun o Saimon, ra i inanosi sur in sugut

4:41: Mt 8:29; Mk 3:11-12

4:44: Mt 4:23

5:1: Mt 13:1-2;

Mk 3:9-10

lilik tar a pot usa utasi. Ra o Iesu i kis taru uni, ma i ususer a kunur na taro.

⁴ Ra i sa wasiso rop, i watungi tan o Saimon lena, “Mot in nan usa una dino ra i lamano, ma mot in woro anumot a kum uben sur lako kiripo.”

⁵ O Saimon i balu i lena, “Labino, met sa tol panai taru una kudulano mirum, ma ka met dat pas tin kiripo, ikut an woro melet tar a kum uben, uni ui u itula.” ⁶ Ra det sa woro tar a kum uben, det dat pas a susut na kiripo, ra anundet a kum uben milau in tararos. ⁷ Det kalu pas a kum paspasan det tagun ara pot kai sur det in warut det. Ra det wan torom det, ma det ubukus pas aru pot rop, ra der ling na murung mo. ⁸⁻¹⁰ O Saimon ma det ra det wan tomo nami det kisin una kum kiripo ra det dat pasi, lenkutkai ra torom aru paspasano, Jems ma o Jon, aru nutun o Sebedi. Ra o Saimon Pita i tama a utna ri, i puku nama urur tiro na kikin o Iesu ra i watungi tano lena, “Labino, wan gusun iau, iau a tene sakino.” O Iesu i balu i lena, “Gong u ngara. Turpasi uniri, un tene ben taro.” ¹¹ Ra det sa dat toto tar aru pot, det wan gusun anundet a kum utna rop, ma det mur o Iesu.

*O Iesu i ulangolango pas a lepra
(Mt 8:1-4; Mk 1:40-45)*

¹² O Iesu i kis un ara tamon, ma ara musano a pinino rop i bukus nama lepra, i wan toromi. Ra i tama pas o Iesu, i kis butkeke ma in masarino unago upiso, ma i saring dekdeki lena, “Labino, ke ngangitin torom ui. Ra u nemi, un ulangolango pas iau, sur an talapor umatan o God.” ¹³ O Iesu

i kodos a lamano, ma i pam a pinino ra i watungi tano lena, “A nemi ut, un langolango.” Uniutra a lepra i rop gusuni. ¹⁴ Ra o Iesu i wasiso dekdek taru toromi lena, “Gong u inanos tar taio nami. Un nan ma un ese mugu tar ui torom a tene etabor torom o God, ma un pitar a etabor torom o God elar nami ra o Moses i sa watung tari, sur un talapor umatan o God. Ra un pami lenra, a taro det in tasmani lena u sa langolango.” ¹⁵ Ikut a wasiso un o Iesu i wan sarara makai, ra a susut na taro det wan tomo sur det in longoro i, ma sur in ulangolango pas det gusun anundet a kum misait. ¹⁶ Ikut a susut na bung o Iesu i ser wan gisen, una nubual kalako taro uni, sur in wararing.

O Iesu i ulangolango pas a musano a pinino i mat

(Mt 9:1-8; Mk 2:1-12)

¹⁷ Ara bung ra o Iesu i ususer a taro, a kum Parisi ma a kum tene ususer tagun a Warkurai, kura det kis tomo nami. Det wanpat tagun a kum tamon rop una papor Galili ma una papor Judia, ma tagisapat o Jerusalem kai. Ma a dekdekin a Labino i kis un o Iesu sur in ulangolango a kum misait. ¹⁸ A ramano kum musano det los pat ara musano a pinino i mat, i inep taru kut una lu. Det lari sur det in ruk nami, ma det in inep tari numugu nisan o Iesu. ¹⁹ Ikut ka det ruk lar pas nami, uni a taro det bukus doko. Ra det ka nami usapat netes una rumu, det papok saro pas a nubual sapat netes, ra det unoro pirso tari tomo nama lu epotor nisan a kunur na taro sa numugu

tan o Iesu. ²⁰ O Iesu i tama anundet a nurnur, ra i inanos a musano a pinino i mat lena, “Pasang, di sa unus ru anum a kum sakino petutna.”

²¹ A kum tene ususer tagun a Warkurai ma a kum Parisi, det nuknuk doko lena, “Osi na ngas na musano ri? I watung laulau o God uni i wasiso lar i o God. Osi i elar sur in unus ru a kum sakino petutna? O God sot kut.” ²² O Iesu i tasman a nuknukin det, ra i ting det lena, “Sur asau ra mot nuknuk lenra? ²³ Osi na wasiso ra ke ngangitin sur an watungi? Pepetlai, an watungi lena, ‘Di sa unus ru anum a kum sakino petutna,’ o, an lena, ‘Un katutur, ma un nan?’ ²⁴ A wasiso ra an watungi, an watungi sur mot in tasmani lena, o God i pitar a warkurai torom a Nutun a Musano, sur in unus ru a kum sakino petutna nin upiso.” Ra i watungi torom a musano a pinino i mat lena, “A inanos ui, un katutur, un los anum a lu, ra un nan sur anum a rumu.” ²⁵ Uniutra i tur umatandet rop, i los pas anun a lu, ra i wan sur anun a rumu. Ra i wan i rakon lekeleke pas o God. ²⁶ Det rop det kisin doko, ra det rakon lekeleke pas o God. Det ngara doko, ra det watungi lena, “Uniri, dat tama a kum se utna i wanpat una nundat a tamtama.”

*O Iesu i kabo pas o Liwai
(Mt 9:9-13; Mk 2:13-17)*

²⁷ Numur tan a kum utna ri, o Iesu i wan tagitiro, ra i tama pas ara tene los takis, a risano o Liwai, ra i kis una rumu na los takis. O Iesu i watungi tano lena, “Un mur iau.” ²⁸ Ra o Liwai i

katatur ma i wan gusun anun a kum utna rop, ra i muri.

²⁹ Numur o Liwai i pam a labino inangon un o Iesu una nun a rumu. A susut na tene los takis ma ara taro kai det kis tomo nam o Iesu una inangon ra. ³⁰ Ikut a kum Parisi tomo nam anundet a kum tene ususer tagun a Warkurai, det pukus anun a kum nat na ususer ra det watungi lena, “Sur asau ra mot wangon ma mot inum tomo nama kum tene los takis ma a kum tene sakino?” ³¹ O Iesu i balu det lena, “A dokta ke wanpat sur det ra det langolango. Awu! I wanpat sur det kut ra det misait. ³² Ka wanpat sur an kabo pas a kum tene tokodos, awu! A wanpat sur an kabo pas a kum tene sakino sur det in nukpukus.”

A iting una winewel

(Mt 9:14-17; Mk 2:18-22)

³³ Ara taro det watungi tan o Iesu lena, “A kum nat na ususer anun o Jon det ser wewel ma det ser wararing, ma lenkutkai lar a kum nat na ususer anun a kum Parisi. Ikut anum a kum nat na ususer det wangon ma det inum kut.” ³⁴ O Iesu i balu det lena, “A kum paspasan a musano ra i nolin matok, det in wewel pepetlai, ra kura utmakai i tomo nam det? ³⁵ Ikut tu bung in nanpat, ra din ben ru i gusun det. Una kum bung ra, det in wewel maragom.”

³⁶ O Iesu i watungi kai ara wasiso elelar tandet lenri, “Katutaio in raros pas tu du malu tagun in matok na malu, sur in mabon tomo tari namin turai na malu. Ra in pami lenra, in raros laulau ru in matok na malu, ma a du matokino ka der in

tamtama elar nama du turaino. ³⁷ Ma kataio in titior a matok na wain utiro unin turai na koto, ra di pami namin pino meme, sako a matok na wain in busu ma in mubus ma in purus in nokoto na wain, ra a wain in tilingis, ma in nokoto na wain kai in laulau. ³⁸ Din titior a matok na wain ut utiro unin matok na koto na wain. ³⁹ Kataio ra in inum pas a turai na wain, in nem melet a matok na wain, in watungi kut lena, ‘A turaino ut i wakak.’”

6

O Iesu i a Labino tagun a Bung na Sabat (Mt 12:1-8; Mk 2:23-28)

¹ Un ara Bung na Sabat, o Iesu i wan nanan epotor una kum kinobot na wit. Anun a kum nat na ususer det kumut pas a ramano kum turunu wit, det gisgis pasi ma det wani. ² A ramano kum Parisi det iting lena, “Ilai sur mot pam a utna ri, ra ke tokodos elar nama warkurai tagun a Bung na Sabat?” ³ O Iesu i balu det lena, “Pepetlai, ka mot luki utmakai asau ra o Dewid i pami? Det nama taro ra det wan tomo det murak, ⁴ ra i ruk una rumu anun o God, i los pas a beret ra di sa pitar tari torom o God, i wani, ra i tabor det kai ra det wan tomo nami. A beret ra, a warkurai taguni, i lenri, a kum tene etabor kut torom o God det in nangon taguni, ma a taro oros awu.” ⁵ Ma o Iesu i watungi tandet lena, “A Nutun a Musano i a Labino tagun a Bung na Sabat.”

O Iesu i ulangolango pas a musano ra a lamano i kong

(Mt 12:9-14; Mk 3:1-6)

⁶ Un ara Bung na Sabat bulung, o Iesu i ruk una rumu na lotu, ma i ususer a taro. Ara musano kura iai, a sot na lamano i kong. ⁷ A kum Parisi ma a kum tene ususer tagun a Warkurai det sisio sur tu utna det in takun o Iesu nami. Det tamtama wakak taru ut uni, ra in ulangolango pas a musano ra una Bung na Sabat, o awu. ⁸ Ma o Iesu i tasman a nuknukin det ra i watungi tan a musano ra a lamano i kong lena, “Un tur! Ra un nan usa numugu tan a taro rop.” I katutur, ra i tur taru sa numugu tandet. ⁹ Ra o Iesu i watungi tandet lena, “An ting mot: Asau i tokodos sur din pami una Bung na Sabat? Din pam a wakakino o a laulau ino? Din ulaun taio, o din ban laulau taio?” ¹⁰ Ma i nas pukpukus det rop, ra i inanos a musano lena, “Kodos a lamam.” I kodosi, ra a lamano i tokodos melet. ¹¹ Ikut in balandet i sungun, ma det wasiso tomo sur tu ngas na utna det in pami un o Iesu.

O Iesu i pilok pas a noino ma aru aposel

(Mt 10:1-4; Mk 3:13-19)

¹² Ara bung, o Iesu i wan usapat una tangai sur in wararing. A bung na mirum rop ra, i wararing torom o God. ¹³ Ra i sa waspi, i kabo pas anun a taro na ususer toromi, ma i pilok pasi kut a noino ma aru tagun det, ra i urising det a kum aposel. ¹⁴ Iri a kum risandet: O Saimon, i ra o Iesu i urisingi nam o Pita, dersino nam o Endru, o Jems, o Jon, o Pilip, o Batolomiu, ¹⁵ o Matiu, o Tomas, o Jems a nutun o Alpius, o Saimon ara

tagun a kum Silot,* ¹⁶ o Judas a nutun o Jems, ma o Judas Iskariot i ra i usobor tar o Iesu.

*O Iesu i ususer a taro ma i ulangolango det
(Mt 4:23-25)*

¹⁷ Ra o Iesu tomo nama nun a taro na ususer det wan pirso tagisapat una tangai, i tur una elaro na nubual, tomo nam anun a kunur na taro na ususer. Ma a labino kunur na taro tagitong una papor Judia ma tagisapat o Jerusalem ma tagun a kum tamon nago korot utasi milau o Tair ma o Saidon kai, ¹⁸ det wanpat sur det in longoro i, ma sur in ulangolango pas det gusun anundet a kum misait. Ma i lakro ru a kum laulau na nion gusun det rop ra a kum laulau na nion det ban laulau det. ¹⁹ Ra a taro rop, det nemi sur det in pam a pinin o Iesu, uni a dekdek i pirso gusuni, ma i ulangolango pas det rop.

*A gasgas ma a tupunuk
(Mt 5:1-12)*

²⁰ O Iesu i tama anun a taro na ususer ra i watungi lena,

“Mot ra mot sibo, mot dan,
uni a matanitu anun o God, anumot!

²¹ Mot ra uniri mot murak, mot dan,
uni numur mot in masur.

Mot ra uniri mot tangis, mot dan,
uni numur mot in nongon.

²² Mot dan ra a taro det nget mot,
o det pilok ru mot
ma det watung laulau mot,

* **6:15:** Silot i a risan a taro, ra det tur tomo, uni det nemi sur det in lakro ru a gapman Rom. **6:21:** Tam 7:16-17; Sng 126:5-6; Ais 61:3 **6:22:** Jn 15:19; 16:2; 1 Pit 4:14

ma det ban laulau a risamot,
uni mot tagun a Nutun a Musano.

²³ “Una bung ra din pam a kum utna ri torom mot, mot in gas, mot in sirsirok nama gasgas, uni i labo sakit anumot a ikul sapat una langit. Uni a kum utna ri, a kum tumtubun det tagun numugu det sa pam tari torom a kum poropet.

²⁴ “Ikut in laulau torom mot a kum tene gongon,
uni mot sa rakon pas anumot a wakakino.

²⁵ In laulau torom mot ra uniri mot masur,
uni numur mot in murak.

In laulau torom mot ra uniri mot nongon,
uni numur mot in tupunuk ma mot in tangis.

²⁶ In laulau torom mot ra a taro rop det watung
ulabo pas mot,
uni a kum tumtubun det tagun numugu,
det pami lenri torom a kum torotoro na
poropet.

*A petutna na marmaris torom a kum ebar
(Mt 5:38-48)*

²⁷ “An watungi tamot ra mot longoro iau, mot in nem anumot a kum ebar, ma mot in pam a wakakino torom det ra det nget mot. ²⁸ Mot in watung udan det ra det saring o God sur in ban laulau mot, ma mot in wararing un det ra det ban laulau mot. ²⁹ Ra taio in pasor tar a papor wam, un pukus ara papor bulung toromi. Ra taio in ras pas anum a saket, un madek tari kai anum a siot tano. ³⁰ Un tabor det rop ra det saring ui. Ra taio in los pas tu utna anum, gong u saring meleti suri. ³¹ Asau ra mot nemi sur a taro det in pami torom mot, mot kai, mot in ser pami torom det.

³² “Ra mot nem det kut ra det nem mot, din watung ulabo pas mot pepetlai? Uni a kum tene sakino kai det nem etetalai det ut. ³³ Ra mot in pam a wakakino torom det ra det pam a wakakino torom mot, din watung ulabo pas mot pepetlai? Uni a kum tene sakino kai det ser pami lenra. ³⁴ Ra a taro det saring mot sur tu utna, ma mot pitari kut torom det, ra mot tasmani lena, det in balu i ut torom mot, din watung ulabo pas mot pepetlai? Uni a kum tene sakino kai det pitar tar a utna tan a kum tene sakino, ma det nuki lena det in balu i. ³⁵ Ikut mot in nem anumot a kum ebar, ra mot in pam a wakakino torom det. Ra a taro det nemi sur det in los pas tu utna munung gusun mot, mot in pitari kut, ma gong mot nemi sur det in balu i. Ra mot in pami lenra, anumot a ikul in labo sakit, ma mot a kum nutnutun o God a Labino Sakit, ra i ser maris det ra ka det ser watung wakak toromi, ma a kum tene sakino kai. ³⁶ Mot in lason una marmaris, elar nama Tamamot a tene marmaris.

Gong mot kuro tar taio
(Mt 7:1-5)

³⁷ “Gong mot takun tar taio, sako o God in takun mot. Gong mot kuro tar taio sur in los a warkurai na minabalu, sako o God in kuro mot ra mot in los a warkurai na minabalu. Mot in dumano ru a kum sakino petutna ra a taro det pami un mot, ma o God in unus ru anumot a kum sakino petutna. ³⁸ Mot in etabor, ma o God in tabor mot. Ikut a etabor anun o God torom mot in labo doko, ma din sogori, ma in bukus melet, ma in tilingis. Uni

asi na ngas na etabor ra mot pitari, i labo o i natino, i kut kai ra o God in pitar meleti torom mot.”

³⁹ O Iesu i watungi kai a wasiso elelar torom det lenri, “Tu pulu in ben lan taio kai ra i pulu? Pepetlai, der rop ka der in puku dorong un tin nutung? ⁴⁰ A nat na ususer ke labo taun anun a tene ususer. Ikut o naro ra i sa urop pas anun a etowo, in elar kut nam anun a tene ususer.

⁴¹ “Ilai ra u tama pasi kut a burbururup kura unin matan o tisim, ikut ko nuk pas a nuduwai pi kura ut unin matam? ⁴² Ra ko tama pas a nuduwai pi kura kut unin matam, un watung petlani torom o tisim lena, ‘Tising, an rakon ru a burbururup gusun in matam?’ Ui a tene torotoro, un los mugu ru a nuduwai pi gusun in matam, ra un tamtama wakak, sur un rakon ru a burbururup gusun in matan o tisim.

*A wasiso elelar una arin ngas na wino duwai
(Mt 7:16-20; 12:33-35)*

⁴³ “In wakak na duwai ken wu lako laulau na wino, ma in laulau na duwai kai ken wu lako wakak na wino. ⁴⁴ Din tama lele a kum duwai tagun a windet. Ka din git pas tin niwino fig tagun in kadas, ma in niwino wain tagun in suksuk. ⁴⁵ A wakak na musano i pam pat anun a wakak na petutna tagun a wakakino ra i kis una nun a nilaun, ma a laulau na musano kai, i pam pat anun a sakino petutna tagun a sakino ra i kis una nun a nilaun. Uni a wan a taro i watung puaso a petutna ra i bukus una nundet a nilaun.

*A wasiso elelar una aru ngas na tene pam rumu
(Mt 7:24-27)*

⁴⁶ “Ilai ra mot watung iau ‘Labino, Labino,’ ma ka mot pam asau ra a watungi tamot? ⁴⁷ Osi ra i wan torom iau ma i longoro anung a kum wasiso, ma i muri, i elar nama musano ra an inanos mot nami. ⁴⁸ I elar nama musano ra i pam tar a rumu. I kil dordorong a kum tung, ma i utur tar a kum pos ina rumu netes una wat. A lomom i wanpat, ma i sal tiro na rumu, ikut ke gunu lar pasi, uni di sa pam wakak tari. ⁴⁹ Ikut osi ra in longoro anung a kum wasiso ma ke muri, i elar nama musano ra i utur tar anun a rumu netes kut una piso, ma ke pam mugu tar a kibin a rumu. A lomom i sal taru uni, i toropo, ma i terege mut!”

7

*A nurnur anun ara mugumugu anun a kum tene
inaim tagitong o Rom
(Mt 8:5-13)*

¹ Ra o Iesu i sa watung rop tar a kum wasiso ri torom a taro, i wanpat tong o Kapernaum. ² Ara mugumugu anun a kum tene inaim tagitong o Rom i kis tiro iai. Ara tagun anun a kum tultul i misait, milau mo sur in mat. A tultul ri, i labo umatan anun a mugumugu. ³ A mugumugu anun a kum tene inaim i longoro a wasiso un o Iesu, ra i tulu ru a ramano kum mugumugu anun a taro Juda sur det in saringi, sur in nan toromi, ma in ulangolango pas anun a tultul. ⁴ Ra det wanpat torom o Iesu, det saring dekdeki lena, “A musano ra, a wakak na musano, i wakak ra un longoro i,

⁵ uni i maris dat a taro Juda, ma i kul tar anundat a rumu na lotu.” ⁶ Ra o Iesu i wan tomo nam det.

Det sa milau a rumu, ra a mugumugu anun a kum tene inaim i tulu ru a ramano kum pasasano torom o Iesu nama wasiso lena, “Labino, gong a utikidis ui, uni ka tokodos sur un ruk una nung a rumu. ⁷ Ka nuki kai lena a tokodos sur an nan torom ui. Ikut, un watung tu wasiso kut, ra anung a tultul in langolango. ⁸ Uni iau a musano ra a ser mur a warkurai anundet ra det labo tang, ma di pitar tar a warkurai kai tang sur an warkurai sur a taro na inaim. Ra an watungi tan taio lena, ‘Un nan,’ in nan kut. Ma torom taio kai lenri, ‘Un nan urin,’ in nan kut urin. Ma torom anung a tultul lena, ‘Un pam a utna ri,’ in pami kut.”

⁹ O Iesu i longoro anun a wasiso, ra i kisin doko uni, ma i tupukus torom a taro ra det muri, ra i watungi lena, “A watungi tamot lena, ka tama tar tu te Israel ra anun a nurnur i labo elar nama musano ri.” ¹⁰ Ma det ra di tulu tar det, det milet melet sur a rumu, ra det tama i lena a tultul ra, i sa langolango melet.

O Iesu i ulaun pas a nutun a ula

¹¹ Ke suano i kut, ra o Iesu i wan utong una tamon di watungi nam o Nain, ma anun a kum nat na ususer ma a labino kunur na taro kai det wan tomo nami. ¹² Ra i wanpat milau una matansako ina tamon, a taro Nain det los pirso ara minat, a barman, i ara sot kut a nutun ara ula. A susut na taro tagitong una tamon ra det wan tomo nama ula. ¹³ Ra a Labino i tama a ino ra, i marisi ma i watungi lena, “Gong mo u

tangis.” ¹⁴ I wan milau, ma i pam a lu ra di los a minat nami, ma a taro ra det los a minat det tur sikot. I watungi lena, “Barman, a watungi tam, un katutur.” ¹⁵ Ra a minat i katutur ma i wasiso. Numur o Iesu i pitar melet tari torom o nano.

¹⁶ A taro rop det kisin ma det ngara, ma det watung ulabo pas o God, ma det watungi lena, “A labino poropet i sa wanpat epotor tandat. O God i sa wanpat sur in warut dat, anun a taro.” ¹⁷ Ra a wasiso ri un o Iesu i wan sarara tong una papor Judia rop, ma a kum tamon milau kai.

O Iesu ma o Jon a Tene Baptaiso

(Mt 11:2-19)

¹⁸ A kum nat na ususer anun o Jon a Tene Baptaiso det inanosi una kum utna rop ri o Iesu i pami. O Jon i kabo pas aru tagun det, ¹⁹ ra i tulu ru der torom a Labino sur der in tingi lena, “Ui mo ra di wasiso mugu taru un ui lena, un nanpat, o met in kis langlang utmakai sur taio?”

²⁰ Ra der wanpat torom o Iesu, der watungi lena, “O Jon, a Tene Baptaiso i tulu ru mir torom ui, sur mir in ting ui lena, ‘Ui mo ra di wasiso mugu taru un ui lena, un nanpat, o met in kis langlang utmakai sur taio?’ ”

²¹ Una du bung ut ra, o Iesu i ulangolango pas a susut gusun anundet a kum ngunungut ma a kum misait, ma i lakro ru a kum laulau na nion gusun det, ma i utamtama pas a susut na pulu.

²² Ma i balu der lena, “Mur in millet melet, ma mur in inanos o Jon una sau ri mur sa tama tari, ma

7:15: 1 Kin 17:23; 2 Kin 4:36 **7:16:** Lk 1:68 **7:18:** Sng 40:7; Mal 3:1; Tam 1:8 **7:22:** Ais 35:5-6; 61:1; Lk 4:18

mur sa longoro tari: A kum pulu det sa tamtama, det ra a kikiindet i mat det sa wan tokodos, a kum lepra det sa langolango, a kum kutkut det sa longoro, a kum minat det sa laun, ma di warawai nama Wakak na Wasiso torom a kum sibo na taro. ²³ Osi ra i tama a kum utna ri a pami ma anun a nurnur ke puku, i sa dan.”

²⁴ Ra aru nat na ususer anun o Jon der wan, o Iesu i inanos a kunur na taro un o Jon lina, “Una bung ra mot wan una nubual kalako taro uni torom o Jon, asau ra mot tamtama suri? Kutiro in nere ra i erere una wuwu? Awu. ²⁵ Asau ra mot wan sur mot in tama i? A musano ra i emar nama kum wakak na malu? Awu. Tama i, det ra det ser emar nama kum wakak na malu, ma det dan nama kum wakak na utna, det ser kis una kum rumu na king. ²⁶ Asau ra mot wan sur mot in tama i? A poropet? Ma! A watungi tamot, o Jon i labo sakit taun a kum poropet. ²⁷ Di sa tumtumus taru uni, una Buk Tabu lina, ‘Tama i, iau an tulu ru anung a tene los wasiso sur in mugu tam,

i ra in waninar anum a kisapi numugu tam.’ *Mal 3:1*

²⁸ A watungi tamot, o Jon i labo sakit taun a taro rop taginin upiso. Ikut osi ra i natino sakit una matanitu anun o God, i labo taun o Jon.”

²⁹ Ra a taro rop det longoro i, ma a kum tene los takis kai, det mulaot una tokodos na kisapi anun o God, uni det sa los pas a baptais anun o Jon. ³⁰ Ikut a kum Parisi ma a kum tene ususer tagun a Warkurai det rosumur gusun a kisapi ra

o God i pitari torom det, uni ka det los a baptais anun o Jon.

³¹ Ma o Iesu i watungi lena, “An elaro a taro tagun uniri nama sau? Det elar nama sau? ³² Det elar nama kum nat liklik ra det kis una balano tamon ma det kakabo torom det etetalai lena, ‘Met wup tulal, ikut ka mot lagori, ma met kele a kelekele na tupunuk, ikut ka mot tangis.’

³³ O Jon a Tene Baptaiso i wanpat, ke wan tu wakak na utna ma ke inum a wain, ra mot watungi uni lena, ‘A laulau na nion kura uni.’ ³⁴ A Nutun a Musano i wanpat, i wangon ma i inum, ra mot watungi uni lena, ‘Tama i, a musano ri a tene inangon ma a tene ininum, a pasan a kum tene los takis, ma a kum tene sakino.’ ³⁵ Ikut a taro rop ra det mur a mananos anun o God, det upuaso i lena, anun a mananos i a mananos mulus.”

Ara ino i lingis in nopolo sangsangnain una ru kikin o Iesu

³⁶ Ara Parisi i ben pas o Iesu sur det in nangan tomo. O Iesu i ruk una rumu anun a Parisi, ma i kis sur der in nangan. ³⁷ Ma ara ino tagitiro una tamon ra, a tene sakino. Ra i sa tasmani lena, o Iesu kura i wangon una rumu anun a Parisi, i ruk namin nopolo sangsangnain ra kura unin nokoto ra di pami nama wat. ³⁸ Ma i tur taru numur tan o Iesu, nisan aru kikino. I tangis, ra a lurlur na matano i puku una ru kikin o Iesu, ma i wus

der nama iwu na lorino, i gom der, ma i lingis in nopolo sangsangnain un der.

³⁹ A Parisi ra i ben pas o Iesu i tama a utna ri, i nuki lena, “Ra a musano ri a poropet mulus, in tasman a ino ri ra i pam aru kokino, ma in tasmani kai a magirano, lena i a sakino ino.” ⁴⁰ O Iesu i watungi tano lena, “Saimon, a nem na watung ara utna tam.” Ma i balu i lena, “Tene Ususer, un watungi kut.”

⁴¹ O Iesu i watungi tano lena, “Aru musano der dinau pas a mani tan ara musano, ara pasander i dinau pas a limo na mar ma ara kai a limo na noino. ⁴² Ka der balu lar pas a dinau, uni katu mani tander. Ra a musano ra, i watungi tander lena, ‘Gong mukut mur balu anumur a dinau.’ Osi na pasander anun a marmaris in labo sakit torom o naro ra i pitar tar a mani tander?” ⁴³ O Saimon i balu i lena, “Kutiro i ra i dinau pas a labino mani sakit gusuni.” O Iesu i watungi tan o Saimon lena, “I tokodos anum a minabalu.”

⁴⁴ O Iesu i ger unago numur torom a ino, ma i watungi tan o Saimon lena, “Tama a ino ri. Ra a ruk una num a rumu ko pitar tar a danim sur din gos aru kiking nami. Ikut, a ino ri, i gos aru kiking nama lurlur na matano, ma i wus sengesenge der nama iwu na lorino. ⁴⁵ Ko ukinalong anum a gasgas nama egom torom iau, ikut a ino ri ke mana u gom aru kiking turpasi ut ra a wanpat nin. ⁴⁶ Ko talus in loring nam lako wel, ikut a ino ri i lingis tar in nopolo sangsangnain una ru kiking. ⁴⁷ I mo ra a watungi tam lena, anun a labino marmaris torom iau i ese i lena, o God i sa unus ru anun a susut na sakino petutna. Ikut

osi ra o God i unus ru i kut anun a nat na sakino petutna, anun a marmaris kai in natino.”

⁴⁸ Ra o Iesu i watungi tan a ino ra lena, “Di sa unus ru anum a kum sakino petutna.” ⁴⁹ A taro ra det kis tomo una inangon, det wasiso torom det etetalai lena, “Osi na ngas na musano ri, i pet lar pasi sur in unus ru a kum sakino petutna?”

⁵⁰ O Iesu i watungi tan a ino ra lena, “Una num a nurnur ut, di sa ulaun pas ui. Un nan nama malmal.”

8

A wardain ra det wan tomo nam o Iesu

¹ Numur o Iesu i wan nanan una kum lamlabino tamon ma a kum natnat na tamon rop, ma i warawai nama Wakak na Wasiso una maʔanitu anun o God. I wan tomo nama nun a noino ma aru nat na ususer, ² ma a kum wardain kai, ra i sa lakro ru tar a kum laulau na nion gusun det, ma i sa ulangolango pas det gusun a kum misait. Iri a kum risandet: O Maria, ara risano kai o Magdalen, i ra a wonom mawit na laulau na nion det pirso pas gusuni, ³ ma o Joana a ino anun o Kusa, i a mugumugu anun a kum tultul anun o Erod, ma o Susana, ma a susut kai. A wardain ri det warut o Iesu ma anun a kum nat na ususer, nam anundet a kum ululeng ut.

A wasiso elelar una tene minarut (Mt 13:1-17; Mk 4:1-12)

⁴ Ra a labino kunur na taro tagun a kum tamon det wanpat tomo torom o Iesu, i watung ara wasiso elelar torom det lena, ⁵ “A tene minarut

i wan sur in sapro a kum pitino wit. Ra i sapro nanan a kum pitino wit, a ramano det puku una kisapi, ra a taro det papas netes uni, ma a kum piko kai det wan ru i. ⁶ A ramano kai det puku una nubual na watat. Det lubang pat, ra det main melet kut, uni a piso i sengesenge doko. ⁷ A ramano kum pitino wit det puku epotor una kum kuikui, ra a kum kuikui det lubang tomo nam det, ma det rau bat pas det. ⁸ A ramano kum pitino kai det puku una wakak na piso. Det lubang pat ra det wu. Tektekene i wu ara mar na wino.”

Ra i sa watung tar a kum wasiso ri tandet, i watungi lena, “Osi ra arin talngano kura, i wakak sur in longoro nami.”

⁹ Anun a kum nat na ususer det tingi sur a kukurai ina wasiso elelar ri. ¹⁰ Ma i watungi tandet lena, “O God i sa pitar tar a mananos tamot, sur mot in talapor una kum wasiso na pidik una nun a matanitu. Ikut torom a taro gisen a ususer det nama kum wasiso elelar, sur ‘det in tamtama ma det in tamtama, ikut ka det in tama lele i,
det in longoro ma det in longoro, ikut ka det in tasmani.’ *Ais 6:9*

O Iesu i palos a kukurai ina wasiso elelar una tene minarut

(Mt 13:18-23; Mk 4:13-20)

¹¹ “A kukurai ina wasiso elelar ri i lenri, a pitino wit i elar nama wasiso anun o God. ¹² A kum pitino wit ra det puku una kisapi, det elar nama taro ra det longoro a wasiso, ra o Satan i wanpat, ma i rakon ru a wasiso gusun in balandet, sur

gong det nurnur, ma gong di ulaun det. ¹³ Ra a kum pitino ra det puku una nubual na watat, det elar nama taro ra det longoro a wasiso, ra det pam ukai i nama gasgas. Ikut kalako wakakorin det, anundet a nurnur ke tur suano i. Ra a kum larlar i wanpat torom det, det puku. ¹⁴ A kum pitino ra det puku epotor una kum kuikui, det elar nama taro ra det longoro a wasiso, ikut a labino nuknuk una kinkinis anundet, a kum ululeng, ma a gasgas tagun a nilaun nin upiso, det rau bat a wasiso anun o God, ra ka det wu lako windet. ¹⁵ Ikut a kum pitino ra det puku una wakak na piso, det elar nam ara taro ra det longoro a wasiso, ma a balandet i wakak ma i tokodos, ra det pam ukai dekdek a wasiso ra det muri tuk det wu a windet.

A wasiso elelar una lam
(Mk 4:21-25)

¹⁶ “Katutaio in ungangon tar tu lam ma in wop bat tari nama paket, o in ubek tari kai nago utuntudu ina kabulu. Awu! In ubek tari ut netes una nun a turtur, sur det ra det ruk det in tama a talapor. ¹⁷ Uni a kum utna rop ra i kis eno, numur in nanpat puaso. Ma a kum utna rop ra kura i parau, numur din tasmani ma in kis talapor. ¹⁸ I mo ra mot in nuknuk wakak una wasiso ra mot longoro i. Osi ra i pam ukai a mananos una wasiso anun o God, din tabor meleti nama labino. Ma osi ra ke pam ukai tu mananos una wasiso anun o God, din rakon ru i utkai asau lik ra i nuki lena i pam ukai i.”

O nan o Iesu ma a kum tistisino
(Mt 12:46-50; Mk 3:31-35)

¹⁹ O nan o Iesu ma a kum tistisino det wanpat sur det in tama i, ikut ka det pet lar pasi, unì a kunur na taro det tur talilis bat pasi. ²⁰ Ra di inanos o Iesu lena, “O nam ma a kum tistisim kunago det tur nago upiso. Det nem na tama ui.” ²¹ Ra i balu det lena, “Det ra det longoro a wasiso anun o God ma det muri, det ra o nang ma a kum tistising.”

O Iesu i turbat a wuwu ma a top
(Mt 8:23-27; Mk 4:35-41)

²² Ara bung o Iesu tomo nama nun a kum nat na ususer, det kas una pot, ra i watungi tandet lena, “Dat nan utong una ara papor tasi.” Ra det wan. ²³ Ra det kalabor nanan nama sel, o Iesu i inep dumun. A dekdek na wuwu i ragoti una du tasi, ra a top i walwalkas, ma milau det in iru. ²⁴ A kum nat na ususer det wan toromi, det wangun pasi, ma det inanosi lena, “Tene Ususer, Tene Ususer, dat na iru!” I katatur, i turbat a wuwu ma a dekdek na top, ma der mana, ra i mililo rop. ²⁵ Ma i watungi torom a kum nat na ususer lena, “Awai kuti anumot a nurnur?” Det ngara, ma det kisin, det ting etetalai det lena, “Osi na ngas na musano mulus ri? I wasiso torom a wuwu ma a top, ra der mur anun a wasiso!”

O Iesu i lakro ru a kum laulau na nion gusun
ara musano
(Mt 8:28-34; Mk 5:1-20)

²⁶ O Iesu ma a kum nat na ususer det wan tagitong una papor Galili, ra det sot una papor anun a taro Gerasa, tiro un ara papor du tasi

Galili. ²⁷ Ra o Iesu i sirok gusun a pot, ara musano tagun a tamon ra i wan barato i. A kum laulau na nion kura uni. I sa suano i, ma ke ser pipis, ma ke kis kai un tu rumu, i ser kis kut una kum kulam na minat. ²⁸ Ra i tama pas o Iesu, i kukukuk, ma i puku pirso taru nisan aru kikino, ma i kukukuk namin labino walngano lena, “Iesu, a Nutun o God a Labino Sakit, asau ra u nem na pami un iau? A saring ui, gong u ukadik iau.” ²⁹ I wasiso lenri, uni o Iesu i sa wasiso dekdek taru torom a laulau na nion sur in pirso gusun a musano ri. A susut na dino a laulau na nion i solsolongi. A taro ra det ser tamtamabati, det ser ker ukai aru lamano ma aru kikino nama sen, ikut i ser rubut det kut, ma a laulau na nion i ser ungongos pasi usapat una kum nubual kalako taro uni.

³⁰ O Iesu i tingi lena, “A risam osi?” Ma i balu i lena, “A risang A Kabo Liur,” uni a susut na laulau na nion det sa ruk taru uni. ³¹ Ma det saring o Iesu sur gong i tulu ruk tar det unin labino tung ra katu tuktukino.

³² A kabo liur na boro kura det wangon tiro una tangai. Ra a kum laulau na nion det saring o Iesu sur det in ruk taru una kum boro. Ra i mulaot ru det. ³³ Ma a kum laulau na nion det pirso gusun a musano ra, ma det ruk taru una kum boro. A kum boro det kalabor pirso una palis sur a du tasi, ra det kongo rop.

³⁴ A taro ra det ser tabor a kabo liur na boro, det tama a utna ri, det kalabor ma det inanos tiro utamon ma tiro utkai una kum natnat na tamon. ³⁵ Ra a taro det wan sur det in tama asau ra i wanpat. Det wanpat torom o Iesu, det tama a musano ra a kabo liur na laulau na nion det pirso

pas gusuni. Kura mukut i kis taru nisan aru kikin o Iesu, i sa pipis pas ma a nuknukino i sa talapor melet. Ma a taro ra det ngara doko. ³⁶ Det ra det sa tama tari, det inanos a taro lena, o Iesu i sa lakro ru a kum laulau na nion gusun a musano ra. ³⁷ Ma a taro rop tagitiro una papor anun a kum Gerasa det saring o Iesu sur in nan gisen gusun det, uni det ngara doko. Ra o Iesu i kas melet una pot ma i wan.

³⁸ A musano ra a kum laulau na nion det sa pirso taru gusuni, i saring o Iesu sur in nan tomo nami. Ikut o Iesu i tulu ru i kut lena, ³⁹ “Un milet melet sur anum a tamon, ma un wasiso una labino utna ra o God i sa pam tari un ui.” Ra i milet melet, i wasiso una tamon ra, una labino utna ra o Iesu i sa pam tari uni.

O Iesu i ulaun pas a nutun o Jairus ma i ulangolango pas ara ino

(Mt 9:18-26; Mk 5:21-43)

⁴⁰ O Iesu i milet melet, a kunur na taro det gas pasi, uni det rop det kis langlang ut suri. ⁴¹ Ara musano, a risano o Jairus, a mugumugu tagun a rumu na lotu, i wanpat ra i kis butkeke sa numugu tan o Iesu. I saring dekdeki sur in nan usa una nun a rumu, ⁴² uni ara nutunulik kut, a ino, anun a kilalo a noino ma aru, i sa ling na mat.

Ra o Iesu i wan, a labino kunur na taro det talilis bat pasi. ⁴³ Ara ino kura i misait nama gap elar nama noino ma aru kilalo,* ikut kataio i ulangolango lar pasi. ⁴⁴ I wan numur tan o

* **8:43:** Una ramano kum du buk una wasiso Grik, a ramano kum wasiso kai i kis una vers ri. I lenri: *ma i sa urop tar anun a mani una kum dokta.*

Iesu, ma i tulán tar a sinisir ina saket anunu, ma uniutra a gap i tuk. ⁴⁵ Ma o Iesu i iting lena, “Osi ra i tulán iau?” Ra det rop det ipul, o Pita i watungi lena, “Labino, ko tama a labino kunur na taro ri det talilis bat pas ui?” ⁴⁶ Ikut o Iesu i watungi lena, “Ara pasandet i sa tulán tar iau, uni a tasmani lena, a dekdek i sa wan gusun iau.” ⁴⁷ A ino i tasmani lena di sa sio pasi, ra i neneder pat, i wan ma i puku sa numugu tan o Iesu. Umatan a kunur na taro rop, i inanos o Iesu una kibino ra i tulán tari, ma i inanosi kai lena uniutra i langolango. ⁴⁸ Ma o Iesu i watungi tano lena, “Nutunglik, anum a nurnur i sa ulangolango pas ui. Un nan nama malmal.”

⁴⁹ Ra o Iesu i wasiso utmakai, ara i wan tagitiro una rumu anun o Jairus, a mugumugu tagun a rumu na lotu, ra i watungi tan o Jairus lena, “O nutumlik i sa mat. Gong mo u ubalon a tene ususer.” ⁵⁰ Ra o Iesu i longoro a wasiso ra, i watungi tan o Jairus lena, “Gong u ngara. Un nurnur kut, ra din ulaun melet pasi.”

⁵¹ Ra i wanpat una rumu, ke madek taio sur in ruk tomo nami. I ben pasi kut o Pita, o Jon ma o Jems, ma a taman a inolik ma o nano kai. ⁵² A taro rop det kukukuk ma det domos, ra o Iesu i watungi tandet lena, “Gong mot domos. A inolik ri awu sur i mat, i inep dumun kut.” ⁵³ Ikut det urongon kut un o Iesu, uni det tasmani lena, i sa mat. ⁵⁴ Ra o Iesu i pam a laman a inolik, ra i inanosi lena, “Nutunglik, un katatur.” ⁵⁵ Ra a niono i milet melet toromi, uniutra i katatur. Ra o Iesu i inanos det sur det in tabor a inolik nam

lako utna na inangon. ⁵⁶ O tamano ma o nano der kisin doko, ikut o Iesu i turbat der sur gong der inanos tar taio un asau ra i wanpat.

9

*O Iesu i tulu ru a noino ma aru nat na ususer
(Mt 10:5-15; Mk 6:7-13)*

¹ O Iesu i kabo tomo pas a noino ma aru nat na ususer, ra i pitar a dekdek ma a warkurai tandet sur det in lakro ru a kum laulau na nion rop, ma sur det in ulangolango pas a taro gusun a kum misait. ² Ma i tulu ru det sur det in warawai una matanitu anun o God, ma det in ulangolango pas a kum misait. ³ Ma i watungi tandet lena, “Gong mot los tu utna una numot a inawan, gong tin nubuku, gong tu rat, gong lako utna na inangon, gong lako mani ma gong kai tin namalu na kelkeles. ⁴ Ra mot in nanpat tiro un tu rumu, mot in kis ut tiro iai tuk una bung ra mot in nan gusun a tamon ra. ⁵ Ra lako taro ka det in gas pas mot, ra mot in nan gusun anundet a tamon, mot in tang ru a kubus gusun a kikimot, sur a ukinalong na utumarong torom det.*”

⁶ A kum nat na ususer det wan tuptupukus una kum tamon, det warawai nama Wakak na Wasiso, ma det ulangolango pas a taro una kum tamon rop.

*A nuknukin o Erod i talara un o Iesu
(Mt 14:1-2; Mk 6:14-16)*

9:3: Lk 10:4-11 * **9:5:** A ukinalong ra, a kum Parisi det ser muri, ra det wan gusun a nubual anun a taro ra awu sur a taro Juda. Iri a utumarong torom det ra det rosumur gusun a wasiso anun o God.

⁷ O Erod a mugumugu tagun a gapman i longoro a kum utna ri i wanpat, ra i talara a nuknukino uni, uni ara taro det watungi lena o Jon i sa laun melet gusun a minat. ⁸ Ma ara taro kai det watungi lena o Elaija i sa wanpat. Ara taro kai det watungi lena ara tagun a kum poropet tagun numugu i sa laun melet. ⁹ Ikut o Erod i watungi lena, “A sa tau kutus ru tar in kabaran o Jon, ma iri, osi na musano melet ri, a longoro a kum utna ri uni?” Ra i nem doko i sur in tama o Iesu.

*O Iesu i tabor a limo na arip na musano
(Mt 14:13-21; Mk 6:30-44; Jn 6:1-14)*

¹⁰ A kum aposel det millet melet, ra det inanos o Iesu una kum utna ra det sa pam tari. I ben pas det kut, ra det wan gisen sur a tamon a risano o Betsaida. ¹¹ Ikut, a kunur na taro det longoro i, ra det muri. I gas pas det, ra i wasiso torom det una matanitu anun o God, ma i ulangolango pas det ra det misait.

¹² Ra i sa lirop, a noino ma aru nat na ususer det wan torom o Iesu, ra det inanosi lena, “Un tulu ru a kunur na taro sur det in nan sur a kum lamlabino tamon milau, ma a kum natnat na tamon kai, sur det in nangon ma det in inep iai, uni a nubual ri i bakbak gusun a kum tamon.”

¹³ O Iesu i balu det lena, “Mot ut mot in tabor det.” Ra det balu i lena, “A limanin beret sot kut, ma arin kiripo kuri met losi. Kutiro u nemi sur met in kul pas lako utna sur in elar nama kunur na taro rop ri?” ¹⁴ A kunur na taro ra, a niluluk ina kum musano kut i elar nama limo na arip.

I watungi tan anun a kum nat na ususer lena, “Mot in tulu det sur det in kis tomo a limlimo na noino det.” ¹⁵ Ra a kum nat na ususer det pami lenutra, ma a taro rop det kis. ¹⁶ O Iesu i los pas a limanin beret ma arin kiripo, i tamtama usapat una langit, i watung wakak pas torom o God uni, i tibiki ra i pitari tan a kum nat na ususer, sur det in tibo a taro nami. ¹⁷ Det rop det wangon ma det masur. Numur det song bukus pas a noino ma aru rat nama utna ra det wangon kopos pas uni.

*O Pita i wasiso talapor un o Iesu
(Mt 16:13-19; Mk 8:27-29)*

¹⁸ Ara bung ra o Iesu sot kut i wararing, a kum nat na ususer det kis milau tari, ra i ting det lena, “A taro det watung iau nam osi?” ¹⁹ Det balu i lena, “Ara taro det watung ui o Jon a Tene Baptaiso. Ara taro det watung ui o Elaija, ma ara taro kai det watung ui, ara tagun a kum poropet tagun numugu, ra i sa laun melet.” ²⁰ Ra i ting det lena, “Ma mot, mot watung iau nam osi?” Ra o Pita i balu i lena, “Ui a Karisito ra o God i tulu ru ui.” ²¹ Ra i turbat dekdek det sur gong det inanos tar taio nami.

*O Iesu i wasiso mugu una nun a minat
(Mt 16:20-28; Mk 8:30-9:1)*

²² O Iesu i watungi lena, “A Nutun a Musano in taramo a susut na mamaut. A kum mugumugu, a kum lamlabino tene etabor torom o God, ma a kum tene ususer tagun a Warkurai det in rosumur gusuni ma din um doko i. Ra a tulu bung in rop, in katutur melet.”

²³ Ra i watungi tandet rop lona, “Ra taio i nemi sur in mur iau, gong i mur a nuknukino. In los pas anun in nanai kutus una kum bung rop ma in mur iau. ²⁴Uni osi ra i maris bat anun a nilaun in iru, ikut osi ra in iru, uni i tagun iau, in laun. ²⁵Osi ra in utur ukai a kum ututna rop taginin una rakrakon bual, ma in ban laulau anun a nilaun uni, ma in iru tukum, in wakak pepetlai toromi? ²⁶Osi ra in maimai un iau ma una nung a kum wasiso, a Nutun a Musano kai in maimai uni, ra in nanpat tomo nama nun a minamar, ma a minamar anun o Tamano ma anun a kum ensel anun o God. ²⁷A inanos mot nama lingmulus, lako taro tagun mot ri mot tur nin, ka mot in mat utmakai, ra mot in tama a matanitu anun o God.”

*A pinin o Iesu i senene
(Mt 17:1-8; Mk 9:2-8)*

²⁸ Ra i sa tiwal na bung bat tar a wasiso ri, o Iesu i ben pas o Pita, o Jon ma o Jems, ma det wan toto usapat una tangai sur det in wararing. ²⁹I wararing, ra in masarino i tamtama senene, ma anun a kum malu kai i kabang doko ma i pilpil. ³⁰Ma i wasiso tomo nam aru musano, o Moses der nam o Elaija. ³¹Der wanpat nama minamar, ma detul wasiso una minat anun o Iesu, ra in etoromi sapat o Jerusalem, sur in pam sot pas a nemnem anun o God. ³²O Pita detul, detul inep dumun. Ra detul tuangun pat, detul tama a minamar anun o Iesu, ma aru musano kai ra der tur tomo nami. ³³Aru musano der nem na wan mo gusun o Iesu,

9:23: Mt 10:38; Lk 14:27 **9:24:** Mt 10:39; Lk 17:33; Jn 12:25

9:26: Mt 10:33; Lk 12:9 **9:31:** Lk 9:22 **9:32:** 2 Pit 1:16-18

ra o Pita i watungi tano lena, “Tene Ususer, i wakak ra dat in kis nin. Metul in pam lako tulu turturup, ara anumi, ara anun o Moses, ma ara kai anun o Elaija”. Ikut o Pita ke tasman asau ra i watungi.

³⁴ Ra i wasiso utmakai, a du bakut i wanpat ma i pulus bat pas det, ra detul ngara ra a bakut i pulus bat det. ³⁵ Ma in nalngan ara tagisapat una bakut i watungi lena, “Iri a Nutunglik, ra a sa pilok pasi. Mot in longoro i.” ³⁶ Ra i wasiso rop pas, o Iesu sot mukut kura i. Ma ka detul wasiso uni. Ma una kum bung ra, ka detul inanos tar taio una kum utna ra detul sa tama tari.

O Iesu i lakro ru a laulau na nion gusun ara natlik

(Mt 17:14-18; Mk 9:14-27)

³⁷ Una bung numur, o Iesu ma a tulu nat na ususer det wan pirso tagisapat una tangai, ma a labino kunur na taro det etorom nam o Iesu. ³⁸ Ra ara musano tagun det i kakabo lena, “Tene Ususer, a saring ui sur un tama o nutunglik a nat musano, i ara sot kut. ³⁹ A laulau na nion i ser solsolongi, ma a nat i ser kisin ma i kukukuk. A laulau na nion i ser gunu dekdeki, ma a wano i ser busu. A laulau na nion ke wan gusuni, ma i ungungut laulau a pinino. ⁴⁰ A saring anum a kum nat na ususer sur det in lakro ru i, ikut ka det pet lar pasi.”

⁴¹ O Iesu i balu i lena, “Mot a taro tagun uniri, ka mot nurnur ma mot a kum tene sakino. A sa kis suano i tomo nam mot. Nangisin mo mot in nurnur? Un ben a nutumlik urin.”

⁴² Ra a nat i wan nanan utmakai torom o Iesu, a laulau na nion i woro piso tari una piso ma i gunu dekdeki. O Iesu i wasiso dekdek torom a laulau na nion ra i lakro ru i, ra a nat i langolango melet. Numur i pitar melet tari torom o tamano. ⁴³ Ma det rop det kisin una dekdekin o God.

*O Iesu i wasiso melet una nun a minat
(Mt 17:22-23; Mk 9:30-32)*

Ra det kisin utmakai una kum utna ra o Iesu i sa pam tari, i watungi tan anun a kum nat na ususer lena, ⁴⁴ “Mot in longoro wakak a wasiso ri: Din pitar a Nutun a Musano ulaman a taro.” ⁴⁵ Ikut ka det talapor una kukurai ina wasiso ri. Di munu i kut gusun det, sur gong det talapor uni. Ma det ngara sur det in ting o Iesu uni.

*Osi ra i labo sakit
(Mt 18:1-5; Mk 9:33-37)*

⁴⁶ A kum nat na ususer det engaras epotor tandet sur osi tagun det ra in labo taun det. ⁴⁷ O Iesu i sa tasman a nuknukin det, i los pas ara natlik ma i utur tari tiro nisano. ⁴⁸ Ma i watungi tandet lena, “Osi ra in gas pas a natlik ri una risang, i gas pas iau ut. Ma osi ra in gas pas iau, i gas pasi utkai o naro ra i tulu ru iau urin. Uni i ra i natino tamot rop, i ut ra i labo sakit.”

*Osi ra ke turbat mot i warut mot
(Mk 9:38-40)*

⁴⁹ O Jon i watungi tan o Iesu lena, “Tene Ususer, met tama ara musano i lakro ru a kum laulau na nion nama risam, ra met lari sur met in turbati,

uni i awu sur tagun dat.” ⁵⁰ O Iesu i balu i lena, “Gong mot turbati, uni osi ra ke turbat mot, i warut mot.”

A taro Samaria ka det nem o Iesu

⁵¹ Ra i sa milau a du bung sur din los pas o Iesu usapat una langit, a nuknukino i dekdek sur in nan usapat o Jerusalem, ma i turpas a inawan.

⁵² I tulu ru ara taro, sur det in mugu tano. Det wanpat un ara tamon una papor Samaria, sur det in waninar sur o Iesu. ⁵³ Ikut a kum te Samaria ka det nemi sur in ruk una nundet a tamon, uni in nan ut usapat o Jerusalem.† ⁵⁴ Ra anun aru nat na ususer, o Jems ma o Jon der tama a petutna ri, der iting lena, “Labino, u nemi sur mir in saring o God sur in pitar ru a sungun sur in nan rop ru det?” ⁵⁵ O Iesu i ger tupukus, ma i turbat der. ⁵⁶ Ra o Iesu tomo nama nun a kum nat na ususer det wan sur ara tamon gisen.

*Det ra det nem na mur o Iesu
(Mt 8:19-22)*

⁵⁷ Ra o Iesu ma anun a kum nat na ususer det wan nanan una kisapi, ara musano i watungi tano lena, “An mur ui una kum nubual rop ra un nan iai.” ⁵⁸ Ra o Iesu i watungi tano lena, “A kum lomlom na pap anundet a kum tung ut, ma a kum piko kai anundet a kum pios ut, ikut a Nutun a Musano katu rumu na ininep.” ⁵⁹ I watungi tan ara musano bulung lena, “Un mur iau.” Ikut i balu i lena, “Labino, un mulaot ru iau munung

9:50: Mt 12:30; Lk 11:23 † **9:53:** A kum te Samaria det ser lotu torom o God una nundet a rumu na etabor sapat una Tangai Gerasim. Ikut o Iesu i wan usapat o Jerusalem sur in lotu. **9:54:** 2 Kin 1:9-16

sur an nan, an por ru tar o tita.” ⁶⁰ Ikut o Iesu i watungi tano, “Un madek ru a kum minat det in por anundet a kum minat. Ikut ui, un nan ma un warawai nama matanitu anun o God.” ⁶¹ Ara melet i inanos o Iesu lena, “Labino, an mur ui, ikut un mulaot ru iau munung sur an nan, ma an wasiso na itula taru munung torom det una nung a rumu.” ⁶² O Iesu i watungi tano lena, “Osi ra in turpas a pinapam na kilkil piso, ma i ger unago numur, ke topasi a pinapam una matanitu anun o God.”

10

O Iesu i tulu ru a wonom mawit na noino ma aru musano

¹ Numur a Labino i pilok pasi bulung a wonom mawit na noino ma aru musano kai, ma i tulu ru det aruru sur det in mugu tano una kum labino tamon, ma una kum tamon liklik, ra numur in nan iai. ² Ra i watungi tandet lena, “A kinobot i sa makus, ma i sa labo doko, ikut kalako susut na tene pasong. I mo ra mot in saring a Labino, i ra a taman a kinobot, sur in tulu ru a kum tene pasong sur ana kinobot. ³ Mot in nan! A tulu ru mot elar nama kum sipsip epotor tan a kum ngalngalia na pap. ⁴ Gong mot los tu paus na umubek mani, gong tu rat, ma gong tu su. Gong kai mot wasiso taio ra mot etoromi una kisapi.

⁵ “Ra mot in nanpat tiro un tu rumu, mot in inanos mugu det lena, ‘A malmal torom mot.’ ⁶ Ra tu tene malmal in kis tiro iai, anumot a malmal in

kis uni. Ra awu, anumot a malmal in milet melet torom mot. ⁷ Mot in kis ut tiro iai una rumu ra, mot in nangon ma mot in inum una utna ra di tabor mot nami, uni i tokodos sur din tabor a tene pinapam. Gong mot inep karkarai.

⁸ “Ra mot in nanpat un tu tamon, ma din ben ruk mot, mot in nan a utna ra di tabor mot nami. ⁹ Mot in ulangolango a kum misait tiro iai, ma mot in inanos tar a taro lena, ‘A matanitu anun o God i sa milau nisamot!’ ¹⁰ Ra mot in nanpat un tu tamon, ra ka di ben ruk mot, mot in tur kut una kisapi ma mot in watungi lena, ¹¹ ‘A kubus tagun anumot a tamon, ra kuri una kum kikimet, met tang melet ru i sur a utumarong torom mot. Ikut mot in tasmani lena, a matanitu anun o God i sa milau.’ ¹² A watungi tamot, una bung na warkurai, a warkurai torom a tamon ra, in laulau doko taun a warkurai torom a taro Sodom.

A warkurai na minabalu torom det ra ka det nukpukus

(Mt 11:20-24)

¹³ “In laulau torom mot a taro Korasin, ma in laulau kai torom mot a taro Betsaida. Ra gunuk di sa pam tar a kum utna na ukisin ri torom a taro Tair ma o Saidon, elar nami ra a sa pam tari torom mot, kanapi det in nukpukus lakit ma det in tobo, det in emar nama kum malu na tupunuk ma det in talus a pinindet nama kubus na sungun. Ikut mot, ka mot nukpukus. ¹⁴ A warkurai torom mot a taro Korasin ma o Betsaida, in laulau doko taun a warkurai torom a taro Tair ma o Saidon.

¹⁵ Ma mot kai a taro Kapernaum, pepetlai, mot nuki lena din ulabo pas mot usapat netes? Awu, din woro pirso ru mot kut una labino sungun.

¹⁶ “Osi ra in longoro mot, i longoro iau ut. Ma osi ra in rosumur gusun mot, i rosumur gusun iau utkai. Ma osi ra i rosumur gusun iau, i rosumur utkai gusun o naro ra i tulu ru iau urin.”

A wonom mawit na noino ma aru det milet melet

¹⁷ A wonom mawit na noino ma aru det milet melet nama gasgas ma det watungi lena, “Labino, ra met lakro ru a kum laulau na nion nama risam, det pirso kut.” ¹⁸ O Iesu i watungi tandet lena, “A tama o Satan i puku tagisapat una langit elar namin nememe. ¹⁹ Tama i, a sa pitar tar a dekdek tamot sur mot in pas watwat a kum sui ma a kum bukalo kai, ma sur mot in winim pas a dekdekin a ebar, ma katu utna in ban laulau mot. ²⁰ Ikut, gong mot gas, uni a kum laulau na nion det mur anumot a wasiso. Mot in gas, uni di sa tumus tar a risamot sapat una langit.”

O Iesu i gas

(Mt 11:25-27; 13:16-17)

²¹ Una du bung ra, o Iesu i bukus nama gasgas tan a Tokodos na Nion ma i watungi lena, “Tita, ui a Labino tagun a langit ma a rakrakon bual rop. A watung ulabo pas ui, uni u munu a kum utna ri tan a kum tene mananos ma det ra det tastasman, ma u upuaso i kut, torom det ra det

10:16: Mt 10:40; Lk 9:48; Jn 5:23 **10:18:** Jn 12:31; Tam 12:8-9

10:19: Sng 91:13; Mk 16:18 **10:20:** Pil 4:3; Tam 3:5

elar nama kum nat liklik. A lingmulus, Tita, uni anum a nemnem i lenutra.

²² “O Tita i sa pitar tar a kum utna rop torom iau. Katutaio i tasman o Nutunu, o Tamano kut i tasmani, ma kataio kai i tasman o Tamano, o Nutunu kut i tasmani, ma det kai ra o Nutunu i nemi sur in upuaso o Tamano torom det.”

²³ Ra o Iesu ma anun a kum nat na ususer mukut det kis, i tupukus torom det ra i watungi lena, “Mot dan ra mot tama a kum ututna ri! ²⁴ A inanos mot, numugu a susut na poropet ma a susut na king det nem doko i sur det in tama a kum utna ri a pami umatamot, ikut ka det tama i. Ma det nem doko i kai sur det in longoro a kum utna ri mot longoro i, ikut ka det longoro i.”

A wasiso elelar una wakak na te Samaria

²⁵ Ara tene mananos tagun a Warkurai i katutur ra i lar o Iesu, ra i tingi lena, “Tene Ususer, asau ra an pami sur an rakon a nilaun tukum?” ²⁶ Ra o Iesu i balu i lena, “Asau ra di sa tumus tari una Warkurai? Asau u nuki uni?” ²⁷ I balu i lena, “Un nem a Labino anum a God namin balam rop, a niom rop, a dekdekim rop, ma a nuknukim rop.’

Lo 6:5

Ma ‘Un nem o pasam elar nami ra u nem ui ut.’ ”

Wkp 19:18

²⁸ O Iesu i watungi tano lena, “I tokodos ut anum a minabalu, un pami ut lenra, ra un laun.” ²⁹ Ikut a tene ususer tagun a Warkurai i nemi sur in ukodos pasi umatan o Iesu, ra i tingi lena, “Osi ra a pasang?”

³⁰ O Iesu i balu i lenri, “Ara musano i wan tagisapat o Jerusalem utong o Jeriko. Ra i wan nanan, a kum tene wolong det kalabor bat pasi. Det palos ru anun a kum malu, ma det um laulau tari, ra det wan pas gusuni ma milau mo sur in mat. ³¹ Ara tene etabor torom o God i wan una kisapi ra, i tama pas a musano ra, ra i wan liliias kut gusuni una ara papor. ³² Lenkutkai, ara musano bulung tagun a kabotaro Liwai, i wan taru una musano ra, ra i wan liliias kut gusuni una ara papor kisapi.

³³ “Ikut ara te Samaria i wan nanan, i wan taru una musano ra, ra i tama i, i maris doko i. ³⁴ I wan toromi, i lingis tar a wel ma a wain una nun a kum inangon ma i pulus bat tar det. I ukas pasi una nun a dongki, ra i usirok tari una rumu na usiro, ra i tamtamabati. ³⁵ Una bung numur tano, i los pas aru denaria*, i pitar tari torom a taman a rumu, ma i watungi tano lena, ‘Un tamtamabati. Ra an milet melet, an balu melet asau kai ra u tabor tari nami.’

³⁶ “Osi tagun a tulu musano ri der pasano nama musano ra a kum tene wolong det um tari?” ³⁷ Ra a tene ususer tagun a Warkurai i balu i lena, “O naro ra i marisi.” Ra o Iesu i watungi tano lena, “Un nan ma un pami lenutra.”

O Iesu i kis una rumu anun o Maria ma o Mata

³⁸ O Iesu ma anun a kum nat na ususer det wan nanan, ra det wanpat un ara tamon, ra ara ino, a risano o Mata, i ben pas o Iesu utiro una nun a rumu. ³⁹ Ma ara tisino kai, a ino, a risano o Maria,

* **10:35:** Ara denaria i elar nama ikul anun ara musano tagun ara bung ra i papam. **10:39:** Jn 11:1; 12:2-3

i kis nisan aru kikin a Labino, ma i longoro anun a wasiso. ⁴⁰ Ikut o Mata i taramo i ra i dekdek toromi a kum pinapam ra i pami, i wan torom o Iesu ra i watungi tano lena, “Labino, ko nuk pas iau? Tama i, a tising a ino ke warut iau. Iau mukut a pam a kum pinapam. Tulu ru i sur in warut iau.” ⁴¹ A Labino i balu i lena, “Mata, Mata, u nuknuk doko sur a susut na utna! ⁴² Ara utna kut i labo sakit sur a nuknukim in kis uni. O Maria i sa pilok pasi, ma katutaio ut in los ru i gusuni.”

11

A etowo anun o Iesu una niaring

(Mt 6:9-13; 7:7-11)

¹ Ara bung o Iesu i wararing un ara nubual. Ra i sa wararing rop, ara tagun anun a kum nat na ususer i watungi tano lena, “Labino, un ususer met nama niaring, elar nam o Jon i ususer anun a kum nat na ususer.” ² Ra o Iesu i watungi tandet lena, “Ra mot in wararing, mot in wararing lenri, ‘Tamamet, i wakak ra din ru a risam. I wakak ra anum a matanitu in nanpat.

³ A kum bung rop un tabor met nam amet a utna na inangon.

⁴ Un unus ru anumet a kum sakino petutna, uni met kai met dumano ru anundet a kum sakino petutna torom met.

Gong u ben met una ululam.’ ”

⁵ O Iesu i watungi tan anun a kum nat na ususer lena, “Ra taio tagun mot in nan torom tu pasano una labino mirum, ma in saringi lena, ‘Pasang, a

nem lako tulin beret munung, ⁶ uni ara pasang i wanpat torom iau una nun a inawan ut, ra kalako utna sur an tabori nami.’ ⁷ Ra a pasano kura urumu in watungi lena, ‘Gong u ubalon iau! Met sa tagar, ma met nama kum nutnutung liklik met sa inep. Kan pirso melet mo sur an los tar tu utna tam.’ ⁸ A inanos mot, in pirso sur in pitar tar a beret tano, awu sur i kibino ra der pasano, awu, i kibino uni i sasaring liklik ut.

⁹ “A watungi tamot, mot in sasaring, ra din tabor mot, mot in sisio, ra mot in sio pasi, mot in pinpidik, ra din papos pas mot. ¹⁰ Uni det rop ra det sasaring din tabor det, ma osi ra i sisio in sio pasi, ma osi kai ra i pinpidik, din papos pasi. ¹¹ Osi na pasamot a kum tamtaman a kum nat liklik, ra o nutunulik in saringi sur tin kiripo, in tabori kut namin nusui? ¹² O, ra in saringi sur tin nikiau, in tabori kut nama bukalo? ¹³ Mot a laulau na taro, ikut mot tasmani ut a wakak na etabor sur mot in tabor a kum nutnutu mot nami. Ra mot ser pami lenra, i lingmulus sakit lena, osi ra in saring a Tamamot ra i kis sapat una langit, in tabori ut nama Tokodos na Nion.”

O Iesu ma o Belsebul
(Mt 12:22-30; Mk 3:20-27)

¹⁴ O Iesu i lakro ru a laulau na nion ra i ngat gusun ara musano. Ra a laulau na nion ra i pirso gusuni, a musano ra i wasiso maragom. Ma a kunur na taro det kisin. ¹⁵ Ikut ara taro tagun det, det watungi lena, “I ser lakro ru a kum laulau na nion nama dekdekin o Belsebul, a labino anun a kum laulau na nion.”

¹⁶ A ramano taro kai det lar o Iesu sur in pam tu ukinalong sur in ese i lena, i tagisapat una langit. ¹⁷ Ikut o Iesu i sa tasman a nuknukin det, ra i watungi tandet lena, “Ra tu gapman det melet ut det in waim etalai, a gapman ra in rop kut. Ma ra lako taro tagun tu rumu det in waim etalai melet kut, det in nan sarara. ¹⁸ Ra o Satan in waim melet kut nam anun a kum tultul, anun a gapman in tur dekdek pepetlai? A watungi lenri, uni mot watungi un iau lena, a lakro ru a kum laulau na nion nama dekdekin o Belsebul. ¹⁹ Ikut, ra iau, an lakro ru a kum laulau na nion nama dekdekin o Belsebul, anumot a taro, det ser lakro ru a kum laulau na nion nama dekdekin osi? Anundet a pinapam ut in upuaso i lena anumot a etakun ke lingmulus. ²⁰ Ikut, ra an lakro ru a kum laulau na nion nama dekdekin o God, in ese i lena a matanitu anun o God i sa wanpat torom mot.

²¹ “Ra ara dekdek na musano i sa emar pas nam anun a kum utna na inaim, ra i tamtamabat anun a rumu, anun a kum utna in kis wakak. ²² Ikut, ra taio ra i dekdek tauni in nanpat toromi ma in winim pasi, in ras ru anun a kum utna na inaim ra i nurnur taru uni, ma in los pas anun a kum utna rop, ma in tabor a taro nami.

²³ “O naro ra ka mir tar pasano mir ebar. Ma o naro ra ke warut iau u eben, i lu sarara ru a taro kut.

A laulau na nion i milet melet
(Mt 12:43-45)

²⁴ “Ra tu laulau na nion in pirso pas gusun tu musano, in nan una kum nubual ra kalako danim

iai, sur in mana, ikut ken sio pas tu nubual sur in mana uni. Ra in watungi lena, ‘An milet melet sur anung a rumu, ra a sa pirso pas gusuni.’²⁵ Ra in nanpat, in tama i ra di sa surupu tari, ma di sa ukodos tari.²⁶ Numur in nan, ra in ben melet pas a wonom mawit na laulau na nion, ra det laulau sakit tano, ma det in ruk rop taru una rumu ra, ma det in kis uni. Ma a nilaun anun a musano ra in laulau sakit taun a nilaun ra numugu i utur ukai i.”

Det ra det dan

²⁷ Ra o Iesu i wasiso utmakai, ara ino tagun a kunur na taro ra, i watungi lena, “A ino ra i usus pas ui ma i ugu ui, i dan.”²⁸ O Iesu i balu i lena, “Ikut det ra det longoro a wasiso anun o God ma det muri, det dan sakit.”

A taro det sasaring sur tu ukinalong (Mt 12:38-42)

²⁹ Ra a kunur na taro det bukus nanan, o Iesu i watungi tandet lena, “A taro tagun uniri, a sakino taro. Det tamtama sur tu ukinalong, ikut ka din pam taio torom det. Din pam a ukinalong kut elar nami ra di sa pam tari un o Jona.³⁰ Uni o Jona i a ukinalong torom a taro Niniwe, ma lenkutkai ra a Nutun a Musano in nanpat a ukinalong torom a taro tagun uniri.³¹ Una bung na warkurai, a kwin tagitong una matmatano tobar in tur ma in takun dekdek a taro tagun uniri, uni i wan ut tagitiro bakbak sur in longoro a mananos anun o king Solomon, ma o naro ra i labo taun o Solomon

kuri ut nin, ikut ka mot longoro i. ³² Una bung na warkurai, a taro Niniwe det in tur ma det in takun dekdek a taro tagun uniri, uni det nukpukus una warawai anun o Jona, ma o naro ra i labo taun o Jona kuri ut nin, ikut ka mot longoro i.

*A lam tagun a pinindat
(Mt 5:15; 6:22-23)*

³³ “Katutaio in ungangon tar tu lam ma in munu tari, o in wop bat tari nama paket. Awu! In ubek tari ut netes una nun a turtur, sur det ra det ruk det in tama a talapor. ³⁴ Arin matam der elar nama lam una pinim. Ra arin matam der wakak, a pinim rop in bukus nama talapor. Ikut ra der laulau, a pinim rop in bukus nama dumirum. ³⁵ Un tumarong, sako a talapor ra kura un ui in dumirum. ³⁶ Ra a pinim rop in bukus nama talapor, ma katu dumirum uni, in talapor rop, elar nama lam ra a talaporino i sisio un ui.”

*O Iesu i upuaso a kum niraro anun a kum Parisi
ma a kum tene ususer tagun a Warkurai
(Mt 23:1-36; Mk 12:38-40; Lk 20:45-47)*

³⁷ Ra o Iesu i sa wasiso rop, ara Parisi i ben pasi sur det in nangon tomo. O Iesu i ruk ma i kis sur in nangon. ³⁸ Ma a Parisi ra, i tama i lena o Iesu ke gos mugu pas a lamano, ra i kisin uni. ³⁹ Ra a Labino i watungi tano lena, “Mot a kum Parisi mot ser gos pasi kut a surun a kap ma a pelet, ikut a balamot i bukus nama petutna na ungonos pas a utna tan taio ma a kum sakino petutna. ⁴⁰ Mot a kum longlong! Ka mot tasmani lena, o naro ra i

pam a surun a kum utna, i pami utkai a balandet?
⁴¹ Mot in tabor a kum sibo na taro nama utna ra kura ubalan anumot a kum kap ma a kum pelet, sur katu dur kura un mot umatan o God.

⁴² “In laulau doko torom mot a kum Parisi. Mot nuknuk doko sur a kum natnat na warkurai lenri, mot pitar in tekteken nanai torom o God tagun a noino natnat na duwai ra i sangsangnain wakak tagun anumot a kinobot, ikut ka mot pam a tokodos na warkurai torom a taro ma ka mot nem o God. I wakak sur mot in pam a tokodos na warkurai torom a taro ma mot in nem o God, ma gong kai mot dumano ru in tektekene tagun a noino, sur mot in pitari torom o God. ⁴³ In laulau doko torom mot a kum Parisi, uni mot nem a kinkinis na labino sa numugu una kum rumu na lotu. Ma mot nemi kai sur a taro det in pitar a labino urur torom mot una kum nubual na inawan tomo. ⁴⁴ In laulau doko torom mot, uni mot elar nama kum tung na minat ra katu ukinalong un det, ma a taro det wanan sapat netes un det ma ka det tasmani*.”

⁴⁵ Ara tagun a kum tene ususer tagun a Warkurai i watungi tan o Iesu lena, “Tene Ususer, ra u watungi lenri, u watung laulau met kai.” ⁴⁶ Ra o Iesu i balu i lena, “In laulau doko kai torom mot a kum tene mananos tagun a Warkurai, uni mot pitar tar a kum warkurai ra i ngangitin sur a taro det in muri, ma mot ut, ka mot warut det uni. ⁴⁷ In laulau doko torom mot, uni a kum tumtubu mot tagun numugu det um doko ru a kum poropet,

* **11:44:** A Warkurai anun a taro Juda i watungi lena, ra taio in nan sapat netes una tamon na minminat, in dur umatan o God.

ma mot utur a kum aim nisan a kum kulam na minat anundet, ikut ka mot mur anundet a wasiso. ⁴⁸ Lenra mot upuaso i lena, mot mulaot tomo nama kum tumtubu mot tagun numugu una nundet a pinapam ra det um doko a kum poropet, uni det um doko det, ma mot, mot utur a kum aim nisan a kum kulam na minatindet. ⁴⁹ I mo ri a kibino, o God ra i mananos doko i watungi lena, 'An tulu ru a kum poropet ma a kum aposel torom a taro. A taro det in um doko lako taro tagun det, ma det in ukadik lako taro kai tagun det.' ⁵⁰ I mo ra mot a taro tagun uniri, din pitar a warkurai na minabalu torom mot, una gapin a kum poropet rop, ra di sa um doko tar det, turpasi ut una turturkibin a rakrakon bual. ⁵¹ Turpasi ra di um doko o Abel ma i wan tuk ra di um doko o Sekaraia†, i ra i iru epotor nisan a kabulu na tuntun etabor ma a rumu na etabor. A watungi tamot, din pitar a warkurai na minabalu torom a taro tagun uniri una kum utna rop ri. ⁵² In laulau doko torom mot a kum tene mananos tagun a Warkurai, uni mot rakon ru a ki tagun a matansako sur a mananos. Mot ut ka mot ruk uni, ma mot turbat det ra det nem na ruk uni."

⁵³ Ra o Iesu i pirso gusun a rumu ra, a kum tene ususer tagun a Warkurai ma a kum Parisi det kankan doko ma det ting pukpukusi una susut na utna. ⁵⁴ Ra det kis langlang o Iesu sur tu ngas na wasiso sur det in takuni nami.

† **11:51:** O Sekaraia i ara poropet tagun numugu. Kutiro i a poropet ra di tumtumus uni un 2 Stori 24:20-22. Awu sur a taman o Jon a Tene Baptaiso.

12

O Iesu i utumarong det gusun a torotoro (Mt 10:26-27)

¹ A ararip na taro det sa wanpat tomo, ra det isugut etalai det mukut, ra o Iesu i watung mugu i torom anun a kum nat na ususer lena, “Mot in tumarong una is anun a kum Parisi. A wasiso una nundet a petutna na torotoro. ² A kum utna rop ra di rakup bat tari, numur in kis talapor, ma a utna rop ra i kis eno, numur in nanpat puaso. ³ Asau ra mot sa watung tari una dumirum, numur din longoro i una waspi, ma asau ra mot wasisik eno taru nami tiro urumu, numur din tur sapat netes una rumu, ma din watung puaso i.

Mot in ngara kut sur o God (Mt 10:28-31)

⁴ “A watungi tamot a kum paspasang: Gong mot ngaran det ra det um doko i kut a pinindi. Ra det sa pam len tari ra, ka det in pet lar pasi sur det in pam melet tu utna kai. ⁵ Ikut an inanos kapo mot un o naro ra mot in ngara suri: Mot in ngara sur o naro ra a dekdekino i labo sur in um doko mot, ma in woro ru mot una labino sungun kai. A lingmulus a watungi tamot, o God kut ra mot in ngara suri. ⁶ Di ser kul a limanin nipiko liklik nama nat na mani kut, niko? Ikut o God ken dumano ru tinolik tagun det. ⁷ I lingmulus sakit, o God i sa luk rop tar a kum tekteken iwu na lorimot, ma i sa tasman tari. Gong mot ngara, uni mot labo sakit umatan o God taun a susut na piko.

*Osi ra i upuaso o Iesu ma osi ra i ipul ru i
(Mt 10:32-33; 12:32; 10:19-20)*

⁸ “A watungi tamot, osi ra in watung puaso i umatan a taro lena, i tagun iau, a Nutun a Musano kai in watung puaso i umatan a kum ensel anun o God lena, i tagun iau. ⁹ Ikut osi ra in ipul ru iau umatan a taro, a Nutun a Musano kai in ipul ru i umatan a kum ensel anun o God. ¹⁰ Det ra det in watung tar tu sakino wasiso una Nutun a Musano, din unus ru i kut, ikut osi ra in wasiso laulau una Tokodos na Nion, ka din unus lar pasi. ¹¹ Ra din dat pas mot sur a warkurai una kum rumu na lotu, ma umatan a kum tene warkurai ma a kum mugumugu, gong mot nuknuk bing sur asau ra mot in balu lako kum etakun nami, o asau ra mot in watungi. ¹² Uni una du bung ut ra, a Tokodos na Nion ut in ususer mot un asau ra mot in watungi.”

A wasiso elelar una tene gongon ra ke mananos

¹³ Ara tagun a kunur na taro i watungi tan o Iesu lena, “Tene Ususer, un inanos o tisinglik sur in isuaro a kum ululeng un mir, ra a tamamir i sa mat pas gusuni.” ¹⁴ Ra o Iesu i balu i lena, “Le, osi ra i ubek tar iau sur an tene warkurai ma sur an isuaro anumur a kum ululeng torom mur?” ¹⁵ Ra i watungi tandet, “Mot in nuk pasi, ma mot in tumarong mot gusun a nemnem sur a susut na ululeng, uni a nilaun anun taio ken kibino pas tagun anun a susut na ululeng.”

¹⁶ Ra i inanos det una ara wasiso elelar lenri, “A kinobot anun ara tene gongon i wu a susut na

wino. ¹⁷ Ma i nuknuk lena, ‘Asau an pami? Uni katu rumu ra an ubek a win anung a kinobot uni.’
¹⁸ Ra i watungi lena, ‘An pami lenri, an rege ru anung a kum rumu na umubek tomo, ma an pam melet lako kum lamlabino, ra an ubek rop a win anung a kinobot ma anung a ululeng uni. ¹⁹ Ra an watungi tan a niong lena, “A niong, anum a kum ululeng i susut doko, sur in kis lako susut na kilalo. Un mana, un nangon, un inum ma un gas.”
 ’ ²⁰ Ikut o God i watungi tano lenri, ‘Ui a longlong! Uniutri una mirum, un mat! Osi mo in los a kum ululeng ra u sa ubek tomo tari sur ui?’ ²¹ In lenra torom det ra det ubek tomo a ululeng sur det ut, ikut ka det gongon umatan o God.”

A nurnur un o God
 (Mt 6:25-34)

²² O Iesu i watungi torom anun a kum nat na ususer lena, “I mo ra a watungi tamot lena, gong mot nuknuk doko una numot a nilaun sur asau ra mot in nani, ma una pinimot kai sur asau ra mot in emar nami. ²³ Uni a nilaun i labo taun a utna na inangon, ma a pinindi kai i labo taun in namalu. ²⁴ Mot in tama a kum kotkot. Ka det marut tu utna, ma ka det pasong tomo lako utna, katu rumu na umubek anundet, ikut o God i ser tabor det. Ma mot, mot labo doko taun a kum piko. ²⁵ Ra taio tamot in nuknuk doko una nun a nilaun, pepetlai, in pet lari sur in tugus walos lilik anun a nilaun? Awu! ²⁶ Ra ka mot in pam lar pas a utnalik ri, sur asau ra mot nuknuk doko sur lako kum utna kai?

²⁷ “Mot in tama a kum purpur tagisa ubual, ra det lubang pepetlai. Ka det papam ma ka det ser pam malu. Ikut a watungi tamot, a ememar rop anun o king Solomon ut i tamtama wakak bing, ikut ke tamtama wakak elar nama kum purpur ra. ²⁸ O God i mar a kum wuliso sa ubual nama kum wakak na purpurindet, ra i puspus uniri, ra markan din tun ru i una sungun. Ra i pami lenra una kum wuliso, i lingmulus ut ra in mar mot utkai. Anumot a nurnur i natino doko. ²⁹ Gong mot nuknuk doko sur asau ra mot in nani, ma asau ra mot in inumi, ma gong mot ngara suri. ³⁰ Uni a taro nin una rakrakon bual ra ka det nurnur, det ser dekdek sur a kum utna rop ri, ikut a Tamamot i tasmani lena mot sibo sur a kum utna ri. ³¹ Mot in sisio sur anun a matanitu, ra in tabor mot nama kum utna ri.

A wakak na ululeng sapat una langit
(Mt 6:19-21)

³² “A nat na kunur na sipsip, gong mot ngara, uni a Tamamot i sa gas sur in pitar tar a matanitu torom mot. ³³ Mot in siuru anumot a kum ututna sur a mani, ma mot in tabor a kum sibo na taro nami. Mot in waninar pas anumot lako kum paus ra ken moroto, a wakak na ululeng sapat una langit ra ke ser rop, ma katu tene wolong in nan milau i, ma a koropos ken ban laulau i. ³⁴ Uni a nubual ra anumot a wakak na ululeng i kis iai, anumot a nilaun rop in kis uni.

A kum tultul ra det waninar

³⁵ “Mot sa emar pas, ma mot sa ungangon pas anumot a kum lam, gong mot dumun, mot in kis

na waninar mukut. ³⁶ Ma mot in elar nama kum tultul ra det kis langlang sur anundet a labino ra in millet melet tagun a lukaro na nolin. Ra in nanpat ma in pinpidik, uniutra det in papos pasi. ³⁷ Ra a labino in nanpat, ma anun a kum tultul det sa waninar, det dan. A inanos mot nama lingmulus, in emar pas sur in pam anun a pinapam, ma in ukis tar det nisan a kabulu na inangon ma in tabor det. ³⁸ Ra in nanpat kai torom det una labino mirum, o una lar, ma det in kis langlang ut suri, a kum tultul ra det in dan. ³⁹ Mot in tasman a utna ri: Ra a taman a rumu in tasman a du bung ra a tene wolong in nanpat uni, ken madek ru anun a rumu sur din wolongi. ⁴⁰ Mot kai, mot in koikoi taru, uni a Nutun a Musano in nanpat una du bung ra ka mot nuki lena in nanpat uni.”

A lingmulus na tultul ma a tultul ra ke lingmulus

(Mt 24:45-51)

⁴¹ O Pita i ting o Iesu lena, “Labino, u watung a wasiso elelar ri un met kut, o una taro rop?”

⁴² A Labino i balu i lena, “A tene tamtamabat ra i lingmulus una nun a pinapam ma i mananos kai, anun a labino in ukis tari sur in mugumugu anun a kum tultul, sur in ser tabor det nama andet a utna na inangon una kum du bung na inangon.

⁴³ A tultul ra, in dan ra anun a labino in nanpat ma in tama i ra i pam sot pas anun a pinapam.

⁴⁴ A inanos mot nama lingmulus, anun a labino in ubek tari sur in tene tamtamabat una nun a kum utna rop.

⁴⁵ “Ikut, ra a tultul i nuki lena, anun a labino ken nanpat lakit, ra i turpasi sur in um a kum tultul na musano ma a kum tultul na ino, ma in nangon, ma in inum ma in sipak. ⁴⁶ Anun a labino in nanpat un tu bung o tu du bung ra a tultul ke tasmani, ma ke nuki lena in nanpat uni. Ra a labino in tau kutkutusi, ma in pitar tar a warkurai na minabalu toromi, sur in kis tomo nam det ra ka det nurnur.

⁴⁷ “Tu tultul ra i sa tasman tar a nemnem anun a labino anunu, ikut ke waninar, ma ke papam elar nami ra a anun a labino i nemi, din taktakalo dekdeki. ⁴⁸ Ikut tu tultul ra ke tasman asau ra anun a labino i nemi, ma i pam a utna ra ke tokodos, din rapus liliki kut. Ma torom taio ra di pitar tar a susut tano, din nemi kai lako susut ut gusuni, ma osi ra di ubek tar a susut ulamano, din tingi ut sur lako susut.

A kinkinis sarara
(Mt 10:34-36)

⁴⁹ “A wanpat sur an tagol tar a sungun una rakrakon bual, ma a nem doko i lena i sa wangon. ⁵⁰ Anung a baptais na ngunungut kura utmakai sur din baptaiso iau nami, ma iri a los a tarai na maut tuk ut ra din pam sot pasi. ⁵¹ Pepetlai, mot nuki lena a wanpat sur an pitar a malmal una rakrakon bual? Awu, a wanpat sur a taro det in kis sarara. ⁵² Turpasi uniri, a limo det una ara rumu det in kis sarara, atul detul ut, ma aru tander ut. ⁵³ Det in kis sarara, a musano gusun o nutunulik a musano, ma a nat musano gusun o tamano. A ino gusun o nutunulik a ino, ma a

inolik gusun o nano, ma a nolin na ino gusun o tubunu, ma a tubunu gusun o tubunu.”

A taro ka det mananos una kum utna ra i wanpat uniri

(Mt 16:2-3)

⁵⁴ O Iesu i wasiso melet torom a kunur na taro lena, “Ra mot tama a bakut una matmatano lubur, uniutra mot watungi lena, ‘Milau mo sur in bato,’ ma i lingmulus ut. ⁵⁵ Ra a tobar i wuwu pat, mot watungi lena, ‘A suan in dekdek,’ ma i lingmulus ut. ⁵⁶ Mot a kum tene torotoro! Mot mananos sur mot in palos a tamtama ina rakrakon bual ma a bakut. Ma pepetlai ra ka mot mananos sur mot in palos a kukurai ina kum utna ra i wanpat una kum bung ri?

Un umarom pas anum a ebar

(Mt 5:25-26)

⁵⁷ “Ilai ra mot ut ka mot tamtama wakak sur asau ra i tokodos? ⁵⁸ Ra anum a ebar in ben pas ui sur a warkurai, un dekdek sur mur in emarom mugu ra mur wan nanan utmakai una kisapi, sako in dat pas ui torom a tene warkurai. Ra a tene warkurai in pitar tar ui torom a polis, ma a polis in uruk tar ui una karabus. ⁵⁹ A inanos ui, kon pirso lar pas tuk ut ra un pitar rop ru a ururop na toia ina num a kunukul.”

13

Un nukpukus sako un iru

¹ Una bung ra, ara taro det inanos o Iesu un ara taro Galili ra a kum tene inaim anun o Pailat det um doko det, ra kura ut det tun a etabor torom o

God. ² O Iesu i balu det lena, “Pepetlai, mot nuki lena, det a kum tene sakino doko taun a taro Galili rop, uni det iru lenra? ³ Awu! Ikut an inanos mot, ra ka mot in nukpukus gusun anumot a kum sakino petutna, mot kai mot in iru rop.

⁴ “Ma asau mo mot nuki una noino ma tiwal na taro sapat o Jerusalem ra a rumu lekeleke tiro o Siloam i toropo ma i um doko rop ru det? Pepetlai, det a kum tene sakino doko taun det rop ra det kis sapat o Jerusalem? ⁵ Awu! Ikut an inanos mot, ra ka mot in nukpukus gusun anumot a kum sakino petutna, mot kai mot in iru rop.”

A wasiso elelar unin nanai na fig ra kalako wino

⁶ Numur o Iesu i watung a wasiso elelar ri torom det, “Ara musano anunu in nanai na fig i tur epotor una ana kinobot na wain. I wan ra i tamtama sur lako wino, ikut kalako wino.

⁷ Numur i inanos a tene tamtamabat tagun a kinobot ra lena, ‘Una tulu kilalo ri a tamtama sur lako win in nanai na fig ri ma kalako. Un tau ru i! Uni i urop a inangon tagun a piso.’ ⁸ Ikut a tene tamtamabat ra i balu i lena, ‘Labino, un madek tari munung ara kilalo melet ri, sur an kil talilis in kibino, ma an ubek a wakak na piso uni. ⁹ Ra in wu una kilalo sapat, in wakak. Ra awu, un tau ru i mo.’ ”

O Iesu i ulangolango ara ino una Bung na Sabat

¹⁰ Un ara Bung na Sabat o Iesu i ususer a taro un ara rumu na lotu. ¹¹ Ara ino kura iai, a laulau na nion kura uni. In surunu i tulukun a noino ma tiwal na kilalo, ma ke tur tokodos lar pas. ¹² O

Iesu i tama i, ma i watungi toromi lena, “Le, u sa langolango gusun anum a misait.” ¹³ Ra o Iesu i ubek tar aru lamano sapat netes uni, uniutra i tur tokodos mut, ra i watung ulabo pas o God.

¹⁴ A mugumugu tagun a rumu na lotu i kankan, uni o Iesu i ulangolango pas a ino ra una Bung na Sabat. Ra i watungi tan a taro lena, “A wonom na bung kura sur din papam. Mot in nan urin una kum bung ra, sur din ulangolango pas mot, ma una Bung na Sabat gong.” ¹⁵ A Labino i balu i lena, “Mot a kum tene torotoro! Mot rop arara, mot ser palos ru anumot a kum bulumakau ma a kum dongki gusun anundet a kum rumu, ra mot ben pirso det una Bung na Sabat sur det in inum. ¹⁶ A ino ri, tagun a kabotaro anun o Abaram, o Satan i kerker tari a noino ma tiwal na kilalo. Ilai ra ka din palos a kineker ri gusuni una Bung na Sabat?” ¹⁷ Ra i sa watung tari lenri tandet, det rop ra det pukus a pinapam anun o Iesu, det maimai, ikut a kunur na taro det gas una kum wakak na utna ra o Iesu i pami.

*A wasiso elelar unin wino mastad ma una is
(Mt 13:31-33; Mk 4:30-32)*

¹⁸ O Iesu i iting lena, “A matanitu anun o God i elar nama sau? Asau an elaro i nami? ¹⁹ I elar namin pitino mastad, ra ara musano i los pasi, ma i marut tari una nun a kinobot. I lubung, ra in nanai ino i labo pat, ma a kum piko det ser pam pios una kum kanokano.”

²⁰ O Iesu i iting melet lena, “Asau kai an elaro a matanitu anun o God nami? ²¹ I elar nama is

ra ara ino i rakon pasi ma i pam tomo tari nama labino palawa, ra a palawa rop i mubus nami.”

A nat na matansako lik
(Mt 7:13-14, 21-23)

²² Ra o Iesu i wan nanan usapat o Jerusalem, i ususer a taro una kum lamlabino tamon ma una kum natnat na tamon. ²³ Ara i ting o Iesu lena, “Labino, pepetlai, a pak na taro kut din ulaun pas det?” Ra i watungi tandet lena, ²⁴ “Mot in dekdek sur mot in ruk una nat na matansako lik, uni a susut na taro det in lari sur det in ruk uni, ikut ka det in pet lar pasi. ²⁵ A taman a rumu in tur ra in tagar bat a matansako, ma mot in tur nago upiso, mot in pinpidik ma mot in watungi lena, ‘Labino, un papos pas met.’ In watungi kut tamot lena, ‘Ka tasman mot ma tagai mot.’ ²⁶ Numur mot in watungi tano lena, ‘Met ser wangon ma met ser inum tomo nam ui, ma u ser towo met una numet a kum nubual na inawan tomo.’ ²⁷ Ikut in balu mot lena, ‘Ka tasman mot ma tagai mot. Mot a kum tene sakino, mot in nan gisen gusun iau.’ ²⁸ Ra mot in tama o Abaram, o Aisak ma o Jekop ma a kum poropet rop una matanitu anun o God, mot in tangtangis, ma mot in ungingit lokomot iai. Ikut din lu pirso ru mot. ²⁹ Ma a taro tagun a wat na matmatano wuwu det in nanpat, ma det in kis una lukaro una matanitu anun o God. ³⁰ Tama i, ara taro ra det mur uniri, numur det in mugu, ma ara taro ra det mugu uniri, numur det in mur.”

13:25: Mt 25:10-12 **13:27:** Sng 6:8 **13:28:** Mt 8:11-12
13:29: Sng 107:3 **13:30:** Mt 19:30

O Iesu i maris o Jerusalem

(Mt 23:37-39)

³¹ Una du bung ra, a kum Parisi det wanpat, ma det watungi tan o Iesu lena, “Un nan taginin ma un nan sur tu tamon gisen, uni o Erod i nem na um doko ui.” ³² O Iesu i balu det lena, “Mot in nan ma mot in inanos a lomlom na pap ra lenri, uniri ma markan an lakro ru a kum laulau na nion ma an ulangolango a taro, ma a tulu bung nami an urop anung a pinapam. ³³ An nan uniri ma markan ma a bung palu kai, uni katu poropet in iru un tu tamon gisen, sapat ut o Jerusalem.

³⁴ “Jerusalem, Jerusalem, ui ra u ser um doko a kum poropet, ma det ra di tulu ru det torom ui, u duku doko ru det kut nama watat. A susut na dino a nem na ben tomo a kum nutnutum, elar nama kereke ra i rakup bat tomo a kum nutnutunu utuntudu ina ru mebene, ikut ka mot nemi. ³⁵ Tama i! O God i sa wan gusun anumot a tamon. A inanos mot, ka mot in tama melet iau mo, tuk una bung ra mot in watungi lena, ‘O naro ra i wanpat nama risan a Labino i dan.’ ” *Sng 118:26*

14

O Iesu i ulangolango pas ara musano

¹ Un ara Bung na Sabat, o Iesu i ruk sur in nangan una rumu anun ara mugumugu anun a kum Parisi, ra a taro det tama sursuri kut sur tu utna ra in pam raro i. ² Ara musano ra i misait, a pinpinino i sursurung, i kis taru sa numugu tan o Iesu. ³ O Iesu i ting a kum tene ususer tagun

a Warkurai ma a kum Parisi lina, “Pepetlai, i tokodos una Warkurai sur din ulangolango a taro una Bung na Sabat o awu?” ⁴ Ikut ka det balu i. O Iesu i pam pas a musano ra, i ulangolango pasi, ra i tulu ru i. ⁵ Ra o Iesu i ting det lina, “Osi tagun mot ra o nutunulik, o anunu tu bulumakau in puku taru unin nutung na danim una Bung na Sabat ra ken dat toto lakit pasi?” ⁶ Ma ka det balu lar pas anun a wasiso ri.

Un unatino pas ui, ma un maris a sibo na taro

⁷ Ra o Iesu i kis una inangon ri, i tama a taro ra det wanpat, det pilok pasi ut a kum kiskis sa numugu. Ma i watung ara wasiso elelar tandet lina, ⁸ “Ra taio in ben pas ui una lukaro na nolin, gong u kis una kiskis sa numugu, sako in ben pas taio ra i labo tam. ⁹ Ma o naro ra i eben una lukaro in nanpat ra in watungi tam lina, ‘Un katatur saro o naro ri.’ Ra un nan nama maimai sur a kiskis kunago numur. ¹⁰ Ikut, ra din ben pas ui, un nan ma un kis una kiskis nago numur sakit. Ra o naro ra i eben in nanpat, in watungi tam lina, ‘Pasang, un tur ra un nan urin numugu.’ Ma din ulabo pas ui umatandet ra mot kis tomo una inangon. ¹¹ Uni det rop ra det ulabo pas det, din unatino det. Ma osi ra i unatino pasi, din ulabo i.”

¹² Numur o Iesu i watungi tan a Parisi ra i ben pasi sur a inangon lina, “Ra u waninar pas a inangon, gong u ben pas a kum paspasam, ma a kum tistisim, ma a kum kukum, ma a kum tene gongon ra det kis milau nisam. Uni det ri det in ben pas ui ma det in balu i torom ui. ¹³ Ra u

14:5: Mt 12:11; Lk 13:15
23:12; Lk 18:14

14:8: Snd 25:6-7

14:11: Mt

waninar pas a inangon, un ben pasi kut a kum sibo na taro, det ra a pinindet i mat, det ra det kaukawar kut, ma a kum pulu. ¹⁴ Ra un pami lenri, un dan. Uni, kalako utna anundet sur det in balu i tam, o God in balu i tam una bung ra a kum tene tokodos det in laun melet.”

*A wasiso elelar una labino lukaro
(Mt 22:1-10)*

¹⁵ Ara tagun det ra det wangon tomo nam o Iesu i longoro a kum wasiso ri, i watungi tano lena, “Det ra det in nangon una lukaro una matanitu anun o God, det dan.” ¹⁶ Ra o Iesu i watungi tano lena, “Ara musano i waninar pas a tarai na lukaro, ma i inanos mugu tar a susut na taro sur det in nanpat. ¹⁷ Ma una bung na lukaro mo, i tulu ru anun a tultul torom det, ra di sa inanos mugu tar det, nama wasiso lenri, ‘Mot in nan mo urin, uni a kum utna i sa waninar rop.’ ¹⁸ Ikut det rop det wasiso batbat det kut. A mugano i watungi kut tano lena, ‘A sa kul tar a du piso. An nan munung sur an tama i. A saring ui sur un madek ru iau mukut.’ ¹⁹ Ra ara kai i watungi lena, ‘A sa kul pas a noino karabau. An nan munung sur an lar tar det. A saring ui sur un madek ru iau mukut.’ ²⁰ Ma ara kai i watungi lena, ‘Unikutri a nolin, ma kan pet lar pasi sur an nan.’

²¹ “A tultul i milet melet ra i inanos anun a labino una kum wasiso ra. A labino ra, in balano i sungun doko, ra i watungi tan anun a tultul lena, ‘Un nan lakit sur a kum tartarai na kisapi ma a kum natnat na kisapi una tamon, ra un ben pas a

kum sibo na taro, det ra a pinindet i mat, a kum pulu, ma det kai ra det kaukawar kut.’ ²² Numur a tultul i watungi lena, ‘Labino, a sa pam tar a kum utna rop ra u itula suri, ikut a ramano kum kolo liklik kura utmakai una rumu.’ ²³ A labino i watungi tan a tultul lena, ‘Un nan sur a kum tartarai na kisapi ma a kum natnat na kisapi sa ubual, ma un ungonos pas a taro sur det in ruk, sur anung a rumu in bukus wakak. ²⁴ A watungi tamot, katutaio tagun det, ra di sa inanos mugu tar det, in nangon tagun anung a lukaro.’ ”

A kum wasiso elelar un osi ra i nem na mur o Iesu

(Mt 10:37-38)

²⁵ A labino kunur na taro det wan tomo nam o Iesu. I tupukus torom det ra i watungi lena, ²⁶ “Ra taio i nem na mur iau, ma i nem doko o tamano, o nano, anun a ino, a kum nutnutunu, a kum tistisino ma anun a nilaun kai, ikut anun a marmaris torom iau ken labo taun anun a marmaris torom det ri, i awu sur anung a nat na ususer. ²⁷ Ma osi ra ke los pas anun in nanai kutus ma i mur iau, ken pet lari sur in nanpat anung a nat na ususer.

²⁸ “Ra taio tagun mot i nemi sur in pam tu tarai na rumu, in kis munung ra in pam mugu pas a matan a rumu rop, sur in tasmani ra anun a mani in elar sur in urop pasi, o awu. ²⁹ Sako in utur kibin tari kut a rumu, ma ken urop lar pasi. Ra a taro rop ra det in tama i, det in urongon laulau uni, ³⁰ ra det in watungi lena, ‘A musano ri i utur kibin tari kut a rumu, ikut ke urop lar pasi.’

³¹ “Ra tu king tomo nama noino arip na taro na inaim anunu in nan una inaim tomo nam ara king gisen kai ra anun aru noino arip na taro na inaim, i wakak sur in kis ma in nuknuk mugu pas lena, pepetlai, det topas aru noino arip na taro o awu. ³² Ra awu, in tulu ru anun a kum tultul sur det in ukodos a wasiso tomo nama king sur a malmal, ra det bakbak utmakai. ³³ Lenkutkai ra torom mot, ra taio tagun mot ken madek ru anun a kum utna rop, i awu sur anung a nat na ususer.

A sol ra ke topas tu utna

(Mt 5:13; Mk 9:50)

³⁴ “A sol i wakak, ikut ra a makasmanino i sa rop, din umakasan meleti mo pepetlai? ³⁵ Ke topasi sur din ubeki una kinobot ma ken uwakaki kai a piso, din woro ru i mukut. Osi ra arin talngano kura, i wakak sur in longoro nami.”

15

A wasiso elelar un ara sipsip ra i raro

(Mt 18:12-14)

¹ Ara bung a kum tene los takis ma a kum tene sakino det wan torom o Iesu sur det in longoro i.

² Ikut a kum Parisi ma a kum tene ususer tagun a Warkurai det ururai un o Iesu lena, “A musano ri, i lason kut tomo nama kum tene sakino, ma i wangon tomo nam det.”

³ Ra o Iesu i watung a wasiso elelar tandet lena:

⁴ “Ra taio tagun mot anunu tu mar na sipsip, ma ara tagun det in raro. Pepetlai, ken nan pas gusun a lisu na noino ma lisu tiro una nubual ra det

wangon iai, ma in sisio sur ara ra i raro, tuk ra in sio melet pasi? ⁵ Ra i sa sio pasi, in ubek pasi unin kabarano, ra in nan nama gasgas. ⁶ In milet melet nami, ra in kabo tomo pas a kum paspasano ma det ra det kis milau, ra in watungi tandet lena, ‘Dat in gas, uni a sa sio melet pas anung a sipsip ra i raro.’ ⁷ A watungi tamot, i lenkutkai ra sapat una langit, a gasgas una tene sakino ra i nukpukus in labo taun a gasgas una lisu na noino ma lisu ra det sa tokodos, ma ka det in nukpukus melet.

A wasiso elelar un ara mani ra i raro

⁸ “Ra tu ino anunu tu noino mani, ra i sa ban raro ru ara. Pepetlai, ken ungangon pas a lam, ra in surupu a rumu, ma in sisio wakak ut suri, tuk ra in sio melet pasi? ⁹ Ra i sa sio pasi, in kabo tomo pas a kum paspasano ma det ra det kis milau, ra in watungi tandet lena, ‘Dat in gas, uni a sa sio melet pas ara mani ra a ban raro tari.’ ¹⁰ A watungi tamot, i lenkutkai ra a gasgas epotor nisan a kum ensel anun o God un ara tene sakino ra i nukpukus.”

A wasiso elelar una musano aru nutnutunu

¹¹ O Iesu i watungi lena, “Ara musano aru nutnutunu, aru nat musano. ¹² A murmur i watungi tan o tamano lena, ‘Tita, un pitar tar anung a tinibo tagun anum a kum ululeng.’ Ra a tamander i isuaro tar anun a kum ululeng tander. ¹³ A iso bung bat tari kut, a murmur i ubek tomo pas anun a ululeng rop, ra i wan sur a tamon bakbak, ma i urop ru anun a ululeng una ngas na nilaun ra ke wakak. ¹⁴ Ra i sa urop ru a ututna, a labino munurak i wanpat una tamon ra, ra i

murak mo. ¹⁵ Ra i wan, ma i papam torom ara musano tagun a tamon ra. Ra a musano ra i tulu tari una nun in noworo na boro sur in tamtabor det. ¹⁶ I nemi sur in nan a kum pinino bin ra a kum boro det wanani sur in masur, ikut katutaio i tabori.

¹⁷ “Ra a wakak na nuknuk i wanpat melet toromi, i watungi lena, ‘A kum tultul rop anun o tita det wangangon ma det masmasur pas kut gusun a kum utna. Ikut iau, kuri a mat nama munurak! ¹⁸ Uniri an katatur pas ra an milet melet sur o tita. An watungi tano lena, “Tita, a sa pam tar a sakino petutna torom o God ma torom ui kai. ¹⁹ Iau ka wakak mo sur un watung iau a nutumlik. Un ubek tar iau mukut sur an elar nam ara tagun anum a kum tultul.”’ ²⁰ Ra i katatur pas ma i wan sur o tamano.

“Ra i bakbak utmakai, o tamano i sa tama pasi, ra in balano i tupukus nami. I kalabor toromi, i tal pasi ra i gom a wano. ²¹ Ra o nutunulik i watungi tano lena, ‘Tita, a sa pam tar a sakino petutna torom o God ma torom ui kai. Ka wakak mo sur un watung iau a nutumlik.’ ²² Ikut o tamano i watungi tan anun a kum tultul lena, ‘Aiapiap! Mot in los lakit tin namalu ra i wakak doko urin, ma mot in upipis tari nami. Mot in ubek tar a ring una lamano, ma mot in pas tari kai aru su un aru kikino. ²³ Mot in nan, ma mot in dat pas tu barman na bulumakau ra i butbut urin, mot in um doko pasi, sur dat in nangon ma dat in gas tomo. ²⁴ Uni o nutunglik ri i sa mat,

ma uniri i sa laun melet, i raro pas ma uniri i sa wanpat melet.' Ra a lukaro i turpasi.

²⁵ “Una bung ra a mugano nutunulik, i kis ut tiro una kinobot. Ra i wanpat tiro utamon milau a rumu, i longoro a tinangis na kaur ma a kelekele na nilagor, ²⁶ ra i kabo pas ara tultul, ra i tingi una kum utna ri. ²⁷ Ra a tultul i inanosi lena, ‘O tisimlik i sa wanpat, ra o tamam i um doko pas a barman na bulumakau ra i butbut, uni der tamtama tomo melet, nama wakak na nilaun.’ ²⁸ Ra o tisino a mugano i kankan, i putut kut, ke nemi sur in ruk. Ra o tamano i pirso toromi, ra i umaromi. ²⁹ Ikut i watungi tan o tamano lena, ‘Tama i! A susut na kilalo a sa papam torom ui elar nama tultul, ka rosumur una num a kum itula, ikut ko tabor tar iau mukut nam tu nat na memelik, sur met in gas tomo nama kum paspasang. ³⁰ Ikut ra a nutumlik ri i wanpat, i ra i ban laulau ru anum a kum utna una kum pamuk na ino, u um doko pasi ut a barman na bulumakau ra i butbut suri.’ ³¹ Ra o Tamano i balu i lena, ‘Nutunglik, ui kuri ut u kis nisang, ma anung a kum ululeng rop, anumi ut. ³² I wakak sur dat in gas ma dat in nangon, uni o tisimlik ri i sa mat ma uniri i sa laun melet, i raro pas, ma uniri i sa wanpat melet.’ ”

16

A wasiso elelar una tene tamtamabat ra i mananos

¹ O Iesu i watung meleti tan anun a taro na ususer lena, “Ara tene gongon anun ara tultul i tamtamabat anun a kum utna, ra di takuni lena

i papam oros kut una kum utna anun a tene gongon ra. ² I kabo pasi, ma i tingi lena, 'Asau ra a longoro i un ui? Un tumus a wasiso talapor una num a pinapam na tamtamabat ma un pitari tang, uni kon tene tamtamabat melet mo anungi.' ³ Ra a tene tamtamabat ra i nuki lena, 'Asau mo ra an pami uniri, ra anung a mugumugu in rakon ru iau gusun a pinapam ri? Kalako dekdeking sur an kiki, ma an maimai kut kai ra an saring utna. ⁴ O! A sa nuk pas ara utna ra an pami, sur a taro det in gas pas iau una nundet a kum rumu, ra di sa lu ru tar iau gusun a pinapam ri.'

⁵ "Ra i itula sur det rop taktakai ra det sa dinau pas tan anun a mugumugu. Ra i ting a mugano musano lena, 'A iso ra u dinau pasi tan anung a mugumugu?' ⁶ Ra i balu i lena, 'Ara mar na lamlabino koto na wel na oliw.' Ma a tultul i watungi lena, 'Un los anum a buk na dinau urin. Un kis ma un tumus lakit tar a limo na noino mukut uni.' ⁷ Ra i tingi bulung ara, 'A iso ra u dinau pasi?' Ra i balu i lena, 'Ara mar na bek na wit.' Ra i watungi tano lena, 'Un los anum a buk na dinau urin. Un tumus tari mukut a tiwal na noino uni.'

⁸ "Anun a labino i tasmani lena a tultul ri ke lingmulus una nun a pinapam, ikut i watung ulabo pasi kibino una nun a mananos ra i pam a torotoro ri nami. Uni a taro tagun a rakrakon bual, det mananos doko sur anundet a pinapam tomo nama taro tagun a rakrakon bual, ikut a taro tagun a talapor ka det mananos. ⁹ A watungi tamot, mot in umarom pas lako taro nama kum ululeng taginin upiso. Numur ra a kum ululeng

ken gas mo sur tu utna, din gas pas mot sur mot in kis una kum rumu ra det in tur tukum.

¹⁰ “Osi ra i lingmulus una nat na utna kut, in lingmulus kai una kum lamlabino utna, ma osi ra ke lingmulus una nat na utna, ken lingmulus utkai una kum lamlabino utna. ¹¹ Ra ka mot lingmulus sur mot in papam wakak nama kum utna taginin upiso, osi kai in nurnur un mot sur mot in papam wakak nama kum utna tagisapat netes? ¹² Ra ka mot tamtama wakak taru un tu utna anun taio, osi kai in pitar tar anumot tu utna torom mot? ¹³ Katu tultul in pet lar pasi sur in papam torom lako ru mugumugu. In nget ara pasander, ma in nem ara pasander, in nem doko ara ma in rosumur gusun ara. Ka mot in papam lar pas torom o God ma torom a mani kai.”

A kum Warkurai anun o God ken rop

(Mt 5:31-32; 19:9; Mk 10:11-12)

¹⁴ A kum Parisi det longoro a kum wasiso ri, ra det urongon laulau kut un o Iesu, uni det nem doko a mani. ¹⁵ Ra o Iesu i watungi tandet lena, “Mot, mot ukodos pas mot kut umatan a taro. Ikut o God i tasman a balamot. Uni a utna ra i labo doko umatan a taro i laulau doko umatan o God.

¹⁶ “A kum Warkurai ma a kum etowo anun a kum poropet i tuk taru ut un o Jon. Turpasi una kilalo ra, di warawai nama Wakak na Wasiso una matanitu anun o God ma a taro rop det raras sur det in ruk uni. ¹⁷ Ke ngangitin sur a bakut ma a rakrakon bual der in rop, ikut i ngangitin doko

sur tu nat na tumtumus lik in rop gusun a kum Warkurai anun o God.

¹⁸ “Osi ra in lu ru anun a ino ma in nolin melet nam tu ino, a musano ra i pam a sakino torom anun a ino, uni i nolin melet nama se ino. Ma osi ra in nolin nam tu ino ra anun a musano i lu ru i, i kai i pam a sakino, uni awu sur a ino anunu.

O Lasarus ma a tene gongon

¹⁹ “Ara tene gongon, i ser emar nama kum wakak na malu, ma i ser wangon wakak una kum bung rop. ²⁰ Di inep tar ara musano, a nat na soi, a tene sasaring, tiro umatansako tano, a risano o Lasarus, a pinpinino i wangangon. ²¹ I nemi sur in nan a kum mumumut na utna ra det puku taru gusun a kabulu na inangon anun a tene gongon. Ma a kum pap det ser dami kai a kum inangon una pinpinino.

²² “Numur a nat na soi ra i mat, ra a kum ensel det los pasi ma det ukis tari upaporin o Abaram. Ra a tene gongon bulung i mat, ma di por ru i. ²³ I kis una labino sungun, i taramo a labino ngunungut. I tatado usapat netes, ra i tama o Abaram i bakbak doko, ma o Lasarus kai kura una paporino. ²⁴ Ra i kakabo lena, ‘Tita Abaram, un maris iau, un tulu ru o Lasarus sur in puk pas in kaskas na lamano una danim sur in ukotokoto tar in karmeng nami, uni a taramo a labino ngunungut nin una sungun.’

²⁵ “O Abaram i balu i lena, ‘Nutunglik, un nuk pasi, ra u laun utmakai, u pam ukai anum a kum wakak na utna, lenkutkai ra torom o Lasarus, i pam ukai a kum laulau na utna. Ikut uniri i utur ukai a gasgas nin, ma ui, u taramo a labino

ngunungut. ²⁶ Ma ara utna kai, in tarai nin nala kuri epotor tamot ma met. Katutaio taginin in pet lar pasi sur in nan utiro torom mot, ma katutaio kai in nan tagitiro gusun mot urin torom met.’

²⁷ “Ra a tene gongon i watungi lena, ‘Tita, a saring ui sur un tulu ru o Lasarus sur a rumu anun o tamang. ²⁸ Uni a limo na tistising a kum musano kura det uni, ma in utumarong tar det, sako det bulung det in nan urin una nubual na ngunungut ri.’ ²⁹ Ra o Abaram i balu i lena, ‘A wasiso anun o Moses ma a kum poropet kura i kis torom det. I wakak sur det in longoro i.’ ³⁰ A tene gongon i watungi lena, ‘Awu, Tita Abaram, ra ut ra taio tagun a kum minat in nanpat torom det, det in nukpukus.’ ³¹ Ra o Abaram i balu meleti lena, ‘Ra ka det longoro o Moses ma a kum poropet, ra taio kai in katutur melet gusun a minat, ken ukatutur pas anundet a nurnur.’ ”

17

A sakino petutna (Mt 18:6-7, 21-22; Mk 9:42)

¹ O Iesu i watungi tan anun a taro na ususer lena, “A kum utna in nanpat ut, ra in upuku a taro una sakino, ikut in laulau doko torom o naro ra i pam pat pasi. ² Gunuk ra di sa kubus tar tu labino wat unin kabarano, ma di sa woro murung tari usa utasi, in wakak toromi, sako in ben raro ara

tagun a kum nat liklik ri* un tu sakino, ra kura numur in los a labino warkurai.

³ “Mot in tumarong mot! Ra o tisimlik i pam a sakino, un wasiso dekdek toromi, ma ra i sa nukpukus, un dumano ru anun a sakino. ⁴ Ra i pam a sakino torom ui a wonom mawit na dino un ara bung, ma i wan torom ui a wonom mawit na dino ma i watungi tam lena, ‘A sa pam tar a sakino torom ui. Uniri a nukpukus,’ un dumano ru anun a sakino.”

A nurnur

⁵ A kum aposel det watungi torom a Labino lena, “Un ulabo pas anumet a nurnur.” ⁶ Ma a Labino i watungi lena, “Ra anumot a nurnur in natino elar namin pitino mastad, mot in pet lar pasi sur mot in watungi tan in nanai ri lena, ‘Un taragot, ma un tur sa utasi,’ in muri kut anumot a wasiso.

A pinapam anun a tultul

⁷ “Ra taio tagun mot anun a tultul i papam pas tiro ukinobot, o i tamtamabat tar a kum sipsip, ra i wanpat tagisa ubual, pepetlai, un watungi mut tan anum a tultul lena, ‘Un nan urin, un kis ma un nangon?’ Awu. ⁸ Un watungi tano lenri, ‘Un emar pas, un waninar anga utna na inangon, ma un tabor iau, ra an nangon ma an inum. Ra numur ui bulung un nangon ma un inum.’ ⁹ Pepetlai, a mugumugu in watung wakak torom a tultul ra i tarom toromi? Awu, uni anun a pinapam utra.

* **17:2:** A wasiso Grik i lena “a kum natnatino”, a kukuraino lenri: a kum nat liklik, o det ra anundet a nurnur ke dekdek, o det ra a taro det tama pispiso det. **17:3:** Mt 18:15 **17:6:** Mt 17:20; 21:21

¹⁰ Lenkutkai ra torom mot, ra mot sa pam sot pas a kum utna di pitar tari tamot, mot in watungi lena, ‘Met a kum tultul oros kut, met pami kut anumet a pinapam.’”

O Iesu i ulangolango pas a noino lepra

¹¹ Ra o Iesu i wan nanan usapat o Jerusalem, i wan epotor tan aru papor Samaria ma o Galili.

¹² I ruk una matansako ina tamon, ma det etorom nama noino musano ra det misait nama lepra. Det tur bakbak taru ut, ¹³ ma det kakabo dekdek lena, “Iesu, a Labino, un maris met.” ¹⁴ Ra o Iesu i tama det, i watungi tandet lena, “Mot in nan, ma mot in ese tar mot torom a kum tene etabor torom o God†.” Ra det wan nanan, det langolango mut.

¹⁵ Ara tagun det i tama i lena i sa langolango, i milet melet, ma i watung ulabo pas o God namin labino walngano. ¹⁶ Ma i kis but keke nisan aru kikin o Iesu ra i watung wakak toromi. A musano ra, a te Samaria. ¹⁷ O Iesu i tingi lena, “Pepetlai, ka di ulangolango pas a noino rop? A lisu kai awai det mo? ¹⁸ I lai ra katutaio i milet melet sur in watung ulabo pas o God? Ikut a usirolik ri.” ¹⁹ Ra i watungi tano, “Un katuttur, ma un nan. Anum a nurnur i sa ulangolango pas ui.”

A inawan pat anun a matanitu anun o God

(Mt 24:23-28, 37-41)

²⁰ A ramano kum Parisi det ting o Iesu lena, “Nangisin a matanitu anun o God in nanpat?” Ra i

17:13: Wkp 13:45-46 **17:14:** Wkp 14:2-3; Jn 3:3; 18:36

† **17:14:** A ngasino anun a kum Juda i lenri: Osi ra a misait i rop gusuni, in nan in ese i torom a tene etabor torom o God, sur a tene etabor in tama i ra in upuaso i lena i sa langolango.

balu det lena, “A matanitu anun o God ken nanpat nama kum ukinalong ra din tama i. ²¹ Ma ka din watungi lena, ‘Iri mi!’ o, ‘I mo ra i!’ Uni a matanitu anun o God kura ut un mot.”

²² O Iesu i watungi tan anun a kum nat na ususer lena, “A du bung in nanpat ra mot in nemi sur mot in tama tar a bung tagun a kum bung anun a Nutun a Musano, ikut ka mot in tama i.

²³ Lako taro det in watungi tamot lena, “Tama i, i mo ra i!’ o, ‘Kuri i nin!’ Gong mot mur tar det.

²⁴ Uni una bung ra a Nutun a Musano in nan pat, a taro rop det in tama i. In elar namin nememe, ra i meme i tagitong un ara papor maino, tuk un ara papor kai. ²⁵ Ikut a Nutun a Musano in taramo mugu a susut na ngunungut, ma a taro tagun uniri det in rosumur gusuni.

²⁶ “A kum bung anun a Nutun a Musano in elar nama kum bung anun o Noa. ²⁷ A taro det wangon, det inum, ma det unolin det, tuk una bung ra o Noa i kas una sip, ra in nabato i puku ma in nolomom i wanpat ma det iru rop.

²⁸ Lenkutkai ra una kum bung anun o Lot. A taro det wangon, ma det inum, det kukul, ma det siuru, det marut utna, ma det pam rumu. ²⁹ Ikut una bung ra o Lot i wan gusun a tamon Sodom, a sungun ma a salfa i puku tagisapat una bakut elar namin nabato, ra det rop det iru uni.

³⁰ “In lenkutkai ra una bung ra a Nutun a Musano in nanpat puaso uni. ³¹ Una bung ra, ra taio in kis sapat netes una nun a rumu, gong i pirso sur in los pas anun a kum ututna tagisa

17:23: Mk 13:21; Lk 21:8
Mt 24:17-18

17:28: Stat 18:20; 19:25

17:31:

urumu. Lenkutkai, ra taio in kis sa ukinobot, gong i millet melet unago utamon sur tu utna. ³² Mot in nuk pas a ino anun o Lot. ³³ Osi ra i nem doko i sur in maris bat anun a nilaun, in iru. Ikut osi ra ke maris bat anun a nilaun, in laun. ³⁴ A watungi tamot, una bung na mirum ra, ra lako ru der in inep un ara bat, din los pas tu pasander kut, ma ara pasander awu. ³⁵⁻³⁶ Ra lako ru ino kai der in papam tomo u gino a wit sur in nanpat a palawa, din los pas tu pasander kut, ma ara pasander awu.” † ³⁷ Ma a kum nat na ususer det tingi lena, “Labino, a kum utna ri in nanpat awai?” Ra i balu det lena, “A nubual ra a minat i inep uni, a kum kotkot det in nan tomo iai.”

18

A wasiso elelar una ula ma a tene warkurai

¹ O Iesu i watung a wasiso elelar torom anun a kum nat na ususer sur in ese det lena, det in wararing bolbolos, ma gong a pinindet i ngoro. ² I watungi lena, “Ara tene warkurai i kis una ara tamon, ke ngara sur o God, ma ke nuk pas a taro kai. ³ Ara ula tagun a tamon ra, i wan liklik mukut toromi, ma i ser saringi lena, ‘Un ukodos tar iau tomo nama nung a ebar una numir a maut.’ ⁴ I sa suano i ma ke mulaot tano, ra numur i nuki lena, ‘A lingmulus, ka ngara sur o God, ma ka ser nuk pas a taro, ⁵ ikut, an tama i sur an ukodos a ula ri,

17:33: Lk 9:24 † **17:35-36:** Una ramano kum du buk una wasiso Grik, a ramano kum wasiso kai i kis una vers ri. I lenri: *Ra lako ru musano der in papam sa ukinobot, din los pas tu pasander kut, ma ara pasander awu.* **18:1:** Kol 4:2; 1 Tes 5:17

uni i utikidis liklik iau, sako in ungoro iau nama inawan pat liklik nin.’ ”

⁶ A Labino i watungi tan a kum nat na ususer lena, “Mot in longoro a wasiso anun a tene warkurai ra ke lingmulus una nun a pinapam.

⁷ Pepetlai, o God ken ukodos anun a taro na pipilok, ra det tangis toromi una kum waspi ma una kum mirum kai? Pepetlai, ken warut lakit det?

⁸ A watungi tamot, in ukodos lakit det. Ikut, ra a Nutun a Musano in nanpat, pepetlai, in etorom pas lako taro ut nin upiso ra det nurnur uni o awu?”

A wasiso elelar una Parisi ma a tene los takis

⁹ O Iesu i watung a wasiso elelar ri torom det ra det nurnur ut un det lena, det a kum tene tokodos, ma det tama pisopiso a taro rop. ¹⁰ “Aru musano der wan usapat una rumu na etabor sur der in wararing. Ara pasander a Parisi, ma ara pasander kai a tene los takis. ¹¹ A Parisi i tur ma i wararing suri ut lenri, ‘God, a watung wakak torom ui, uni ka elar nam ara taro kai, a kum tene wolong, det ra ka det tokodos, ma det ra det pam a sakino nam tu ino anun taio o nam tu musano anun taio, ma ka elar kai nama tene los takis iri i. ¹² A ser wewel aru bung un ara wik, ma a ser pitar arara utna tagun ara noino utna ra a pam pat pasi.’ ¹³ Ikut a tene los takis i tur gisen taru, ke tatado usapat netes una langit, uni i maimai. I raprapusi kut a romrobono nama tupunuk, ma i watungi lena, ‘God, un maris iau, a tene sakino iau.’ ¹⁴ A watungi tamot, a musano ri, ra i milet

melet sur anun a rumu, i sa tokodos umatan o God, ma ara pasander awu. Uni det rop ra det ulabo pas det, din unatino det. Ma osi ra i unatino pasi, din ulabo pasi.”

*Det turbat a kum nat liklik gusun o Iesu
(Mt 19:13-15; Mk 10:13-16)*

¹⁵ A taro det los a kum nat liklik torom o Iesu sur in ubek aru lamano sapat netes un det. Ra a kum nat na ususer det tama i lenra, det turbat det.

¹⁶ Ikut o Iesu i kabo pas a kum nat liklik toromi, ra i watungi lena, “Mot in madek ru a kum nat liklik sur det in nan torom iau. Gong mot turbat det, uni a matanitu anun o God anundet ra det lenri.

¹⁷ A inanos mot nama lingmulus, osi ra ken ruk una matanitu anun o God elar nama natlik, ken ruk lar pas.”

*A tene gongon
(Mt 19:16-30; Mk 10:17-31)*

¹⁸ Ara mugumugu i ting o Iesu lena, “Wakak na Tene Ususer, asau ra an pami sur an rakon a nilaun tukum?” ¹⁹ O Iesu i balu i lena, “Sur asau ra u watung iau a wakak? Katutaio i wakak, o God sot kut. ²⁰ U tasman a kum Warkurai: ‘Gong u pam a sakino nam tu ino anun taio o nam tu musano anun taio, gong u um doko taio, gong u wolong, gong u etakun torotoro, un ru o tamam ma o nam.’ ”

Kis 20:12-16

²¹ A musano ra i balu i lena, “Turpasi ra a natlik utmakai tuk uniri, a ser mur a kum Warkurai rop ri.” ²² Ra o Iesu i longoro i, i watungi tano lena, “Ara utna mukut ra kabaut u pami. Un siuru ru

anum a kum utna rop, ra a mani taguni, un tabor a kum sibona taro nami. Ra un pami lenra, anum a wakak na ululeng kusapat una langit. Numur un nan urin ma un mur iau.”

²³ Ra i longoro a wasiso ri i tupunuk doko, uni i a tene gongon sakit. ²⁴ O Iesu i tama i, ra i watungi lena, “I ngangitin doko torom a kum tene gongon sur det in ruk una matanitu anun o God. ²⁵ In ngangitin sur a kamel in ruk una mato na sur na susuk, ikut, i ngangitin doko ut, sur a tene gongon in ruk una matanitu anun o God.”

²⁶ Ra det longoro a wasiso ri, det iting lena, “Ra i lenra, osi mo ra din ulauni?” ²⁷ O Iesu i balu det lena, “Asau ra a taro ka det pet lar pasi, o God in pet lar pasi.”

²⁸ O Pita i watungi tano lena, “Tama i, met sa wan gusun anumet a kum utna rop, ra met mur ui.” ²⁹ O Iesu i watungi tandet lena, “A inanos mot nama lingmulus: Ra taio in nan gusun anun a rumu, o gusun anun a ino, o a kum tistisino, o gusun o nano, o gusun o tamano, o a kum nutnutunu, kibino una matanitu anun o God, ³⁰ una nilaun ri, din tabori nama susut na utna lenri ra i sa wan pas gusuni. Ma una nilaun numur din tabori nama nilaun tukum.”

*O Iesu i mantulu wasiso una nun a minat
(Mt 20:17-19; Mk 10:32-34)*

³¹ O Iesu i ben gisen pas anun a noino ma aru nat na ususer, ra i watungi tandet lena, “Tama i, iri dat wan nanan usapat o Jerusalem, ma din pam sot pas a kum utna rop ra a kum poropet det sa tumus tari una Nutun a Musano. ³² Uni din

pitar tari torom det ra awu sur a taro Juda. Det in urongon laulau uni, det in ban laulau i, det in ibisi, det in mirasi, ma det in um doko i. ³³ Ra a tulu bung in rop, in katatur melet.” ³⁴ A kum nat na ususer ka det talapor una kum utna rop ri. A kukuraino kura i parau, ma ka det tasman asau ra o Iesu i wasiso uni.

O Iesu i utamtama pas a pulu
(Mt 20:29-34; Mk 10:46-52)

³⁵ Ra o Iesu i wan milau o Jeriko, ara musano a pulu i kis taru una papor ina kisapi, i ser saring utna. ³⁶ I longoro a kunur na taro det wan nanan milau, ra i iting lena, “Asau ra?” ³⁷ Ra det inanosi lena, “O Iesu a te Nasaret ri i wan sakit dat.” ³⁸ Ra i kakabo sapat lena, “Iesu, a Nutun o Dewid, un maris iau.” ³⁹ Det ra det mugu, det turbati sur in kis wowowon. Ikut i kakabo dekdek makai usapat lena, “Nutun o Dewid, un maris iau.” ⁴⁰ O Iesu i tur sikot, ra i itula sur din ben pasi toromi. Ra a pulu i sa wan milau i, i tingi lena, ⁴¹ “Asau ra u nemi sur an pami un ui?” I balu i lena, “Labino, a nemi sur an tamtama.” ⁴² Ra o Iesu i watungi tano lena, “Un tamtama! Anum a nurnur i sa utamtama pas ui.” ⁴³ Uniutra i tamtama, i mur o Iesu, ra i watung ulabo pas o God. Ma a taro rop kai ra det tama i, det watung ulabo pas o God.

19

O Iesu ma o Sakias

¹ O Iesu i ruk utiro una tamon Jeriko, sur in nan sakit usapat o Jerusalem. ² Ra ara musano

i kis tiro iai, a risano o Sakias, a mugumugu anun a kum tene los takis, ma i a tene gongon. ³ I nemi sur in tama o Iesu, ikut o Sakias a kukur na musano kut, ma ke pet lar pasi sur in tama i, kibino una kunur na taro. ⁴ Ra i kalabor usa numugu, ra i ka toto unin nanai, sur in tama o Iesu, uni in nan sakit una kisapi ra.

⁵ Ra o Iesu i wanpat tiro iai, i tatado usapat netes unin nanai, ra i watungi tano lena, “Sakias, un pirso lakit urin. Uniri an kis tomo nam ui una num a rumu.” ⁶ Ra i pirso lakit, ra i ben pas o Iesu utiro una nun a rumu nama gasgas. ⁷ A taro rop det tama i, ra det ururai uni lena, “A musano ri i wan sur in kis tomo nama tene sakino una nun a rumu.”

⁸ O Sakias i tur ra i watungi tan a Labino lena, “Tama i, Labino, ara kukur utna tagun anung a ululeng an tabor a kum sibo na taro nami. Ra a sa toro pas lako utna tan taio, an balu meleti toromi a wat na dino.” ⁹ Ra o Iesu i watungi tan o Sakias lena, “Uniri, di sa ulaun pas det ra det kis una rumu ri, uni o Sakias kai tagun a kum tumtubun o Abaram. ¹⁰ Uni a Nutun a Musano i wanpat sur in sisio sur det ra det raro ma in ulaun pas det.”

A wasiso elelar una kum tultul ra di pitar tar a mani torom det
(Mt 25:14-30)

¹¹ A taro det longoro a kum wasiso ri, ra det nuki lena a matanitu anun o God in nanpat lakit, uni o Iesu i sa milau o Jerusalem. Ra i watungi

kai ara wasiso elelar ¹² lena, “Ara mugumugu i wan sur ara tamon bakbak, sur din mulaot tari sur in king, ra numur in millet melet. ¹³ Numugu tan anun a inawan, i kabo pas anun a noino tultul toromi, ra i pitar tar ara noino mani tandet, ra i watungi lena, ‘Mot in ulabo i, tuk ra an millet melet.’ ¹⁴ Ikut a taro tagun anun a tamon det ngeti, ra det tulu ru ara taro sur det in muri, ma det watungi lena, ‘Ka met nem a musano ri sur in king anumet.’

¹⁵ “Ra di sa ukis tari sur in king, i millet melet. I itula sur anun a kum tultul ra i pitar tar a mani tandet, sur in mananos un asau ra i sa wanpat una anundet a pinapam. ¹⁶ Ma a mugano i wan toromi ra i watungi lena, ‘Labino, a sa ulabo melet pas a noino tagun anum a mani.’ ¹⁷ I balu i lena, ‘Wakak sakit, ui a wakak na tultul! An ubek tar ui sur un tamtamabat a noino lamlabino tamon, uni u lingmulus una nat na utna.’ ¹⁸ Ara bulung i wan toromi ra i watungi lena, ‘Labino, a sa ulabo melet pas a limo tagun anum a mani.’ ¹⁹ Ra i balu i lena, ‘Ui kai un tamtamabat a limo na lamlabino tamon.’ ²⁰ Ma ara tultul bulung i wan toromi ra i watungi tano lena, ‘Labino, anum a mani i melet mo ri, a pulus tari namin namalu ra a ubek eno wakak tari. ²¹ A ngaran ui, uni ui a tene ngalngalia. U los a utna ra awu sur u ubek tari, ma u ser pasong pas a utna ra ko marut tari.’ ²² A labino i watungi tano lena, ‘Ui a laulau na tultul, an warkurai ui elar nama num a wasiso ut. U sa tasman tari lena iau a tene ngalngalia. A ser los a utna ra awu sur a ubek tari, ma a pasong a utna

ra ka marut tari. ²³ I lai ra ko ubek tar anung a mani una beng sur an los pas anung a mani ma tu sibano kai una bung ra an nanpat uni?"

²⁴ "Ra i watungi tandet ra det tur milau taru tiro iai lena, 'Mot in los ru a mani gusuni, ma mot in pitar tari torom o naro ra anun ara noino.'

²⁵ Ma det watungi tano lena, 'Labino, i anun ara noino kura mo tano.' ²⁶ I balu det lena, 'A watungi tamot, osi ra a susut kura tano, din tabor meleti nama susut. Ikut osi ra kalako, din rakon ru i utkai asau lik ra kura tano.

²⁷ " 'Ra mot in ben pas anung a kum ebar ra ka det nemi sur an king anundet, mot in um doko det nin ut umatang.' "

*O Iesu i wan usapat o Jerusalem elar nama king
(Mt 21:1-11; Mk 11:1-11; Jn 12:12-19)*

²⁸ Ra o Iesu i sa watung tar a wasiso elelar ri, i mugu melet usapat o Jerusalem. ²⁹ Ra i wan milau o Betpage ma o Betani una tangai di watungi nama Tangai na Oliw, i tulu aru tagun anun a kum nat na ususer, nama wasiso lenri, ³⁰ "Mur in nan sur a tamon kusa numugu tamur. Ra mur in nanpat, mur in tama ara barman na dongki kura di sa ker ukai tari, ma katutaio utmakai i kas taru uni. Mur in palos pasi ma mur in beni urin. ³¹ Ra taio in ting mur lena, 'Mur palosi sur asau?' mur in watungi tano lena, 'A Labino i nemi.' "

³² Der wan ra der pastorom a kum utna rop ra o Iesu i sa watung tari tander. ³³ Ra der palos pas a barman na dongki, det ra anundet a dongki, det ting der lena, "Ai, mur palos a barman na dongki

ra sur asau?” ³⁴ Der balu det lina, “A Labino i nemi.” ³⁵ Der beni torom o Iesu, ma der rakon ru anunder aru saket, ma der ubek tari netes una barman na dongki ma der ukis tar o Iesu netes uni. ³⁶ Ra i wan nanan, ara taro det rakon ru anundet a kum saket, ma det talaso i una kisapi. ³⁷ Ra i sa milau una kisapi ra i wan pirso una Tangai na Oliw, a labino gasgas i los a taro na ususer rop ma det watung ulabo pas o God una kum utna na ukisin ra det sa tama i. Det watung ulabo pasi nama labino walngandet lina, ³⁸ “A king ra i wanpat nama risan a Labino i dan!
Sng 118:26

A malmal sapat netes una langit, ma a minamar sapat netes sakit!”

³⁹ A ramano kum Parisi epotor una kunur na taro ra, det watungi lina, “Tene Ususer, un turbat anum a taro na ususer.” ⁴⁰ Ra o Iesu i balu det lina, “A watungi tamot, ra a taro ri ka det in ugaia, a kum watat ut det in kukukuk.”

O Iesu i tangis sur o Jerusalem

⁴¹ Ra o Iesu i sa milau o Jerusalem ra i tama i, i tangis suri, ra i watungi lina, ⁴² “Gunuk ra uniri, mot sa tasman tar a kisapi ra i topas a malmal! I parau umatamot! ⁴³ Tu bung in nanpat, ra anumot a kum ebar det in utur in noworo talilis bat anumot a tamon, det in tur talilis mot ma det in turbat anumot a kum kisapi na rukruk ma pispiso, ma det in um mot gusun a kum paporino. ⁴⁴ Ma det in rege ginogino ru a tamon, ma det in um doko mot kai ra mot kis uni. Ma ka det in madek tar tu wat in inep netes un tu wat, uni ka

mot tasman lele a du bung ra o God i wanpat uni torom mot.”

*O Iesu i ruk una rumu na etabor
(Mt 21:12-17; Mk 11:15-19; Jn 2:13-22)*

⁴⁵ O Iesu i ruk unin noworo ina rumu na etabor, ra i lu pirso ru a taro ra det siuru. ⁴⁶ Ra i watungi tandet lena, “Di sa tumus tari una Buk Tabu lenri, ‘Din watung anung a rumu nama rumu na niaring.’” *Ais 56:7*

Ikut, mot sa pukus pasi sur in elar mukut nama ‘nubual na parparau anun a kum tene wolong.’” *Jer 7:11*

⁴⁷ Una kum bung rop, o Iesu i ser ususer a taro ubalan in noworo ina rumu na etabor. Ikut a kum lamlabino tene etabor torom o God, ma a kum tene ususer tagun a Warkurai ma a kum mugumugu anun a taro, det nuknuk sur tu kisapi sur det in um doko i uni. ⁴⁸ Ikut det lagano nuknuk taru sur tu utna ra det in pami, uni a labino kunur na taro det nem doko i sur det in longoro a wasiso anun o Iesu.

20

*Det ting o Iesu una dekdek ra i ser papam nami
(Mt 21:23-27; Mk 11:27-33)*

¹ Ara bung o Iesu i ususer a taro ubalan in noworo ina rumu na etabor, ma i warawai nama Wakak na Wasiso, ra a kum lamlabino tene etabor torom o God, ma a kum tene ususer tagun a Warkurai tomo nama kum mugumugu det wan toromi. ² Ra det watungi tano lena, “Un inanos met, asi na ngas na dekdek ra u pam a kum utna

ri nami? Osi ra i pitar a dekdek ri tam?” ³ O Iesu i balu det lena, “Iau kai an ting mot nam ara iting. Mot inanos iau. ⁴ Tagai a dekdek ra o Jon i baptaiso a taro nami? Tan o God, o tan a taro kut?” ⁵ Ra det wasiso etetalai torom det lena, “Ra dat in watungi lena, ‘Tan o God,’ in balu dat kut lena, ‘Sur asau ra ka mot nurnur uni?’ ⁶ Ikut ra dat in watungi lena, ‘Tan a taro,’ a taro rop det in duku doko dat, uni det nurnur un o Jon lena i a poropet.” ⁷ Ra det balu i kut lena, “Ka met tasmani tagai i.” ⁸ Numur o Iesu i watungi tandet lena, “Iau kai kan inanos mot una dekdek ra a ser pam a kum utna ri nami.”

A wasiso elelar una taro na pinapam una kinobot na wain

(Mt 21:33-46; Mk 12:1-12)

⁹ O Iesu i watung a wasiso elelar ri tan a taro lena, “Ara musano i marut tar a kinobot na wain, ra numur i pitar tari munung tan a ramano kum tene pinapam sur det in tamtamabati, ra i wan taru gusun det, ma i sa suano bat pasi tiro iai. ¹⁰ Ra a kalang i sa sot sur din git tomo a wino wain, i tulu ru ara tultul torom a taro na pinapam, sur lako kum kur wain tagun anun a kinobot sur anunu kai. Ikut a taro na pinapam det umi, ma det tulu oros melet ru i kut. ¹¹ I tulu melet ara tultul torom det, ikut det um meleti, det ban umaimai tari, ma det tulu oros melet ru i kut. ¹² Numur i tulu melet a mantul na tultul, ra det um laulau tari, ma det woro pirso ru i. ¹³ Ra a taman a kinobot i watungi lena, ‘Asau mo ra an pami? An tulu ru o nutunglik ut, a nat na

wakak. Kutiro det in urur uni.’ ¹⁴ Ikut, ra a taro na pinapam det tama pasi, det wasiso tomo pas lena, ‘O naro ra in keles o tamano, i mo ra i wan urin. Mot iap, dat in um doko i, sur anundat mo a kinobot.’ ¹⁵ Ra det sugut pirso ru i tagun a kinobot, ma det um doko ru i.

“Asau mo a taman a kinobot na wain in pami un det? ¹⁶ In nanpat ma in um doko ru a taro na pinapam, ma in pitar tar a kinobot torom lako taro gisen, sur det in tamtamabati.” Ra a taro det longoro a wasiso ri, det watungi lena, “Awu, ken lenra!” ¹⁷ Ikut o Iesu i nas det, ra i watungi lena, “Asau mo a kukurai ina wasiso ri ra di sa tumus tari una Buk Tabu?

‘A wat ra a kum tene pam rumu det lakro ru tari, i ut ra, i wanpat a wakak na wat ra i udekdek a rumu.’ *Sng 118:22*

¹⁸ Det rop ra det puku taru una wat ri, det in tiginogino, ma osi ra a wat ri in puku taru uni, in tiginogino rop elar nama kubus.”

¹⁹ A kum tene ususer tagun a Warkurai ma a kum lamlabino tene etabor torom o God det sisio sur tu kisapi sur det in pam ukai pas o Iesu una du bung utra, uni det tasmani ut lena i watung a wasiso elelar ri un det. Ikut det ngaran a taro.

A iting una takis

(Mt 22:15-22; Mk 12:13-17)

²⁰ A kum tene ususer tagun a Warkurai ma a kum lamlabino tene etabor torom o God det tama sursuri, ma det tulu ru a kum tene torotoro ma det toro lena det a lingmulus na taro. Ra det kis na usobor sur tu wasiso ra o Iesu in watung

tari ra det in takuni nami, sur det in pitar tari una warkurai ma una dekdekin a mugumugu tagun a matanitu Rom. ²¹ Ra det watungi lena, “Tene Ususer, met tasmani lena i tokodos anum a wasiso ma anum a etowo. A magiram i takai kut torom a taro rop, ma u ser ususer det una kisapi anum o God nama lingmulus. ²² Pepetlai, i tokodos sur dat in pitar a takis torom a Sisa * o awu?” ²³ O Iesu i sa tasman ru anundet a torotoro, ra i watungi tandet lena, ²⁴ “Mot in ese iau nam tu mani. In masarin osi ri, ma a tumtumus ri uni anum osi?” Det balu i lena, “Anun a Sisa.” ²⁵ Ra i watungi tandet lena, “Asau ra anum a Sisa, mot in pitari torom a Sisa. Ma asau ra anum o God, mot in pitari torom o God.” ²⁶ Ma ka det usobor lar pasi umatan a taro nama wasiso ra. Det kisin doko una nun a minabalu, ma katu wasiso mo anundet.

*A iting una nilaun melet gusun a minat
(Mt 22:23-33; Mk 12:18-27)*

²⁷ A ramano kum Sadusi, ra det ser ipul kut lena, katu nilaun melet gusun a minat, det wan torom o Iesu, ma det tingi lena, ²⁸ “Tene Ususer, o Moses i tumus tari tandat lena, ra tu musano in mat pas gusun anum a ino, ma katu nutunder, o tisinolik in ben pasi ra in nolin nami, sur in ulabo tar lako kum nat una risan o tisino. ²⁹ Ara kabo tisino, a wonom mawit na musano det. A mugano i nolin, ra i mat pas gusun anum a ino, ma katu nutunder. ³⁰ Ra a murmur tano bulung i

* **20:22:** A Sisa i a labino mugumugu tagun a gapman Rom, ma a taro Israel kai det kis utuntudu in anum a warkurai.

nolin nama ino ra, ma i bulung i mat kut gusuni.
³¹ Numur a mantul nami bulung i nolin nama ino ra. I lenkutkai ra, a wonom mawit det rop, det nolin pas nami, ma det mat kut. Ikut a ino ra, ke usus tar tu nat un det. ³² Ra numur a ino bulung i mat. ³³ Una nilaun melet gusun a minat, a ino ra, anun osi na pasandet mo? Uni a wonom mawit rop, det sa nolin pas nami.”

³⁴ O Iesu i watungi tandet lena, “A taro tagun a kum kilalo ri det ser nolin, ³⁵ ikut a taro ra det tokodos sur det in katatur melet gusun a minat, ma det in laun una nilaun numur, ka det in nolin melet mo. ³⁶ Ma ka det in mat melet, uni det elar mukut nama kum ensel. Det a kum nutnutun o God, uni det sa laun melet gusun a minat. ³⁷ O Moses i ese i lena a kum minat det katatur melet. Una wasiso na Buk Tabu unin nanai ra i kunabor, o Moses i watung a Labino lena, ‘A God anun o Abaram, a God anun o Aisak ma a God anun o Jekop†.’ *Kis 3:6*

³⁸ O God awu sur a God anun a kum minat, i a God anundet ra det laun, uni umatano det rop det laun.” ³⁹ Ra a ramano kum tene ususer tagun a Warkurai det watungi lena, “Tene Ususer, anum a wasiso i wakak doko.” ⁴⁰ Ma ka det wan melet mo toromi nam tu iting, uni det ngara.

*A Karisito i a Labino anun o Dewid
 (Mt 22:41-46; Mk 12:35-37)*

⁴¹ O Iesu i watungi tandet lena, “I lai ra di watungi lena a Karisito i a nutun o Dewid? ⁴² Uni

† **20:37:** O Abaram, o Aisak ma o Jekop detul mat, ikut a wasiso ri i ese i lena, uniri detul laun.

o Dewid ut i watungi una Buk Song una Buk Tabu lena,

‘A Labino i watungi torom anung a Labino lena,
“Un kis una papor sot na lamang,

⁴³ tuk ra an winim pas anum a kum ebar
sur det in kis utuntudu in anum a warkurai.”
Sng 110:1

⁴⁴ O Dewid i watung a Karisito lena, i anun a Labino. Ra i lenra, der tamano pepetlai?”

O Iesu i utumarong a taro una petutna anun a kum tene ususer tagun a Warkurai

(Mt 23:1-36; Mk 12:38-40; Lk 11:37-54)

⁴⁵ Ra a taro rop det longoro o Iesu, i watungi tan anun a kum nat na ususer lena, ⁴⁶ “Mot in tumarong mot gusun a kum tene ususer tagun a Warkurai. Det nemi sur det in nan tuptupukus nama kum wakak na ememar, ma det nemi kai sur a taro det in pitar a labino urur torom det una kum nubual na inawan tomo. Ma det nem a kinkinis sa numugu una kum rumu na lotu, ma a kinkinis na labino sa numugu una kum lukaro.

⁴⁷ Det ser urop a kum ululeng anun a kum ula, ma det ser pam a kum walalos na niaring sur a taro det in tama det. In labo doko a warkurai na minabalu anun o God torom det.”

21

A etabor anun a ula

(Mk 12:41-44)

¹ O Iesu i kis una rumu na etabor, i tamtama usa, ra i tama a kum tene gongon det woro tar anundet a etabor una dino ra di ser woro mani uni. ² Ra i tama ara sibo na ula kai i woro tar aru

toia kut. ³ Ra o Iesu i watungi lena, “A inanos mot nama lingmulus, a sibo na ula ri, i woro a labino mani taun det rop ra det woro anundet a kum mani. ⁴ Det woro tari kut a sibano tagun anundet a kum mani, ikut a sibo na ula ri, i sa woro rop ru asau ra in topas anun a kinkinis.”

*A kum ukinalong ina ururop na bung
(Mt 24:1-14; Mk 13:1-13)*

⁵ A ramano kum nat na ususer det watungi una rumu na etabor lena, di sa mar tari nama kum wakak na watat ma a kum etabor ra di pitari torom o God. Ikut o Iesu i watungi lena, ⁶ “A kum utna ri, ra mot tama det, a bung in nanpat numur ra din rege ginogino det rop, ma katu wat in inep netes un tu wat.”

⁷ Det ting o Iesu lena, “Tene Ususer, nangisin mo a kum utna ri in nanpat? Ma asi na ukinalong ra in ese i lena i sa milau sur det in nanpat?” ⁸ I balu det lena, “Mot in tumarong, sako din toro pas mot. Uni a susut det in nanpat nama risang, ma det in warango det lena, ‘Iau a Karisito,’ ma lena, ‘A du bung i sa milau.’ Gong mot mur det. ⁹ Ra mot in longoro a kum inaim ma a kum inaim tomo nama gapman, gong mot ngara, uni a kum utna ri det in nanpat mugu, ikut a ururop ina rakrakon bual ken nanpat utmakai.”

¹⁰ O Iesu i watungi tandet lena, “A kum kamk-
abo taro det in tur na inaim torom a kum se
kabotaro, ma ara gapman in tur na inaim torom
ara gapman. ¹¹ A kum lamlabino guri, ma a kum
munurak ma a kum ngas na dekdek na misait una

kum tamon, ma a kum ngas na utna tagisapat una bakut ra in ungara a taro, ma a kum lamlabino ukinalong tagisapat una bakut, det in nanpat.

¹² “Numugu ra a kum utna ri ka det wanpat utmakai, din dat pas mot, din ukadik mot, ma din dat mot una kum rumu na lotu sur a warkurai, ma din uruk mot una kum karabus. Ma din dat pas mot sur a warkurai sa numugu umatan a kum king, ma a kum lamlabino mugumugu, uni mot anungi. ¹³ I ra, a wakak na du bung, sur mot in wasiso talapor un iau torom det. ¹⁴ Gong mot nuknuk mugu sur asau ra mot in balu lako kum etakun nami. ¹⁵ Uni iau ut, an unuk tar a wasiso ma a mananos kai una nuknuki mot, ra anumot a kum ebar rop, ka det in balu lar pasi, ma ka det in ipul ru i. ¹⁶ A kum tamtama mot ma a kum nanamot, a kum tistisi mot, a kum kukumot, ma a kum paspasa mot, det in mulaot ru mot sur din um doko lako taro tagun mot. ¹⁷ A taro rop det in nget mot uni mot anungi. ¹⁸ Ikut ka tin iwu na lorimot in raro. ¹⁹ Anumot a tuntunur dekdek in ulaun mot.

*O Iesu i watungi lena din kamar ru o Jerusalem
(Mt 24:15-21; Mk 13:14-19)*

²⁰ “Ra mot in tama a kum taro na inaim det tur talilis pas o Jerusalem, mot in tasmani lena i milau sur din kamar ru i. ²¹ Ma det ra det kis una papor Judia, det in kalabor eno usapat una kum tangai, ma det ra det kis una tamon Jerusalem det in pirso, ma det ra det kis sa ubual gong melet mo det ruk. ²² Uni a kum bung ra, det a kum bung na

minabalu sur din pam sot pas a kum ututna rop ra di sa tumus tari una Buk Tabu. ²³ Una kum bung ra, in laulau doko torom a kum tianan, ma torom a kum ino kai ra a kum nutnutun det, det sus utmakai. A labino ngunungut in nanpat una tamon Israel, ma a kankan anun o God in monong a taro ri. ²⁴ Lako taro din um doko det nama totok na inaim, ma lako taro din ben pas det sur det in kis na karabus una kum tamon rop. Ma det ra awu sur a taro Juda det in pas tataun o Jerusalem, ma in tuk ut una bung ra o God i kubus tari sur a taro ra awu sur a taro Juda det in mana nama ban laulau a taro Juda.

*A Nutun a Musano in nanpat
(Mt 24:29-31; Mk 13:24-27)*

²⁵ “A kum ukinalong in nanpat sapat netes unin matanas, ma una kalang, ma una kum nangnang. Ma nin upiso a taro tagun a kum gapman rop det in laulau nama nginara una karangop ina top ma a wungu ino, ma a nuknukin det kai in talara uni. ²⁶ A taro det in matmat lalang nama nginara kibino una kum utna ra in nanpat una rakrakon bual, uni a kum utna sapat netes una bakut det in tugunu. ²⁷ Una bung ra, det in tama a Nutun a Musano in nanpat una du bakut, nama dekdek ma a labino minamar. ²⁸ Ra a kum utna ri in turpasi sur in nanpat, mot in tur, ma mot in tatado, uni a bung ra o God in ulaun pas mot uni i sa milau.”

21:24: Sng 79:1; Tam 11:2 **21:25:** Ais 13:10; Ese 32:7; Jol 2:31; Tam 6:12-13 **21:27:** Dan 7:13; Mt 26:64; Tam 1:7

*A wasiso elelar unin nanai na fig
(Mt 24:32-35; Mk 13:28-31)*

²⁹ O Iesu i watung a wasiso elelar ri tandet lena, “Mot in nuk pas in nanai na fig ma a kum duwai rop. ³⁰ Ra mot tama a kum gomono det in sibul pat, mot tasmani lena, a kum kalang na mararong i sa milau. ³¹ Lenkutkai ra mot in tama a kum utna ra a wasiso taru uni in nanpat, mot in tasmani lena a matanitu anun o God i sa milau. ³² A inanos mot nama lingmulus, a kum utna rop ri in nanpat ra a taro tagun uniri det laun utmakai. ³³ A langit ma a rakrakon bual der in rop, ikut anung a kum wasiso ken rop.

Mot in tumarong mot

³⁴ “Mot in tumarong mot, sako mot in balon nama pam lukaro ma a ininum, ma a nginara sur a kum utna una nilaun nin upiso, ma a bung ra in nanpat kisin torom mot elar namin nukun. ³⁵ Uni in nanpat torom a taro rop una rakrakon bual. ³⁶ Mot in tumarong mot una kum bung rop, mot in wararing sur mot in dekdek sur mot in walip gusun a kum utna rop ri ra milau det in nanpat. Ma mot in wararing kai sur mot in pet lar pasi sur mot in tur umatan a Nutun a Musano.”

³⁷ Una kum bung rop o Iesu i ususer a taro ubalan in noworo ina rumu na etabor, ma una kum mirum i pirso, ma i kis una tangai, a risano o Oliw. ³⁸ Ma una kum bung na kobot raut, a taro rop det wan toromi ubalan in noworo ina rumu na etabor sur det in longoro i.

22

O Judas i mulaot sur in pitar tar o Iesu torom a kum ebar

(Mt 26:1-5, 14-16; Mk 14:1-2, 10-11; Jn 11:45-53)

¹ I sa milau a labino bung na lotu na beret ra kalako is uni, di watungi nama labino bung na lotu na Wanlakai. ² Ra a kum lamlabino tene etabor torom o God, ma a kum tene ususer tagun a Warkurai, det nuknuk sur tu ngas na kisapi sur det in um doko o Iesu uni, uni det ngaran a taro.

³ Ra o Satan i ruk taru un o Judas, ara risano kai o Iskariot, i ara tagun a noino ma aru nat na ususer. ⁴ I wan torom a kum lamlabino tene etabor torom o God, ma a kum mugumugu anun a kum tene tamtamabat tagun a rumu na etabor, ra i wasiso tomo nam det sur in pitar petlan tar o Iesu ulamandet. ⁵ Det gas, ma det watungi lena, det in kuli nam lako mani. ⁶ O Judas i mulaot, ra i nuknuk sur tu wakak na du bung, ra kalako susut na taro, ra in pitar tar o Iesu ulamandet.

Aru nat na ususer der waninar a utna na Wanlakai

(Mt 26:17-25; Mk 14:12-21; Jn 13:21-30)

⁷ A labino bung na lotu na beret ra kalako is uni i wanpat, ra di ser um doko a kum sipsip uni, sur din nani una labino bung na lotu na Wanlakai. ⁸ Ra o Iesu i tulu ru o Pita ma o Jon, ma i watungi tander lena, “Mur in nan ma mur in waninar andat a utna sur a labino bung na lotu na Wanlakai.” ⁹ Ra der tingi lena, “U nemi sur mir in waninari awai?” ¹⁰ I balu der lena, “Ra mur in

nanpat sapat o Jerusalem, mur in etorom nam ara musano i los in labino koto na danim, ra mur in muri utiro una rumu ra in ruk uni. ¹¹ Ma mur in watungi tan a taman a rumu lena, ‘A Tene Ususer i watungi lena: Awai i a kukur rumu ra met nam anung a kum nat na ususer, met in nan a utna na Wanlakai iai?’ ¹² Ma in ese tar mur una labino kukur rumu sapat netes, ra di sa waninar tari. Mur in waninar a utna tiro iai.” ¹³ Ra der wan, ma der pastoromi ut a kum utna rop ra o Iesu i sa watung tari tander. Ra der waninar a utna na Wanlakai.

A ururop na inangon anun a Labino

(Mt 26:26-30; Mk 14:22-26; 1 Kor 11:23-25)

¹⁴ Ra a du bung i sa sot, o Iesu ma a kum aposel det kis una inangon. ¹⁵ Ra o Iesu i watungi tandet lena, “A nem doko i sur dat in nan a utna na Wanlakai, ra ka taramo i utmakai a ngunungut, ¹⁶ uni a watungi tamot lena, kan nan melet mo tu utna na Wanlakai tuk una bung ra o God in pam sot pas a kukurai ina Wanlakai una nun a matanitu.”

¹⁷ O Iesu i los pas a kap ma i watung wakak pas uni, ra i watungi tandet lena, “Mot in los pas a kap ri, ma mot rop mot in inum taguni. ¹⁸ Uni a watungi tamot lena, kan inum melet mo lako wain, tuk ra a matanitu anun o God in nanpat.”

¹⁹ Ra i los pas a beret, i watung wakak pas uni, i tibiki, ma i tabor det nami, ra i watungi lena, “Iri a pining, a pitari sur mot. Mot in ser pami lenri, sur mot in ser nuk melet pas iau.” ²⁰ Lenkutkai ra, numur tan a inangon, i los pas a kap ma i watungi lena, “A kap ri, a matok na kunubus tagun a

gaping ra i tilingis sur mot, ra i dat tomo tar a taro nam o God. ²¹ Tama i! A laman o naro ra in pitar tar iau torom a kum ebar, kuri mir rarakon tomo una kabulu na inangon. ²² A lingmulus ut ra a Nutun a Musano in mat elar nam o God i sa kubus tari. Ikut in laulau sakit torom a musano ra in pitar tari torom a kum ebar.” ²³ Ra det ting etetalai det lena, “Osi mo tagun dat in pam a utna ri?”

Osi ra i labo taun det?

²⁴ Det engaras sur osi na pasandet din watungi lena, i labo taun det. ²⁵ Ra o Iesu i watungi tandet lena, “A kum king anun a taro ra awu sur a taro Juda, det kuro laulau det, ma anundet a kum mugumugu det nemi sur din watung det a kum wakak na tene warut. ²⁶ Ikut torom mot ken lenra. Osi ra i labo taun mot in elar kut nami ra i natino, ma osi ra i mugumugu in elar kut nama tultul. ²⁷ Osi ra i labo? O naro ra i kis una inangon, o, o naro ra i ser taromlu i? I ut ra i kis una inangon, niko? Ikut iau, a kis epotor tamot elar nami ra i ser taromlu.

²⁸ “Mot, mot tur tomo nam iau una kum maut ra i wanpat torom iau. ²⁹ Ma an pitar tar a kinkinis na king tamot elar nam o Tita i sa pitar tari tang, ³⁰ sur mot in nangon ma mot in inum una nung a kabulu una nung a matanitu. Ma mot in kis una kum kiskis na king, ra mot in warkurai sur a noino ma aru kabotaro Israel.”

22:21: Sng 41:9; Jn 13:21-22 **22:24:** Lk 9:46 **22:25:** Mt 20:25-27; Mk 10:42-45 **22:26:** Mt 23:11; Mk 9:35 **22:27:** Jn 13:12-15 **22:30:** Mt 19:28

*O Iesu i wasiso mugu lena o Pita in ipul ru i
(Mt 26:31-35; Mk 14:27-31; Jn 13:36-38)*

³¹ O Iesu i watungi lena, “Saimon, Saimon, tama i, o Satan i sa sasaring pas sur in lar mot, elar nama tene minarut ra i lakro susuaro a wit mulus gusun a pinino. ³² Ikut a sa wararing taru sur ui, Saimon, sur gong anum a nurnur i puku. Ra u sa nukpukus melet, un udekdek a kum tistisim.” ³³ O Pita i watungi tano lena, “Labino, a sa waninar taru, sur an nan tomo nam ui una karabus, ma una minat.” ³⁴ Ma o Iesu i balu i lena, “Pita, a watungi tam, uniri a kereke ken kurkurirakuk utmakai, ra un ipul a tulu dino lena, ko tasman iau.”

Det in los a paus na umubek mani, a rat ma in totok na inaim

³⁵ Numur o Iesu i ting anun a kum nat na ususer lena, “Ra a tulu ru mot, ma katu paus na umubek mani anumot, o tu rat, o tu su, pepetlai, mot sibo ut sur tu utna?” Ra det balu i lena, “Awu.” ³⁶ Ra o Iesu i watungi tandet lena, “Ikut uniri, osi ra anunu tu paus na umubek mani, i wakak sur in losi ut, ma a rat kai. Ma osi ra ka tin totok na inaim, i wakak sur in siuru ru anun a saket sur in kul pas tino. ³⁷ A watungi tamot, din pam sot pas a tumtumus ri un iau, ‘Di watung tomo det nama kum tene sakino.’ *Ais 53:12* Uni a kum utna ri di sa tumus tari un iau, milau mo din pam sot pasi.” ³⁸ Ra a kum nat na ususer det watungi lena, “Tama i, Labino, arin totok na inaim kuri ut.” Ra o Iesu i balu det lena, “I elar kut.”

O Iesu i wararing
(Mt 26:36-46; Mk 14:32-42)

³⁹ O Iesu i pirso gusun a tamon, ra i wan usapat una Tangai na Oliw, elar ut nami ra i ser pami. Ra a kum nat na ususer det muri. ⁴⁰ Ra det wanpat una nubual ra, i watungi tandet lena, “Mot in wararing, sur gong mot puku una ululam.” ⁴¹ I wan gisen lilik taru kut gusun det, i kis butkeke, ma i wararing lena, ⁴² “Tita, ra u nemi, un los ru a kap na mamaut ri gusun iau. Ikut gong u mur anung a nemnem, un muri ut anum a nemnem.” [⁴³ Ra ara ensel tagisapat una langit i wanpat toromi, ma i udekdek tari. ⁴⁴ I taramo a dekdek na tupunuk, ra i dekdek doko nama niaring. Ma a misongot na pinino i elar nama tutu na gap i puku pirso utiro upiso.] *

⁴⁵ I urop a niaring ra i tur, i milet melet torom a kum nat na ususer, ra i tama det ra det sa inep dumun, uni a pinindet i tungulu nama tupunuk. ⁴⁶ Ra i watungi tandet lena, “Ilai ra mot inep dumun kut? Mot in katatur, ma mot in wararing, sur gong mot puku una ululam.”

Di dat pas o Iesu
(Mt 26:47-56; Mk 14:43-50; Jn 18:3-11)

⁴⁷ Ra o Iesu i wasiso utmakai, a labino kunur na taro det wanpat. Ra o Judas, ara tagun a noino ma aru nat na ususer, i mugu pas det. I wan torom o Iesu sur in gom a pangpagor na wano. ⁴⁸ Ra o Iesu i tingi lena, “Judas, pepetlai, un pitar tari

* **22:44:** Una ramano kum du buk una wasiso Grik, aru vers 43 ma 44 ka der kis.

mo a Nutun a Musano torom a kum ebar, nama egom?”

⁴⁹ Det ra det wan tomo nam o Iesu det tasman asau ra in nanpat, ra det tingi lena, “Labino, pepetlai, met in waim nama numet a kum totok na inaim?” ⁵⁰ Ma ara tagun det i tau kutus ru in nosot na talngan a tultul anun a mugumugu na tene etabor torom o God.

⁵¹ Ra o Iesu i turbati lena, “Gong!” Ra i pam in talngan a tultul, ma in talngano i wakak melet. ⁵² O Iesu i wasiso torom a kum lamlabino tene etabor torom o God, ma a kum mugumugu anun a kum tene tamtamabat tagun a rumu na etabor, ma a kum mugumugu anun a taro ra det wanpat suri. I watungi lena, “Pepetlai, kutiro iau a tene inaim ma a tene wolong, sur i mo ri mot wanpat nama kum totok na inaim ma a kum nalnal sur iau? ⁵³ Una kum bung rop dat ser kis tomo ubalan in noworo ina rumu na etabor ma ka mot pam ukai iau. Ikut uniri anumot a du bung, ra a dekdekin a dumirum i mugu mot.”

O Pita i ipul ru o Iesu

(Mt 26:57-58, 69-75; Mk 14:53-54, 66-72; Jn 18:12-18, 25-27)

⁵⁴ Det pam ukai pas o Iesu, ra det ben gisen ru i. Det beni utiro una rumu anun a mugumugu na tene etabor torom o God. Ra o Pita i mur nanan o Iesu, ikut i bakbak ut gusuni. ⁵⁵ Ra det sa tagol tar a sungun nago utamon, ma det kis tomo, o Pita kai det ut. ⁵⁶ Ara toraro, a tultul, i tama pasi ra i kis taru una talapor ina sungun, ra i nas dekdeki, ma i watungi lena, “A musano ri, i ser wan tomo

utkai nam o Iesu.” ⁵⁷ Ikut o Pita i ipul lena, “Le, ka tasman o Iesu.” ⁵⁸ Numur lilik kut, ara bulung i tama pas o Pita ra i watungi lena, “Ui kai tagun det.” Ra o Pita i balu i lena, “Le, iau awu.”

⁵⁹ Numur lilik melet, ara bulung i ngongos lena, “A lingmulus ut, a musano ri i ser wan tomo utkai nam o Iesu, uni i a te Galili.” ⁶⁰ O Pita i balu i lena, “Le, ka tasman asau ra u wasiso uni.” Ra i wasiso utmakai, uniutra a kereke i kurkurirakuk mut. ⁶¹ A Labino i tupukus, i tamtama tokodos torom o Pita, ra o Pita i nuk pas a wasiso anun a Labino ra i sa watung tari tano lena, “Uniri, a kereke ken kurkurirakuk utmakai, ra un ipul a tulu dino lena, ko tasman iau.” ⁶² Ra i pirso gusun a nubual ra, ma i tangis dokodoko i.

*Di urongon laulau un o Iesu ma di mirasi
(Mt 26:67-68; Mk 14:65)*

⁶³ Det ra det tamtamabat o Iesu, det urongon laulau uni, ma det mirasi. ⁶⁴ Det pulus bat pas arin matano, ma det watungi tano lena, “Ui a poropet, un inanos met. Osi ra i takalo ui?” ⁶⁵ Ma det mang sakosako i nama susut na wasiso utkai.

*O Iesu i tur umatan a taro na kiwung
(Mt 26:59-66; Mk 14:55-64; Jn 18:19-24)*

⁶⁶ Ra i waspi, a kum mugumugu anun a taro, a kum lamlabino tene etabor torom o God, ma a kum tene ususer tagun a Warkurai det wan tomo. Ma di ben pas o Iesu torom det una nundet a kiwung, ma det watungi tano lena, ⁶⁷ “Ra ui a Karisito, un inanos met.” Ra o Iesu i balu det lena, “Ra an inanos mot, ka mot in nurnur una nung a

wasiso. ⁶⁸ Ma ra an ting mot nam tu iting, ka mot in balu i. ⁶⁹ Ikut, turpasi uniri, a Nutun a Musano in kis una papor sot na laman o God, i ra i dekdek sakit.” ⁷⁰ Ra det rop det ting o Iesu lena, “Ui a Nutun o God niko?” Ma i balu det lena, “Mot sa watung sot pasi, iau ut ri.” ⁷¹ Ra det watungi lena, “Dat nem melet lako wasiso na etakun sur asau? Uni dat sa longoro tar anun a wasiso ri.”

23

*O Iesu i tur una warkurai numugu tan o Pailat
(Mt 27:1-2, 11-14; Mk 15:1-5; Jn 18:28-38)*

¹ A taro na kiwung rop det tur, ra det ben o Iesu torom o Pailat. ² Ra det turpasi sur det in takuni lena, “Met pastorom a musano ri i ben raro anumet a taro. I turbat met sur gong met pitar a takis torom a Sisa, ma i warango i kai lena, i a Karisito, a king.” ³ O Pailat i tingi lena, “Ui a king anun a taro Juda?” Ra o Iesu i balu i lena, “I ut ra u sa watung tari.” ⁴ O Pailat i watungi tan a kum lamlabino tene etabor torom o God ma a kunur na taro lena, “Ka tikin pas tu petutna a musano ri i raro uni.” ⁵ Ikut, det ngongos makai lena, “Anun a etowo i ukatutur a balan a taro, sur det in lakai a warkurai anun a gapman una papor Judia rop. I turpasi tong o Galili ra i tuk taru ut nin.”

O Iesu i tur una warkurai umatan o Erod

⁶ Ra o Pailat i longoro i, i iting un o Iesu lena, “I a te Galili?” ⁷ Ra i sa tasmani lena o Iesu tagitong una papor Galili, ra o Erod i mugumugu iai, i tulu

ru i toromi. Una bung ra, o Erod kai i kis sapat o Jerusalem.

⁸ Ra o Erod i tama pas o Iesu, i gas doko, uni tagun numugu utmakai i nemi sur in tama i, uni i sa longoro tar a wasiso uni, ra i nemi sur in tama tu utna na ukisin ra in pami. ⁹ Ma o Erod i ting o Iesu nama susut na iting, ikut o Iesu ke balu i. ¹⁰ A kum lamlabino tene etabor torom o God ma a kum tene ususer tagun a Warkurai kura det tur tiro iai, det takun dekdek o Iesu. ¹¹ O Erod ma anun a taro na inaim det urongon laulau uni, det nongoni, det mar tari namin wakak na malu sakit, ra det tulu melet ru i torom o Pailat. ¹² Numugu o Erod ma o Pailat der ebar, ikut una bung ra, der emarom maragom.

*O Pailat i warkurai o Iesu sur in mat
(Mt 27:15-26; Mk 15:6-15; Jn 18:39-19:16)*

¹³ O Pailat i kabo tomo pas a kum lamlabino tene etabor torom o God, ma a kum mugumugu, ma a taro, ¹⁴ ra i watungi tandet lena, “Mot sa ben tar a musano ri torom iau, elar nam ara ra i ukatutur a balan a taro, sur det in lakai a warkurai anun a gapman. Ra iri a sa ting tari umatamot, ma ka tikin pas tu petutna ra a musano ri i raro uni. ¹⁵ Ma o Erod kai, ke pastorum tu niraro, ra i tulu melet ru i urin torom dat. Tama i, ke pam tar tu utna sur in iru uni. ¹⁶⁻¹⁷ I mo ra an miras tatari kut, ra an palos ru i.”*

* **23:16-17:** Una ramano kum du buk una wasiso Grik, a ramano kum wasiso kai i kis una vers ri. I lenri: *Un arara labino bung na lotu na Wanlakai, o Pailat i ser palos ru ara musano gusun a karabus torom a taro.*

18 Ra a taro rop det kukukuk lena, “A musano ri in iru. Palos ru o Barabas torom met.” 19 O Barabas i ara musano ra di uruk tari una karabus, uni i waim nama gapman una tamon Jerusalem, ma i ser um doko a taro kai. 20 O Pailat i ting melet det, uni i nemi ut sur in palos ru o Iesu. 21 Ikut, det kukukuk dekdek kut lena, “Sak wati unin nanai kutus! Sak wati unin nanai kutus!” 22 Ra i mantul nami i ting det lena, “Asau a kibino? Asi na sakino utna ra i sa pam tari? Ka pastorum tu sakino petutna sur in iru uni. I mo ra an miras tatari kut, ra an palos ru i.” 23 Ikut, det dekdek nama kukukuk nama labino walngandet, sur din sak wati mukut unin nanai kutus. Ra det kukukuk taun a wasiso anun o Pailat. 24 Ra o Pailat i mulaot mukut sur din pami elar nama nundet a nemnem. 25 Ra i palos ru o Barabas ra i kis una karabus, uni i waim nama gapman ma i um doko a taro, i ra det sasaring suri. Ma i pitar tar o Iesu torom a kum tene inaim elar nama nemnem anun a taro.

*Di sak wat o Iesu unin nanai kutus
(Mt 27:32-44; Mk 15:21-32; Jn 19:17-27)*

26 Ra det ben pas o Iesu sur din sak wati unin nanai kutus, det dat pas ara te Sairini, a risano o Saimon, ra i wan tagitong un ara tamon sur in nan usapat o Jerusalem. Ra det ubek tar in nanai kutus usapat netes uni, sur in los murmur o Iesu nami.

27 A labino kunur na taro det mur o Iesu. Epotor tandet a wardain utkai, ra det tupunuk ma det tangisi. 28 O Iesu i tupukus, ma i watungi tandet

lena, “A wardain Jerusalem, gong mot tangis iau, mot in tangis mot ut, ma a kum nutnutu mot.

²⁹ Uni a kum bung na mamaut in nanpat ra a taro det in watungi lena, ‘A kum pobo na ino, ra ka det usus ma ka det ugu nat, det dan.’ ³⁰ Ma

‘det in watungi torom a kum tangai lena, “Mot in puku sapat netes un met!”

ma torom a kum du tultul lena, “Mot in por met†!”

Os 10:8

³¹ Ra det pam a kum utna ri ra in nanai i laun utmakai, asau ra det in pami ra i sa marang?‡”

³² Ma aru kai, aru laulau na musano, di ben der tomo nam o Iesu sur din sak wat der tomo nami.

³³ Ra det wanpat una nubual ra di watungi nama, “Nubual na Lor na Minat,” tiro iai det sak wat o Iesu unin nanai kutus, ma aru sakino musano kai, ara una papor sot, ma ara kai una kair. ³⁴ Ra o Iesu i watungi lena, “Tita, un unus ru anundet a sakino petutna, uni ka det tasman asau ri det pami.” Ma det pilai laki sur det in isuaro anun a kum malu torom det taktakai.

³⁵ A taro det tur ra det ieli, ma a kum mugu-mugu det urongon laulau un o Iesu, det watungi lena, “I ulaun pas a taro gisen. Ra i a Karisito anun o God, anun a nat na pipilok, i wakak sur in ulaun pasi ut.” ³⁶ Ma a kum tene inaim kai det urongon laulau uni. Det wan toromi, det pitar tar a wain ra i mititir tano, ³⁷ ra det watungi lena, “Ra

23:30: Tam 6:16 † **23:30:** Det wasiso lenri uni det los a labino maut ra det ling sur det in mat lakit. ‡ **23:31:** In nanai i laun utmakai i ukinalong o Iesu, ma in nanai ra i marang i ukinalong a taro Juda. **23:34:** Ais 53:12; Sng 22:18 **23:35:** Sng 22:7-8 **23:36:** Sng 69:21

ui a king anun a taro Juda, uniri un ulaun pas ui mo.”³⁸ Di tumus tari kai a tumtumus sapat netes unin nanai kutus lena,

“IRI A KING ANUN A TARO JUDA.”

³⁹ Ara tagun aru sakino musano ra der kete tomo nam o Iesu, i watung laulau i kut o Iesu lena, “Ui a Karisito, niko? Un ulaun pas ui ma mir kai!”⁴⁰ Ma ara pasander i kankan toromi, ra i watungi lena, “PePETlai, ui ko ngara sur o God? Uni ui kai u los ara ngas na warkurai kut elar nami.”⁴¹ I tokodos ut un dar, uni dar los a minabalu una nundar a sakino petutna. Ikut, a musano ri ke pam tu niraro.”⁴² Ra i watungi tan o Iesu lena, “Iesu, nuk pas iau, ra un ruk una num a matanitu.”⁴³ Ma i balu i lena, “A inanos ui nama lingmulus, uniri un kis tomo nam iau una Paradais§.”

O Iesu i mat

(Mt 27:45-56; Mk 15:33-41; Jn 19:28-30)

⁴⁴ Una du bung ra, i noino ma aru pakano bung una suan, ra a bual rop i dumirum tuk una tulu pakano bung una lirop,⁴⁵ uni in matanas ke sisio. Ra in namalu ra di mabat kutus nami sa urumu una rumu na etabor i tararos potora sur aru dino.⁴⁶ Ra o Iesu i kukuk dekdek lena, “Tita, a pitar tar a niong un aru lamam.” Ra i sa watung tari lenri, i mat.⁴⁷ A mugumugu anun a kum tene inaim i tama a utna ri i wanpat, ra i watung ulabo pas o God lena, “I lingmulus ut, a musano ri a tene tokodos.”⁴⁸ A kunur na taro kura det tur tomo taru sur det in tama a utna ri. Ra det tama i, det

§ 23:43: A Paradais i a wakak na tamon anundet ra det nurnur. Ra det in mat det in kis iai. 23:44: Lk 8:2-3

raprapus a kum romrobon det nama tupunuk ra det millet melet. ⁴⁹ Ikut, a kum paspasan o Iesu, ma a wardain ra det muri tagitong o Galili, det tur bakbak taru ut, ma det tama a kum utna ri.

*Di inep o Iesu una kulam na minat
(Mt 27:57-61; Mk 15:42-47; Jn 19:38-42)*

⁵⁰⁻⁵¹ Ara musano, a risano o Josep, tagitong o Arimatia una papor Judia. I ara wakak na musano, ma a tene tokodos, ma i kiskis langlang sur a matanitu anun o God. I ara tagun a taro na kiwung, ikut, ke mulaot tomo nam det una nundet a warkurai ma una utna ra det pami. ⁵² I wan torom o Pailat ma i saring pas a minatin o Iesu tano. ⁵³ I los pirso pasi, i pulus pasi namin wakak na malu, ra i inep tari una kulam na minat, ra di sa kil tari una papor wat, ra katu minat utmakai i inep taru uni. ⁵⁴ A bung ra, a bung na waninar, ma milau mo a Bung na Sabat in turpasi.

⁵⁵ A wardain ra det wan tomo nam o Iesu tagitong o Galili, det mur o Josep, ra det tama tar a kulam na minat, ma a ngas na ininep ra di pami una minatin o Iesu. ⁵⁶ Ra det millet melet, ma det waninar pas a kum utna ra i sangsangnain wakak, ma a wel ra i sangsangnain kai. Ma una Bung na Sabat, det mana elar ut nama warkurai.

24

*O Iesu i katatur melet gusun a minat
(Mt 28:1-10; Mk 16:1-8; Jn 20:1-10)*

¹ Ra i kobot raut, una mugano bung una wik, a wardain det los a kum utna ra i sangsangnain wakak ra det sa waninar pasi, ra det wan utiro una kulam na minat. ² Ma det pastoromi ra di sa bulus gisen ru a wat gusun a matansako na kulam na minat. ³ Det ruk, ikut ka det tama i mo a minatin a Labino o Iesu. ⁴ Ra a nuknukin det i lokolokor utmakai uni, uniuutra, aru musano, anunder arin namalu i pilpil doko, der wanpat torom det. ⁵ Det ngara, ra det tudung piso ma a masarindet unago piso. Ikut, der watungi tandet lena, “I lai ra mot sisio sur o naro ra i laun nin nisan a kum minat? ⁶ Ke kis mo nin, i sa katutur melet. Mot in nuk pas a wasiso ra i sa watung tari tamot, ra i kis utmakai tomo nam mot tong o Galili. ⁷ I sa watung tari lenri, ‘Din pitar tar a Nutun a Musano una laman a laulau na taro, ma din sak wati unin nanai kutus. Ra a tulu bung in rop in katutur melet.’ ” ⁸ Ra det nuk melet pas a wasiso anun o Iesu.

⁹ Ra det millet melet gusun a kulam na minat, det inanos nama kum utna rop ri torom a noino ma ra nat na ususer ma torom det rop kai, ra det ser mur o Iesu. ¹⁰ A wardain ra det inanos a kum aposel det ri: O Maria Magdalen, o Joana, ma o Maria o nan o Jems, ma a ramano kum ino kai, ra det wan tomo nam detul. ¹¹ Ikut, a kum aposel det longoro a wasiso anun a wardain elar nama wasiso oros kut, ma ka det nurnur un det. ¹² Ikut o Pita i tur, i kalabor sur a kulam na minat. I par pirso, ra i kiet ma i tama a kum malu mukut, det inep gisen taru. Ra i millet melet, ma i nuknuk doko un asau ri i wanpat.

A inawan utong o Emaus
(Mk 16:12-13)

¹³ Una bung ut ra, aru tagun det ra det ser mur o Iesu, der wan sur a tamon a risano o Emaus. A bakbakino i elar nama noino ma ara kilomita tagisapat o Jerusalem. ¹⁴ Ra der wan nanan der wasiso etalai torom der una kum utna rop ri, ra i sa wanpat taru. ¹⁵ Ra der wasiso ma der ting etalai der una kum utna ri, o Iesu ut i wanpat torom der, ma detul wan tomo. ¹⁶ Ikut ara utna i pulus bat arin matander ra ka der tama lele pasi.

¹⁷ O Iesu i ting der lena, “Asau ri mur wasiso nanan uni una numur a inawan?” Der tur taru kut ra der tamtama na tupunuk. ¹⁸ Ma ara pasander a risano o Kliopas, i tingi lena, “Ui mukut ara musano ra u kis na usiro sapat o Jerusalem, ma ko tasman a kum utna ri ra i wanpat sapat una kum bung ri?” ¹⁹ Ra i ting der lena, “A kum utna na sau?” Ma der balu i lena, “A kum utna un o Iesu a te Nasaret. I ara poropet, ra i ser pam a kum dekdek na pinapam, ma anun a wasiso kai i dekdek, umatan o God ma a taro rop. ²⁰ A kum lamlabino tene etabor torom o God ma anundat a kum mugumugu det pitar tari una warkurai sur in mat, ma di sak wati unin nanai kutus. ²¹ Ikut, met nurnur uni lena, i ra, in ulangolango a taro Israel. Ma ara utna kai, i sa tulu bung bat tar a kum utna ri det pami. ²² Ma i kai ri, a ramano kum ino tagun met, det ukisin met. Det wan kobot sur a kulam na minat, ²³ ikut ka det tama a minatino. Ra det milet melet, det watungi lena, det tama tar aru

ensel una tamtama, ra der watungi lena i sa laun.
²⁴ Numur ara taro kai tagun met, det wan pas tiro una kulam na minat, ra det tama tar a utna ri, lenkutkai ra a kum wardain det inanos nami, ikut ka det tama o Iesu.”

²⁵ Ra o Iesu i watungi tander lena, “Mur longlong kut. Nangisin mur in nurnur una kum wasiso rop ra a kum poropet det sa watung tari? ²⁶ Det watungi lena, a Karisito in taramo a kum ngunungut ri, ra numur in ruk una nun a minamar.” ²⁷ Turpasi una kum buk anun o Moses ma a kum poropet rop, o Iesu i papalos torom der una kum utna, ra di sa tumus tari uni ut, una Buk Tabu. ²⁸ Ra detul wan milau sur a tamon ra der wan suri, o Iesu i lari sur in nan sakit mukut. ²⁹ Ma der turbat dekdeki lena, “Un kis tomo nam mir, uni i sa lirop. In matanas i ling na sup mo.” Ra detul ruk ma i kis tomo nam der.

³⁰ Ra detul kis sur detul in nangon, o Iesu i los pas a beret, i watung wakak pas uni, i tibik pasi, ma i tabor der nami. ³¹ Ra a matander i tapalos, ra der tama lele pasi maragom, ra i rorom pas mut gusun der. ³² Ra der wasiso etalai torom der lena, “I lingmulus ut, in balandar i pirok nama gasgas ra i wasiso torom dar, ra datul wan nanan una kisapi ma i palos tar a wasiso na Buk Tabu torom dar.”

³³ Uniutra, der katuttur ma der millet melet usapat o Jerusalem, ra der wan torom a noino ma ra nat na ususer ma ara taro kai ra det kis tomo. ³⁴ Det watungi lena, “A lingmulus ut! A Labino i sa katuttur melet, ma i tur pat torom o Saimon.”

³⁵ Ra der inanos un asau ra i wanpat torom der una kisapi, ma una nunder a tamtama lele kai uni, ra i tibik a beret.

O Iesu i tur pat torom anun a kum nat na ususer (Mt 28:16-20; Mk 16:14-18; Jn 20:19-23; Ap 1:6-8)

³⁶ Ra der wasiso utmakai una kum utna ri, o Iesu ut i tur epotor tandet, ma i watungi tandet lena, “A malmal torom mot.” ³⁷ A pinindet i sursurin ma det ngara doko, det nuki lena, a nion kut ra det tama i. ³⁸ Ma i watungi tandet lena, “Ilai ra mot ngara? Ma ilai ra mot wur nuknuk?” ³⁹ Mot in tama aru lamang ma aru kiking. Iau mulus ut ri. Mot in tuk iau, ma mot in tama iau. A nion kalako pinino, ma kalako sursur kai. Ikut a pining ut ma a sursur na pining utkai, ra uniri mot tama i.” ⁴⁰ Ra i sa watung tari lenri, i ese aru lamano ma aru kikino tandet. ⁴¹ Det gas ma det kisin, ikut ka det nurnur utmakai. Ma i ting det lena, “Katu utna kuri sur an nani?” ⁴² Ma det tabori nama lik kiripo ra di sa tun tari. ⁴³ Ra i rakon pasi, ma i wani umatandet.

⁴⁴ Ma i watungi tandet lena, “Ra a kis utmakai tomo nam mot, a sa inanos tar mot lenri: A kum utna rop ra di sa tumus tari un iau, una Warkurai anun o Moses, una wasiso anun a kum poropet ma una Kum Kelekele anun o Dewid din pam sot rop pasi.” ⁴⁵ Ra o Iesu i utalapor a nuknukin det sur det in talapor una Buk Tabu. ⁴⁶ I watungi tandet lena, “Di sa tumus tari lenri: A Karisito in iru, ra a tulu bung in rop, in katatur melet gusun

a minat, ⁴⁷ ma din warawai una risano torom a taro tagun a kum gapman rop, turpasi sapat o Jerusalem. Din warawai torom det lena, det in nukpukus ma o God in unus ru anundet a kum sakino petutna. ⁴⁸ Mot a kum tene wasiso una kum utna ri mot sa tama tari. ⁴⁹ Tama i, i ra o Tita i sa uliliman taru uni, an tulu ru i torom mot. Ikut mot in kis ut nin una tamon ri, tuk ra din mar tar mot nama dekdek tagisapat netes.”

*O Iesu i wan toto usapat una langit
(Mk 16:19-20; Ap 1:9-11)*

⁵⁰ Numur i ben pirso pas det gusun a tamon Jerusalem, ra det wanpat un ara nubual milau o Betani, ra i kodos aru lamano, ma i watung udan det. ⁵¹ Ra i watung udan det utmakai, i wan gusun det, ra o God i ben toto pasi usapat una langit. ⁵² Det lotu toromi, ra det milet melet usapat o Jerusalem nama labino gasgas. ⁵³ A kum bung rop det kis tiro ubalan in noworo ina rumu na etabor, det ser watung ulabo pas o God.

CXXX

**Buk Baibel long tokples Kandas
Portions of the New Testament in the Kandas
Language of Papua New Guinea
Sampela hap Nupela Testamen long tokples Kandas
long Niugini**

copyright © 2011-2019 Wycliffe Bible Translators, Inc.

Language: Kandas

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-04-02

PDF generated using Haiola and XeLaTeX on 11 Nov 2022 from source files dated 30 Nov 2021

c26408e7-0f52-572d-84cb-b9f49eb40621